

重刊館陶縣志

中華民國二十年徵集

重刊館陶縣志

館陶縣政府發刊

重刊館陶縣志序

蓋聞莫爲之前雖美弗彰莫爲之後雖盛弗傳是故纂玄紀要張微闡幽前之事也繼往開來發揚光大後之事也館陶爲振古名邑而志書湫修於明季清初迭經增續始稱哀備後之考風土闕文物徵節義者乃得有所取鏡焉前賢之功偉矣盛矣余以民國十九年秋來守是邦適當匪亂之餘士婦之襟淚尙濕商民之驚魂未定撫綏流亡整備團務費時數月方慶安居然因修治鄉村道路挖濬縣城濠澗建設各區電話以及實行自治法案改劃縣區成立區公所訓練鄉鎮長籌備清鄉等等要政之故對於本縣志書未暇寓目每引爲憾今幸地方少安庶政就緒思欲求縣志而讀之縣府無存焉詢之四局無存焉徵諸四鄉費幾許調查之力始於王射斗處得之噫何其僅耶設非王君爲縣中耆宿博學好古者則此一部亦恐不可得毋使一再修志之前賢難安於九原乎爰詳披閱其內容係重修於康熙十四年而紀事止於雍正十三年及光緒十九年知館陶縣事劉家善重刻而未修是在有清已有百數十年之缺略繼以

館陶縣志

序

民國肇造推翻專制改建共和開亙古未有之變局其間之興革除疆域外幾完全另成一系統况

國民政府成立制度又經一變一言重修亟當重修矣惟採訪需時編纂需材設局需費非期以歲月難望成書業與縣屬四局局長及各區區長等詳商辦法更端進行目前所急不可緩者則舊志成書已收絕跡設非速謀翻印匪惟無以彰前賢廣流傳且恐並舊日之風土文物士婦節義尙膾炙人間者亦渺乎不可聞矣吾爲此懼乃先收舊本捐廉而付諸梓非敢云示後世聊以使前賢之功不自我而墜則私衷其慰云

中華民國二十年八月

日

館陶縣政府縣長保陽盧少泉撰

公安局局長吳天錫

建設局局長王金芝

教育局局長郝寶善

財政局局長張鸞芹

第一區區長趙之濬

第二區區長王元泰

第三區區長程官雲

第四區區長沈欽文

第五區區長霍瑞雨

第六區區長韓樹棟

第七區區長么富恭

第八區區長郝介眉

館陶縣志

序

二

重刊館陶縣志序

邑之有志也猶國之有史所繫詎淺鮮哉館陶志創自前明萬歷年間至

國初一再續修燦然大備余於今年春奉檄攝篆茲土下車後搜得薛子良玉及宋子金鏡珍藏志書閱之繫是乾隆元年舊集嗣遂失修夫乾隆迄今百有餘歲矣遐想其間形勢變遷人物代謝正有多需紀載者披覽之餘慨焉興修舉之志公暇延紳耆詢商僉言代遠年湮中經兵燹莫由攷稽分存故家之舊書亦復盡嗟散佚一旦修舉恐非易易而余懷耿耿難釋然也囑各加意採訪旋即設局相待以期蒐輯成帙濟美前徽適諸生耿子明斗等以薛子宋子所藏舊志原本先行繕刻廣諸流傳爲請并問序於余余固謏陋然思此舉可繼往開來亦正聊勝於無謹綴弁言使之重付手民一仍其舊俾讀是書者撫編觸懷藉得各述見聞以爲重修地未始非感發之一助余實有厚望焉是爲序光緒十有九年歲次癸巳秋七月既望同知銜特授禹城縣調署館陶縣事金陵劉家善謂元氏撰

館陶縣志

序

三



館陶縣志序

志何昉乎自周禮職方氏辨九州之域而疆理以分後世置郡列縣於是做古列國史各輯其一方風土政教興革之事俾一人撫方夏者覽圖披冊周知海內大勢而輕重布之用以紹芳猷於遠古垂燭鑒於來茲此王者大一統之規模未可執方隅之見測矣顧志在一邑輿圖既隘廢置移易靡常昔人嘗以此爲論余謂不然自昔分并更遷之故莫不釐然可具考故欲得輿地之全蹟必先揣主一邑然後合之而郡而省以通纂一代成編則輯一邑之書者其條分縷晰之功蓋可少乎哉陶巖邑也踞舟車之衝人民蕃庶土肥而俗淳賢豪鍾生累代相映古名人勝概所在有遺趾焉顧邑乘之修創自明萬曆初年閱今已百載其間風會固殊人事亦代謝更兼鼎革兵火之餘故籍寥寥無存者嗟夫此百年中豈乏人哉乃或與寒風苦雨而俱盡不則借殘碑斷碣而同湮其僅存者蓋十之三四未逮也茲邑侯

館陶縣志

序

四

百務具舉每詢及邑志不禁慨然嗟歎久之值

聖天子統一區宇修輯天下全書

勅下郡邑令各述其志以獻屬予假憩田里公乃商予曰邑志不可以再稽非中秘之責耶予聞而滋懼念生也晚既不及受教先輩諸君子又世籍郡城邑中聞見什不能備一二且非筆削才寧克膺斯任幸有汪君儀甫蕉輯陶山攷一書廣搜旁錄殫苦心者十年典問頗詳固文獻之徵也取而細披之復衷裁於郡志以爲模楷編列大綱有十年而目詳其中首之以圖考終之以雜志體裁略備而又芟牽引之辭崇典核之要詳時事之變參固陋之議寧嚴勿濫寧簡勿雜寧闕疑以俟考稽勿輕信而恣臆說雖三代直道難以復行然去私去僞必誠必慎此寸心炯然固將寄諸千秋之下者乎至甘棠遺思守此土者多賢君子芳聲偉伐恐歷久失傳故名宦一傳殊歎寥寥落隱居自好寄跡深山與狎鹿伍者率不留顯名冰霜潔操或資志深閨中而泯沒弗彰者未必無人焉之數者或典冊之靡徵或蒐羅之難遍或仍前人之論斷而失真或採野老之傳葺

而鮮當補罅漏而續成書是所望於將來者矣斯編也托始乎汪君之哀集受成于鄭公之裁定復得諸君子精以校讎予雖幸預編摩僅贊襄之力耳後之人覽圖而興曰斯當日徵文考獻以備輶軒之采而壯

盛朝大一統之模者也其駑駘附驥共青雲而施不朽矣皆

康熙十有四年歲次乙卯中秋日翰林院編修邑人耿願魯撰并書



館陶縣志

序

五

續志序

我

國家重熙累洽久道化成

列聖相承

作述著美洪綱畢舉萬目具張其遵道路而同風俗者固合千萬世而斂時錫福也雍正五年歲在丁未

詔脩直省通志以昭

同文之盛于是畿甸侯衛罔不率俾共事搜羅以襄盛軌時館陶邑宰涇川趙君知希賢達士也哀集舊聞益以新緒爲續乘凡一十二卷上之郡守嘉魚金公啓洛潤色成書乃未謀剞劂而相繼芟舍是稿遂什襲於諸生李子志杜之手乙卯秋余自堂陽來攝館篆披閱舊志慨其殘缺銳意脩舉而竊未逮也適得趙君續志于李生之篋遂付諸梨棗而爲之序曰凡邑之有志山川人物風氣之盛衰相因而見也土宇版章戶口

館陶縣志

序

六

之登耗隨世而易也此其大者其他踵事增華姑不具論然盛衰數也而實因乎人登耗人也而實關乎數不爲之剖晰著明無貴乎載筆者矣館陶爲晉趙東鄙自秦縣以來向稱名邑再成之邱不足以當名山之限然而大河遷徙自潞礫以北陶實當其衝前瓠子而興歌後宣房而兆役陶之爲陶蓋亦昏墊相乘矣今者洪濤南去無復汎濫之憂漳衛交流不煩推輓之力

廟堂之碩畫

君相之其咨不知幾費經營而後獲此安瀾之慶也故曰數也而實因乎人也陶賦舊甲澶洛自元明始改隸東清世廟以前和鈞關石代無成令萬曆末年定爲條編之額賦爲中上我

世祖章皇帝入關定鼎新政反商而惟正之供厥惟由舊陶之地不改闢也陶之民不改聚也而榆園蹂躪之餘丹漳橫溢浸灌幾二十年昔之膏壤變爲磽瘠司牧者歲必取盈去鄉者積重難返撫字心勞催科政拙不得已而調停輕重設爲包荒之法其初爲權

宜之計以廣招徠而不知遲之又久竟成厲民之政也今

聖天子勤求民莫湛恩汪濊與日俱深減稅蠲租不以墨守成法爲最治故凡豁除民病之請朝奏而夕

報可今爲陶計履畝而征之仍其舊則無沾蓋於不毛之土無吹索于來復之民乘時利濟善推所爲斯則今日之急務也故曰人也而實關於數也蓋天地之氣化必有待於參贊之聖人而補救之事功必遠勝于創垂之成法其理固然則人與數之交著其功者也趙君之績是志也知之而未嘗言之毋將曰自有能言之者余之叙是志也言之而未嘗行之毋將曰自有能行之者今而知

綸綍之所旁求輿輶軒之所採擇固卽陳詩納賈之意豈徒侈

一統之盛而畢三長之能事也哉是爲序

龍飛乾隆元年歲次柔兆執徐端月之吉

覃恩誥授承德郎通判加一級管堂邑縣兼攝館陶縣事甬上張興宗肯堂氏撰

館陶縣志

序

七



重修館陶縣志序

陶志成屬余爲序余素不敏然承乏茲土奉教于先生長者有年敢遜謝以負盛舉夫邑之有志猶國之有史也先正謂史有才學識三長余謂三長而不本之以誠文雖工無足尙也矧一邑之山川風土人物政蹟至今日而始表章論定焉皆先有感召于志氣之微而折衷于性情之正斯其成也非偶然而傳也爲不朽昔我聖夫子作春秋如無意爲文者然後世之奇才博學絕識舉莫能出其範圍良由至誠所結天日爲昭故褒貶見忠厚之心君父寓規切之意紀載紕傳聞之疑名爲一國之志實則天下之史此游夏之徒所莫能贊一詞與陶志闕有閒矣

國朝鼎興曲沃 衛師相首以通志建議

聖明嘉納博采精軒爲一代告成書於是 太史耿老先生毅然以邑志爲己任取數十

世殘落不可句之遺文修飾而潤色之夫太史固所稱志在春秋而才學識兼長者也筆削所寄事必貞珉言盡藥石惟其誠也更縷列文詞井井皆可師法後之君子讀其

館陶縣志

序

八

書想見其人奚必摭逸章於故府蒐瑰議於前編而後可昭法戒示來茲哉是役也哀集軼事以備參訂者汪子儀甫耿子寓仙董子尊素賞奇析疑共勦厥成者別駕文還樸比部耿百泉孝廉鄒尊魯中翰高煥宸余也簿書鞅掌之暇得從梓人問津焉繼自今惟頌隰桑之四章以誌弗諠焉耳肯

康熙十四年乙卯仲秋月知館陶縣 楚潛鄭先民撰



館陶縣志卷之一

圖考

陶古名邑自戰國時趙置館于陶丘館陶蓋於此
 得名其地枕陶山襟衛水處齊魯西偏為
 燕京通衢形勝甲諸邑舊有圖經畫其城郭山川鄉
 鄙之狀俾披覽者因地設險以域吾民以是知周
 禮設職方掌圖籍之意深且遠矣茲依故式重繪
 圖如左

館陶縣誌


卷之一 圖考

一

館陶縣境圖


西抵丘縣界二十五里

南抵冠縣



北抵臨清

界 五 十 二 里




界 五 十 二 里

館陶縣誌

東 抵 堂 邑 界 二 十 里
卷 之 一 圖 考

館陶縣全圖



例圖

○	縣界
□	自治區界
○	市鎮
○	區公所
○	鄉村
○	大路
○	電車路
○	電線
○	有民團村莊
○	有學村莊
○	學區界
○	市集村莊


廣濟社




廣濟社



廣濟社



廣濟社
廣濟社
廣濟社



廣濟社
廣濟社




廣濟社
廣濟社


館陶縣志

卷之一 圖考

三



正



廣濟社

正




廣濟社



廣濟社



廣濟社



館陶縣志

卷之一圖考

四

署

廳

大廳

中明亭

六房

六房

愛忠

堂

崇


衙南

衙西

衙東

儀門


館陶縣學宮圖




館陶縣誌

卷之一 圖考

五






此圖出鄭康成以
春秋十二國分配
十二次舊志是之
遂以館陶為大梁
畢昴胃分今考定
在室壁間

館陶縣志

卷之一

六

分星圖



此圖不指定九州
分配今按職方氏
所言九州東西南
北自有定界觀地
界之所抵知星上
之所辨館陶為冀
州之地則館陶之
分星即此圖亦可
攷見其畧矣

凡例 八則

一志書體裁悉遵一統志山東通志供採輯也綱目率以府志爲標準稍加通變者
事有輕重詳略耳

一每篇綱目之下舊志各有小序茲特於綱下各弁數語其諸目中事類不盡者參
古酌今稍參末論不敢妄牽蔓引以縱臆談

一名宦人物皆載其已達者至見任見存惟直述履歷雖聲稱藉藉不得遽書一以
俟論定一以遠私嫌此作志成規也不敢阿私變制

一秩官選舉姓名事蹟及一切建置增修年次強半失考百年之間缺漏多矣文獻
久乏無憑細核以成全覽洵爲憾事

一節義風化攸關舊者難爲搜輯新者恐多附會今未敢濫列聊以信心云

一賦役雜逕其增減裁復之數屢更靡常謹核其見行者殊多未詳

一藝文詩篇舊志頗雜茲刪存其正者以示法則

館陶縣志

卷之一 凡例

一

一是書編次功僅旬月荒略疎漏在所不免敬俟後之博物君子擴而成之以蔚大
觀

館陶縣志目錄

卷之一

圖考

卷之二

輿圖志

沿革 分野 疆域 山川 風俗 御迹 封爵 古蹟 陵墓 物產

卷之三

建置志

城池 官署 倉廠 舖舍 津梁 隄防 坊表 鄉圖

卷之四

職官志

縣令 縣丞 主簿 典史 教諭 訓導

館陶縣志 卷之一 目錄

二

卷之五

選舉志

薦辟 進士 鄉舉 歲貢附恩拔 例貢附例監 武科 貤封 恩蔭

卷之六

賦役志

田賦 戶口 鹽課驛政附

卷之七

學校志

卷之八

祀典志

壇壝 祠廟

卷之九

名宦志

卷之十

人物志

孝義節烈附

卷之十一

藝文志

文類 詩類

卷之十二

雜志

寺宇 災祥 兵警 採異

館陶縣志

卷之一 目錄

三

舊志序

明知縣李冲奎撰

東昌府在東藩號稱劇郡而館陶隸之則爲鉅邑歲癸酉余以公除來牧茲邑入其境問厥誌咸曰無焉時深惜之而未遑也及今三載年穀順成而政務簡息迺得究心於是遂以屬學翰銓齋趙君一泉劉君晴川江君以領之開局於季冬而竣編於歲首余得總其成焉復就正於鄉大夫方伯春林武公咸有所評驚乃付之梓人叙曰誌豈易言哉仰以觀於星文俯以察於井牧中以浹於人事旁以麗於物情加筆削於成書而示從違於實錄一時成之百世傳之一人作之萬人信之化理關焉是誌之繫也豈易言哉道從世變人懷已私務博者失實矜能者尙辭鬪靡者附嘖喜誕者詭言四弊生而誌日病矣他如列國之語藻思幽詞出於賢哲之手後世君子猶或非之况其次乎是邑也僻在一隅會於兩畿然邇孔孟之鄉聞詩禮仁義之教流風餘韻世漸人摩迄用有成迨我明興兩祖之所覆育列聖之所陶成以至今日二百年於茲矣追琢成章鳶魚率性化行而俗美長德而幼造民安而物阜誌不容以一日無也凡爲帙有四援

館陶縣志

卷之一 舊志序

四

其舊典廣以新聞稽之僉言附以獨見誌土俗則世運之升降見焉誌賦役則民生之豐耗見焉誌食貨則物貢之多寡見焉誌職官則政教之隆汙見焉誌科貢則人文之顯晦見焉以至沿革創廢之微災祥藝文之末莫不網凡而備載之歷歷然如指諸掌百世之下具可讀乎繼自今典教於是者因材質之宜爲啓迪之術可以作人矣司牧於是者肆剛柔之習達寬猛之方可以立政矣觀風於是者聽淳疵之音盡節宣之道可以貢俗矣卽其已具而校讎之非徒備一方之文獻已耳則是誌之成也豈徒然哉若夫節烈之舉藐焉寡儔非故抑之也與其溢美而無徵寧闕如也秉彝好德人心所同表揚風教礪世之典則有後之君子在又何亟焉梓完題其首日館陶新誌與摭搃之勞者凡十有二人因並列人左云

修志姓氏

知館陶縣事楚潛鄭先民增修

儒學訓導濱州王中興全修

翰林院編修邑人耿願魯編次

貢生邑人汪鳳翔輯述

內閣中書舍人邑人高重光

候選通判邑人文運隆

舉人邑人鄒魯校正

主簿山陰王詔

典史南昌萬國讓督刻

生員半維嶽
公文掠

姚純

五

館陶縣志 卷之一 姓氏

耿願良

耿願愚

文蔚

李景

冀諾

秦奇英全訂
侯良屏

續修姓氏

知館陶縣事涇川趙知希

署館陶縣事黔南曹 纘

署館陶縣事甬上張興宗增修

儒學教諭大野呂心佐

教 諭不夜于光祖

訓 導 孫 銓全修

主 簿 楊山立

典 史 黃世爵

舉 人 耿賢舉

姚班

貢 生 王 珏

館陶縣志 卷之一 續姓氏

六

王大光

李 溥

州 同 徐 璉

李志杜

監 生 高 枚

李志棟

汪之佐

李志梓

生 員 劉廷瓚

卜釋孔

寇公栢

李志朴

李志樞

王永光

汪道炘

李志東

王溥光

李志本

宋效濂

王珍

鄭杜

劉廷瑞

李志楠

鄭柱

館陶縣志

卷之一

續姓氏

七

卜友

秦之璽

孫宅揆

秦謙全編校

重刊姓氏

知館陶縣事金陵劉家善

儒學教諭平陽王學益

署訓導平陵 趙燦廷

廩 生 耿明斗 校對

劉士林 校對

翟蘭彬 校對

增 生 史元英 校對

歲貢候選訓導樊金太

廩 生 胡化南

趙燦輝

熊廷獻

館陶縣志 卷之一 姓氏

八

冑清臣

宋金鏡

增 生 趙樹毅

馬維驤

張召棠

梁肇敏

民國二十年重刊館陶縣志街名

縣長 盧少泉

秘書 邢長春

第一科長 單慶霖

第二科長 朱紹韓

公安局局長 吳天錫

建設局局長 王金芝

教育局局長 郝寶善

財政局局長 張鸞芹

第一區區長 趙之濬

第二區區長 王元泰

第三區區長 程官雲

九

館陶縣志 卷之一 街名

第四區區長 沈欽文

第五區區長 霍瑞雨

第六區區長 韓樹棟

第七區區長 么富恭


第八區區長 郝介眉

商會會長 張拱辰
張冠甲

縣黨部常務委員 李德全

縣法院審判官 仇立鼎

縣法院檢察官 黃敦漢



館陶縣志卷之二

輿圖志

沿革 分野 疆域 山川 風俗 御迹 封爵 古蹟 陵墓 物產

封建廢而郡縣興屬在一邑亦有疆理之別昭封守也陶 自秦漢以來割隸分置隨世代為變易雖厥名不同而星野攸分山川瞭然得無一一如指掌與民漸康叔之澤淳龐其天性格頗稱茂前代勝迹遺聞俱可按籍而稽土宜亦足克上供培養之法所宜講焉志輿圖

沿革

館陶古冀州地春秋時晉冠氏邑後屬趙西北七里有陶 趙置館於其側因名館陶秦屬東郡兩漢屬魏郡武帝元光中河決館陶明帝時以其地為館陶公主食邑魏晉屬陽年郡後趙徙陽平郡治於此隋開皇初廢郡誤以屯氏河為毛氏置毛州後復廢為堂邑 博平 冠氏 臨清大業初州廢北徙四十里建今治為縣屬武陽郡唐初復置毛州後復廢為縣屬魏州大 中改名永濟尋復置館陶縣天寶初屬魏州魏郡宋建隆四年復置永濟渠于館陶熙寧五年省永濟為鎮入焉尋復屬大名府金因之元屬濮州明改屬東昌府弘治二年陞臨清為州割屬臨清編戶二十七里

館陶縣志

卷之二 輿圖

一

國朝仍舊

續輿圖

陶山在縣西南五十里府志云故老相傳在館陶鎮西南七十里許微有土阜輿圖志館陶古冀州地春秋時晉冠氏邑後屬趙西北七里有陶邱趙置館於其側因名館陶各志所載方隅里數參差互異獨大名一統志云在館陶縣之西南五十里館陶鎮之西北七里與諸說較合而府志云七十里者當是七里十字或誤也康熙辛酉前令郎公奉檄詳覈親歷邑西南查訪無踪為陶山記以續縣志極言其誤今將其記附後至陶邱載於各志戰國已名館陶歷世久遠陵谷滄桑事固有之正不得以一時之意見指歷代傳信之書為烏有也

陶山記

知縣郎國楨

史載以館陶食主者凡三或曰以奧區故也然則何以名館陶則曰邑西南五十里有陶山趙主下降時曾立館於此故以命名夫此地既東望岱岳西隣太行意所謂陶山者必其蔥鬱標奇高華挺秀與東西相鼎峙始足以來翠華之蹕駐鸞鳳之驂不知其果作何狀也余彼時固已有一陶山者在吾意中而時會難值徒付之神遊已耳辛酉歲余適授館陶令既幸其途之近而又快陶山相值之奇馬首一南結成佳境而所謂陶山者則恍在目前矣既受事亟索誌觀之則陶山實志山川之首又譜爲八境之一曰陶山夕照而當時賢令與縉紳先生迭相侶和有干林歸鳥下半壁彩霞生之句豈止寫盡夕照情事而山之幽閑多致隱然言外至是而陶山已躍躍欲出吾筆端紙上蓋几案間所見無非陶山也者藉使山靈相妬不假我緣終不得一與登眺之樂猶將謂詡自號於人曰吾從陶山來矣所聞如是所見如是使聽之者咸作是想何者蘊之久信之真直吐吾意中統撰之奇而不復作意外之觀也居無何朝廷修一統志稔舊志之失實也撫軍分命監司偕郡倅尺寸而親歷徧記之郡倅乃預令長吏先驅詳覈

館陶縣志

卷之二 續輿圖

二

以聞正慙余之素志遂首事乎西南每遇士人急問曰若所謂陶山者何在乎曰無所謂陶山也若非邑西南五十里許地乎曰然抑或有邱阜如山形者乎則是者乎即不然亦或有堤岸培塿隱起者乎則均曰無有也果一望盡平衍耳余歸而爽然自失者累日太史公曰儒者載籍極博必考信於六藝詩書之文可考而知書不云乎禹道沈水爲濟入於河溢爲榮東出於陶邱北邱非山之謂乎禹貢一書山川畢備大聖人身歷而手訂之分疆別域山爲之鎮水爲之榮周官職方因之高下至今井井豈獨於陶邱而失真不可解也孟子曰盡信書則不如無書予竊怪後之人生於斯久於斯豈不知探奇索勝而顧以訛傳訛登之縣志矢爲詩詞自誤以誤後人尤不可解也向非一統志之修則監司郡貳何由而至令何因而履勘余復何因証誤而陶山不幾復傳信於志首哉然余則終不能釋於懷也意者高岸爲谷深谷爲陵山海滄桑自古有之後之學者其力薄其識卑樂於志祥憚於志怪無以俟後人之考究而傳此疑耳不然禹貢之書豈欺我哉

是辨陶之無山似矣東郡西南壤接直隸豫章平行數千里其地勢然也非獨一陶而舊志載陶山在縣西南五十里府志亦載在館陶鎮西南七里又鑿鑿言之者何居度所謂陶山者不過於平行中稍有巋然之勢而名奚必以東望秦岱西隣太行竟以東西鼎峙之局橫於胸中也哉余自抵任之二年邑民首報沙壓地畝一案清丈四境見縣自南抵東北有堤旋繞俗呼曰長城堤又曰汰黃堤卽今志所載金堤是也南踰元城北赴臨清其首尾所經莫得而悉堤外卽黃河舊身雖皆淤爲平地而隱躍之間其勢大抵於堤相環抱則是堤之呼爲汰黃焉傳信矣堤外沿河之地卽里民所首沙壓者也詢其由咸稱河底荒沙每年乘春風盛起時滾入民間地內於康熙五十八九數年間尤甚自東北薛店以抵西南之張沙鎮中間馬固李菜一帶尤爲回風聚沙之地莊房被壓者莫可尋其基址間有樓房之僅存者沙積或沒其巔逶迤十數里高低起伏邱壑微具焉直接張沙林木蔚秀儼然有崇岡峭壁之觀至問其積沙之由張沙之館陶縣志

卷之二 續輿圖

里民則不記其歲年矣嗟乎張沙爲黃河入境之首所謂陶山者其或在此耶禹貢道沈水東流爲濟入於河溢爲滎東出於陶邱北則知陶之以邱名也又以知河之與陶邱當相依也今由河以尋所爲陶山者其斷在是無疑夫張沙在縣正南五十里舊志載陶山在縣西南五十里府志亦載在館陶鎮之西南七里今攷張沙當在館陶鎮之東南七里方向稍訛謬不啻千里無怪乎邱公於平地求山不得嘖嘖嘆惜於古人紀載之不實而說者又以爲陶山在定陶而不在館陶均之過矣漢武帝元光中河決館陶成帝時復決是山原不過沙積凝結而成河水順決自不如龍門之勢鑿也顧安知未決之先不更有高於是者耶且今日之谷漸有爲陵之勢又安知昔日之陵不爲谷也吾懼後日循名責實不得者遽疑古人之或有虛名夫古人則斷無是矣

館陶縣沿革表

歷朝

封域

叙郡

叙縣

唐虞三代

冀州

春秋

晉

戰國

齊之西界屬魏

館陶

秦

東郡

漢

冀州部

魏郡

館陶

東漢

俱同

晉

司州部

陽平郡

館陶

南宋

兗州部

陽平郡

同

北魏

司州部

陽平郡

同

隋

兗州部

武陽郡

同

館陶縣志

卷之二 沿革

四

唐

河北道

魏州魏郡

改永濟復置館陶

宋

河北東路

大名府

館陶

金

大名府路

大名府

同

元

山東東西道濮州

同

明

山東等處布政使司東昌府

館陶縣

國朝大清

山東等處布政使司東昌府

館陶縣

按一統志東昌禹貢兗州之域郡舊志兼兗冀二州而館陶屬冀今考館陶為齊趙衛魏之交當屬冀之東界宜以郡志為據縣舊志稱為夏觀扈之國考其地在觀邑非陶區也秦漢後屬東郡魏郡割隸不常逮隋置毛州領屬縣規模寢弘闢矣自廢州為縣唐分隸魏州宋屬大名實為北沿邊地後舉鼎南徙版圖日蹙河以北悉屬金有元併之明初分隸東昌疆宇劃然又衛河一線引淇洹之水運中州漕粟以達燕京形勢益雄視諸邑其地平坦曠衍無險阻可憑依惟逼近臨清據南北咽喉頗

綱要書

國朝大名增置總督屬東西孔道輪蹄不絕旋復裁去今簡僻如故矣

分野

清類天文志室壁在亥自危十三度至奎一度屬衛分河北今開封白馬大名澶懷衛相濮皆其地

唐天文志營室東壁娶訾也自王屋大行而東得漢河內至北紀之東隅北負漳鄴東及館陶聊城又自河濟之交涉滎波濱濟水而東得東郡之地古邾鄘衛凡胙邗雍共微觀南燕昆吾豕韋之國自間道王良至東壁在豕韋爲上流當河內及鄆鄴之南得山河之會爲離宮又循河濟而東接玄枵爲營室之分輿地考曰營室衛分野今靈昌濮陽之西北境博平之西南境皆是

按一統志東昌天文危室分野考史記營室東壁分野在東郡魏郡文獻通考營室東壁衛分野兼得齊宋趙魏之交唐天文志所載營室東壁得河內東及館陶尤爲

館陶縣志

卷之二 分野

五

明確洪邁云衛受封河內後徙楚丘河內本冀州所部其分邑皆在東郡故通志因之曰室壁在亥衛分野爲東昌濮范臨清館陶等州邑今據諸書斷之館陶屬室壁分野無疑矣舊志及臨清縣志俱稱屬昂畢趙分野陶非其地又晉天文志云營室東壁衛屬并州其地多在西北與今疆域不合又云柳七星張周三輔分野河東入張一度河內入張九度益參錯不足據總之天象渺茫郡國廢置名殊欲執一邑分域強合纏次之度如符節然難矣易曰觀乎天文以察時變周禮保章氏辨土觀星以察妖祥蓋聖君之所以修倣而設教也豈其微哉

疆域 里至附

東西廣六十里

南北袤七十五里

東至堂邑縣夫人村四十里

南至冠縣新莊村二十里

西至 縣成兒寨二十五里

北至臨清州尖塚集二十五里

東南至 縣萬善集十八里

西南至元城縣火兒寨六十五里

西北至臨清回回墓二十五里

東北至臨清段家屯四十五里

東至堂邑縣治八十里

南至冠縣治四十里

西至丘縣治四十里

北至威縣治九十里

東南至莘縣治一百二十里

西南至元城縣治一百里

館陶縣志

卷之二 疆域

六

西北至曲周縣治九十里

東北至臨清州治七十里

東南距東昌府治一百二十里

東距山東布政使司二百八十里

北距

京師九百里

山川

陶山 在縣西南五十里禹貢道沅水東流爲濟入于河溢爲榮東至于陶 北卽此

玉山 卽玉山館今無攷

金雞山 在縣南五十里平村其地高阜崎嶇有山麓之狀明洪武辛未春夜耕者見

羣鷄呼鳴於上初不疑後以鞭擊皆化爲火光飛去惟一火隨鞭墜地成一金鷄嗣

後夜屢見援弓射之其光遂滅曉視悉爲鷄跡因名其地曰金鷄山

攷孫文義生於其鄉洪武辛未文義登進士第一人以為文明之兆云

黃河 漢武帝元光中河決館陶成帝時復決館陶即此今河絕故道存焉在縣西南西河寨西

衛河 在縣西二里源出輝縣百門泉弘淇洹二流逕縣至臨清與汶水合為今漕渠北入海隋疏為永濟渠其征高麗因御樓船過此又名御河

漳河 在縣南五十里源出山西長子縣曰濁漳出樂平縣沽嶺曰清漳俱東經河南臨漳縣一北流入滹沱河一東流至館陶入衛河明萬 初漳河北徙由武安肥鄉入曲周滏陽河

屯氏河 按水經大河故瀆北出為屯氏河逕縣東別河又東北逕武城故城南別瀆又東北逕清河故城西北逕靈縣北又東北逕邳縣與鳴犢河合漢永光五年河決清河靈鳴犢口而屯氏河絕

篤馬河 在縣東南十五里

館陶縣志

卷之二 山川

七

王莽河 在縣西南六十里遷隄邨之南自元城縣黃金隄包兒頭迤邐北至盤隄盤隄至孫店以及爐里爐里至徐家 入衛河

攷王莽曾祖賀為大名名宦卜居元城賀以下塚墓俱在元城此河想為莽濬故以莽名又初始三年河決魏郡汎清河以東數郡先是莽恐河決為塚墓害及決東去元城不憂水遂不隄塞河為莽濬無疑

檜郡屬無山不過高岡長嶺培塿隱起似山形總無片石層巖出平地數十丈者不惟陶一邑也黃河故道在縣西南廣闊數里與廣平相接居漳衛西昔魏史起鑿十二渠引漳水以灌斥鹵之田而河內饒唐塞之往者漳水突發挾衛流洶湧而來陶邑屢受其害自徙滏陽患始息焉今中州糧艘由衛達汶頗受漕之利獨是河流衝決隄岸坍塌所在時有司水衡者因時設防隨地興利民其不魚矣乎諸舊河跡僅存者載以備覽

續山川

雍正三年六月戶部尙書蔣公廷錫爲漕運全資水利條列五事內云

一分漳資衛之故道似可復也查衛水出輝之西門其泉甚細雖東引淇陽洹之水而三水亦皆微弱故河南漕艘至衛輝水次受兌至於館陶每苦淺阻又北九十里至臨清與會通河合諸閘正皆封閉蓄水以待南漕其流入衛者不過於南漕放閘時順下分寸之間耳其自臨清至青縣仍僅衛水一流供運也考元河渠諸書云衛水至山東館陶開漳水合焉北與會通河合北歷德滄諸州至青縣合滹沱河北達天津會白河入海故衛河之流勢常充盛運道無淺澁之阻今自青縣以北猶是昔時故迹而漳水北徙蓋在明萬曆時先是永樂中漳水入衛之道湮塞宣德八年御史林廷舉按元時舊迹於廣平縣大留村鑿通故道置閘遏水轉入於衛嗣後衛水增漕舟便利至萬曆二十八年漳滏漚流而北入衛之道遂廢給事中王德宅上言衛水昔抑漳水今漳則細緩不能攝捲泥沙宜塞高家口漳水合滏之道導漳入小民河以達於衛費少利多

館陶縣志

卷之二 續山川

八

實爲上策時議不果行自此與衛分而爲二矣夫衛水自輝縣至大名有淇陽洹三流之資豫漕雖難免盤剝之費幸道里尙近自大名以至青縣六百餘里若得漳水以廣其流誠七省漕運之大利也臣常攷地圖今廣平縣之南至冠縣之西有地溝一道約長五十餘里俗所稱古屯氏河也每漳水盛長之年常有漫水溢入通流於衛是宣德時林廷舉所開之古迹今若於此處施工因淺加深因狹加寬開引漳水之口導入衛之流所費諒不甚巨而可復先時引漳濟衛之利但漳大衛小恐有泛溢之虞宜於所開之河多置閘座衛水盛則閉閘約漳北趨衛水弱則開閘引漳濟衛似於衛河運道甚有裨益條奏上於是年之八月奉

旨差內閣學士何公國琮等八位大人查勘

愚按明萬曆二十八年漳河北徙由魏縣入曲周滏陽而館陶之流絕至康熙三十七年漳水分注間從館陶出口與衛河合流或仍流曲周而入滏陽忽來忽去竟無定軌及康熙四十七八年間漳水之北道淤塞而全漳之水復由故道卽今館陶縣

境西南五十里漳神廟南之漳河口是也蔣公摺內分漳資衛一條云考地圖今廣平縣之南至冠縣之西約長五十餘里俗所稱古屯氏河卽於此處施工濬鑿可復先時引漳入衛之利等語今訪士人云康熙四十七八年後全漳復循故道現在通流細看河境卽在廣平之南冠縣之西蓋蔣公但據舊籍所載漳河北徙合滏而云然也康熙三十七年漳漸返故道康熙四十七八年全漳水復由故道之由未經載有典籍公無得而知之總之

聖朝聲靈所及河伯效順前之名賢屢經設法而未有成功今自然復故實爲瑞徵云○又按河南漕艘之阻滯阻於衛未合漳之上流而非在館陶已經合漳之下流也考舊日豫糧受兌原在衛陶之窩頭鎮後漸移至上流之小灘鎮又移至衛輝府此當事以受兌之便而屢移阻滯或遂不能免耳○又按漳河南徙於康熙四十二年五十年六十一年間爲災爲甚懷襄之勢居然水國矣今則其勢少馴每逢天雨連綿亦間有泛溢之憂但漳水性渾濁與黃河無異隨挖隨淤且其中衝澗無定難施

館陶縣志

卷之二

續山川

九

疏鑿之功至設立閘座啓閉恐一淤又復他道矣且漳水南徙民憂漳水之淹而亦甚德漳水之淤蓋漳水所過薄地盡膏其爲利亦復甚普也○館陶河渠考誌書并諸家所載合之見聞俱不相符嗣容細查確訪另撰一卷奉覽

曹公堤

雍正八年河決宋家莊淹沒田禾無數至雍正十年知縣曹纘躬督鄉夫增堤三百六十丈底三丈面一丈月餘工峻莫不感德

風俗

人好儒學性質直懷義有古之風烈

隋書

俗近敦厚家知禮遜習俗節儉人多讀書士風彬彬賢良宏博

一統志

士習詩書尚禮義民朴實無浮華

通志

家習儒業人以文鳴農桑務本戶口殷富

府志

歲時正月元日鷄初鳴燃燈燭作供禮天地懸先人之像拜之已乃坐家長堂上子孫叩首及明姻友盛服謁來相慶稍疎止投名刺 上元有燈士女夜遊二月十九日大士聖誕設醮或梨園演雜劇 清明架秋千祭掃 隴 三月念八日東嶽拜誕 四月八日菩提浴佛 端午簪榴插艾作百索角黍爲雄黃菖蒲飲 十三日慶賀關帝聖誕 七月望日謁墓 中秋爲月餅祭月 重陽爲菊糕饋女婦 十月朔又謁墓剪褚爲寒衣焚之 臘日雜炊七寶五穀謂之臘八粥二十四夜祠竈 除日陽春帖桃符神

館陶縣志

卷之二 風俗 御迹

十

御迹

漢文帝女竇后所生文帝卽位爲館陶長公主堂邑侯陳午尙之

宣帝女爲館陶公主愛姬華僖仔所生名施施于定國子永尙之

光武第三女爲館陶公主名紅福適韓光明帝時爲子求郎帝不許賜錢千萬謂羣臣曰郎官上應列宿出宰百里苟非其人民受其殃是以難之

隋大業七年春二月煬帝御龍舟渡河永濟渠夏四月至臨朔宮徵天下兵會涿擊高麗

唐高祖第十七女爲館陶公主適崔宣慶高祖崩葬獻陵詔子孫願陪葬者許之公主與焉

明建文元年十一月成祖靖難兵至臨清移屯館陶十二月至東昌平燕將軍盛庸麾兵圍數里成祖易服躍馬潰圍出退駐館陶

封爵

漢館陶王宣帝愛姬華婕妤所生子封於此

晉館陶王當愨莊王之子封於此

北魏王榮世本縣人以功進爵爲伯 見人物

唐郭震以功封館陶男進封代國公

攷震字元振貴鄉人封館陶男食邑三百戶震少有大志十六與薛稷趙彥昭同爲太學生家嘗送資錢四十萬會有衰服者叩門自言五世未葬願假以治喪元振悉與之不問名氏稷等嘆服十八舉進士爲通泉尉任俠使氣不拘小節武后詔與語奇之索所爲文章上寶劍篇后覽嘉嘆西兵寇涼州拜震爲涼州都督自是州無患又開屯田水陸之利稻收豐衍牛羊被野河西諸郡立祠頌德神龍中遷安西大都護進太僕卿將行安西號泣相留玉去涼州猶八百里城中爭以壺漿歡迎則天二年以兵部尙書門下三品誅太平公主有功進封代國公復爲朔方大總管未行會講武驪山帝親之震遽奏止帝怒將斬之劉幽求張說諫止流新州起爲饒州司馬道病卒東萊先生云諒乎元振功顯節完一跌未復世恨其蚤歿云

館陶縣志

卷之二

封爵 古蹟

十一

古蹟

平臺 漢舊城名在縣西界或云春秋魯敗赤狄于

曲梁卽此

青陽城 在縣西十里漢馮異追銅馬賊于此

攷青陽 無城在馬頭渡正西八里

黃花臺 在縣西南二十里衛河西澚漢明帝妹封爲館陶公主築臺於此址湮未久

駙馬渡 在縣西南四十里因漢駙馬過此而名今猶爲渡口

毛州城 卽舊南館陶在縣西南四十里隨置大業初廢屬武陽郡週圍八里遺址尙

存

蕭城 在縣東南五里宋景德元年遼主殂蕭后攝國事率其弟撻覽侵澶淵築城於此卽歇馬城時寇準請帝幸澶淵撻覽方布陣城上遣牀子弩射殺之遼人大挫衄

請盟而退壘址尙存城週圍十餘里高三丈四門俱存內有二將臺士人名曰新城
又古城

孝子臺 在縣西南五里縣民張永修築

透靈碑 相傳在縣治十字街今無攷

李丞舊居 見唐皇甫冉詩今無攷

松滋監 在縣東北大章保見霍爾赤傳或誤爲彭祖店

無縫井 在縣治西街北磚筒砌成未詳斃于何人

育英泉 在儒學西南隅元大德初縣尹溫仲謙鑿味極甘美

嘉禾堂 元溫仲謙置大德六年仲謙爲館陶尹化民以德嘗行農畝間有一莖六穗

之異遂立嘉禾堂有碑記在尖塚鎮前清泉驛卽其地今久廢

八栢亭 明知縣脚琚以後堂舊有八栢約高二丈故名

漏澤園 在城北四十步明成化十七年山東布政使邢移劄屬邑各設此園以恤貧

館陶縣志

卷之二 古蹟

十一

死無葬地者知縣王和建工部主事繆昌有記

義塚 一在城南三十步一在城東百步外一在城北十五里烟店原置俱無考一在

尖塚西河岸王宗仁置

附八景

陶山夕照 見山川晚照有佳致故取之

東嶽晴雲 城東門映泰岱烟雲綠繞亦杜子美詩齊魯青未了之義

駙馬古渡 見建置

黃花故臺 見前

衛河秋漲 見山川每歲秋霖泛溢河深可數丈星樓客舫風帆如駛漕艘動以數

蕭城曉煙 見前卽歇馬城也今舊跡雖存遊其地者但見頽垣殘月古樹悲風令

古井甘泉 卽無縫井見前

長隄春色 舊有透靈遺碑鄭君易以此

陵墓

戰國段干木墓 在城北十里

攷段干木魏人居山西芮城墓在安邑段村今館陶有墓不知何據

國朝順治丁酉教諭閻應震于城北里許立段干木墓碑康熙七年知縣鄭先民新構一亭刻石顏其上曰清風高節聯其旁曰直今傳有塚在昔未稱臣與前任明府程君墓俱于寒食重九親致祭焉

唐段道超墓 干木裔孫詳見藝文

郭公姬薛氏墓 陳子昂為作墓志銘今無攷

金張元帥墓 在邑境內公名弼詳見藝文

元劉君墓 在城西二十里教授趙從善有記

段萬戶墓 在城西八里青陽城西公名伯豫父暹行軍千戶濮州太守伯豫昭勇大將軍管軍萬戶鎮守杭州路又超宗士禎俱為將軍

館陶縣志

卷之二 陵墓

十三

王萬戶墓 在城北十里二墓俱無攷

耿公墓 在城西南五十里拐渠邨公名從周生元之中葉至明初子孫多遷居郡城世以科第顯綿延至今三百餘年號為望族

郭公墓 在城南麻呼寨公諱良祥見墓志

物產

穀之品

黍 稷 粟 菽 麥 粳麥 藟 秫 糜子 蕎麥 黑豆 黃豆 白豆 菜豆
豌豆 豇豆 青豆 扁豆 羊角豆 龍爪豆 芝蔴 紅小豆 薏苡 稻
胡蔴

木之品

楊柳 白楊 青楊 桑 柘 榆 槐 松 栢 楮 椿 椒 桐 三春柳
楸 櫻

果之品

桃李 石榴 梨 柿 杏 櫻桃 木瓜 林檎 核桃 葡萄 無花果 花
紅 蘋果 文官果 棗 秋子 柰子 榘 梅子

蔬之品

薯蕷 菘 豐 椿芽 豆芽 莧 蒼蘆 蒿苳 蘿蔔 韭 葱 薤 大蒜
芫荽 生菜 芥波菜 苘蒿 甘盧 白花 柴花 香芋 芹 茄 西瓜 王
瓜 甜瓜 苦瓜 南瓜 葉葉瓜 絲瓜 冬瓜 葫蘆 瓠子 民瓜 脆瓜
金瓜

花之品

牡丹 芍藥 鷄冠 木香 夜合 粉團 罌子粟 石竹 棣棠 海棠 玉蘭
荷 萱草 蜀葵 玉蝴蝶 榴 碧桃 絳桃 山丹 紫蝴蝶 梅 紫薇 小
桃紅 丁香 秋海棠 鴈來紅 金盞 長春 珍珠 玉簪 黃蜀葵花 金絲

館陶縣志

卷之二 物產

十四

桃 紫荊 金雀 薔薇 十姊妹 玫瑰 菊 茶蘖 結香 金錢 凌霄 月
季 淡竹 剪秋羅 茨菰 木槿 雙鸞菊 虎茨 旋覆 藍菊 纏枝牡丹
梔子 臧金蓮 桂花 瑞香 寶珠茶 水仙 茉莉 蘭

芍藥亦自近地
移栽者居多

蘭桂諸種俱自南土來
者亦非本地所產牡丹

草之品

節節草 稗 箭稗 莎草 茅草 白蘋 白草 蔓草 張綿草 星星草 虎
鬚草 馬蘭莠 蒼耳 小蘭 茜艾 紅蓼 苔 蘚 蒿 浮萍

藥之品

葶藶 草蒿 牽牛子 葶麻子 蘆根 枸杞子 益母草 車前子 艾 蒺藜
兔絲子 菖蒲 旱蓮草 紅花 酸棗仁 乾蒲花 火麻子 桑白皮 天花
粉 山藥 茴香 栝子仁 桃仁 杏杏仁 槐角子 王不留行

毛之品

牛羊馬驢羸犬猪猫鼠兔獾地羊田鼠

羽之品

鷄 鵝 鴨 鴿 鴟 鴞 鷺 鸛 燕 鷓 鶴 鴻 鷓 鴒 鴛 鴦 水鴨 鶯
鷹 鷺 蒿雀 烏 鴉 鳩 喜鵲 啄木 鶴 鷓 杜鵑 黃鸝 雉 蝙蝠
蠟嘴

鱗介之品

鯉 鯽 鮎 鰕 鱖 鱖 鰱 鰻 蟹 鱉

蟲之品

蠶 螽斯 蚯蚓 蠶 蠶 蟋蟀 水蛭 螻蛄 螳螂 螻蛄 蚊 蟬 蟬 螞蟧 螞蟧 蜈蚣 蜈蚣
蛇 蚰蜒 蜻蜓 蝴蝶 蠅 蚋 蝻 螺 螺 蜘蛛 蟬 秋蟬 蝦蟆 蠅 虎
蜂 蟻 螢

貨之品

館陶縣志

卷之二 物產

十五

綿 木棉 紬 絹 布 靛烟

館陶縣志卷之二

建置志

城池

官署

倉庫

舖舍

津梁

都鄙有制自古志之疆場之事豈不以隍堊樓櫓森列稱雄哉吏承流布澤非其地無以肅觀瞻斯公署所由建至倉庫所以儲積亭舖所以備警津梁所以利人隄防所以禦患坊表所以旌節鄉圖所以編氓夫周禮月令諸遺法固匪徒文具矣蒞政者舉而更新之勿令久而彌湮斯復古之大端焉志建置

城池

縣城雖創始於隋莫得其詳據碑記自明成化三年丁亥知縣唐禎築周圍五里高二丈五尺池深二丈闊如之為門四東曰豐樂南曰明遠西曰臨津北曰通部弘治十三年知縣瞿鑑繼修正德乙亥知縣孟正增高三丈五尺池深二丈闊三丈歲久傾圯萬二年知縣李冲奎復修之崇禎己卯知縣李根深甃城三角牆以甃西南缺內四面築土臺各一建成舖於上康熙九年知縣鄭先民於城濠週圍栽柳八百餘

館陶縣志

卷之二 建置

株蔚然金湯矣

又學門一在城東南隅先日文運政德間給事中傅良弼改曰文明規制尙溢嘉陰秉陽增修與四門同門外砌石橋橋外建坊曰萬仞宮牆崇禎戊寅大兵南下橋斷門塞今仍止四門

官署

縣治 在城中偏東南前代創修之詳無所考元至元間圯於水知縣李藻葺之洪武初頒公廨式縣丞歐陽源依式創建正統十二年知縣袁範增修復創譙樓於儀門外成化知縣唐禎重修正德九年知縣孟正大加修葺嘉靖間知縣戚濟創建鐘樓及大戶房東西二十四間隆慶間知縣高自新增吏舍五十楹自是規模弘廓矣

正堂三間 幕廳一間 後堂五間 東儀仗樓三間 西錢糧庫樓三間 東西吏房各八間 東西皂隸房各三間 儀門三間東西角門二座儀門外東寅賓館三間 土地祠三間 快手房三間 探快房三間 儀門外西嶽神廟二間 收

租房三間 大門樓一座 鐘樓一間
鑾駕庫三間康熙十四年三月鄭先民重修

知縣宅一所

堂樓五間 東樓三間 西樓三間 西樓後房三間 東書房五間 東前書房三間左右各二門 西房三間 西廚房三間 退廳三間 宅門一座

主簿宅一所

後堂房三間 東西廂房六間 前廳三間 東書辦房三間 西皂隸房三間 東書房四間 門二座 後臺房一間

典史宅一所

後堂房三間 東西房六間 前廳三間 東皂隸房二間 西書房三間 門二座

舊有縣丞宅一所今廢

館陶縣志

卷之二 建置

二

布政司 在縣治西北明正統十二年建久廢

按察司 在縣治東廳序俱全稱爲東司明洪武二十二年建

國朝順治六年火災毀

府館 在縣治東北明永樂六年建久廢今水次倉卽其舊址

監兌分司 原在大名府元城縣金灘鎮明萬曆十二年移駐館陶署今縣治北二十八年復還金灘署改爲行臺名曰後司康熙十年知縣鄭先民重修 攷元糧運由衛河運館陶達燕京明因之故有移駐之舉居民棄農趨賈城市輻湊自還金灘人民歸農城市蕭然有監兌題名碑記

稅課局 舊志在縣治西北今無攷

南館陶巡檢司 在城南四十里明洪武七年建

國朝順治十五年裁

南館陶遞運所 在城西南四十里明永樂六年建

陰陽學 在縣治東明洪武七年建

醫學 在縣治西與陰陽學同時建

陶山水驛 在城西南四十里明永樂二十一年建

河亭 在城西明萬 初年主簿浦連珠創建今廢

養濟院 在北門內有廳有房計孤貧五十四名口月糧銀一百四十兩六錢一分六

釐銀七錢三按月支領

又花布銀二十八兩夏冬二季支領康熙六年後知縣鄭先民時加修葺有聯書坊上云天

地之大猶有憾文王之政必先斯

演武場 在北門外有堂有坊康熙九年知縣鄭先民重修

新建駐防公署

國朝康熙初年委武職一員更番防守市民歲斂錢僦居城隅康熙八年知縣鄭先民

捐俸購縣後廢楹而新之名駐防公署刻石爲紀附記文

館陶縣志

卷之二 建置

三

笠簦所以禦雨不可以不雨而廢笠簦介胃所以防姦不可以無姦而弛介胃

與朝致治督於省會鎮於大郡防守於州邑碁布星羅以相臂指其制甚善而靡宇未遑軍無營幕嗟嗟兵以衛民勞矣勞而兩立苦矣鷄埒之馬廐之羊豕或圈牢之矧伊健兒其勢不得不僦民居兵僦民居則兵之悍者不惟慮其居而或仰其食民之黠者不惟靳以食而或驕以居且民有室家兵將嫌於出入兵有緩急民不得時其啓閉事殊兩病余吏茲土頗悉其弊於康熙八年捐俸凡葺營房若干閒蘇民也兵有寧處矣後之有志者尙嗣而葺之楚潛鄭先民撰

舊志載有正軍三百十八名守城民壯五十名團操民壯三十六名巡檢司弓兵二十名馬步民兵二十七名俱地方官操演訓練有警調發巡檢弓兵

國朝順治十六年裁今止有守城民壯名色載在經制康熙元年設武職一員更番防守部領馬兵十名步兵三十五名頗爲城池保障余謂兵不在多苟訓練有素一可當百今健兒輩平昔優游玩愒坐糜餉給一旦聞警懦不能前寇未至而氣先靡寧

戰而捷乎方今四海多事所在竊發無事之防儲於平日斯倉卒不爲患執此以行雖鄉勇可用也僅甲冑士哉

惠民藥局 在縣治西知縣王以仁建生員王克正監施有惠民醫案

續建置

學門康熙二十五年知縣卽國楨復開鎖鑰啓閉與四門同康熙三十三年教諭呂心佐糾邑人王昌明等募脩五路於門外高七尺闊一丈屹然孔道居民稱便

演武場康熙四十四年知縣陳冕重修

段千木墓自鄭公構亭設祭今荒蕪如故康熙四十四年知縣陳冕復建新亭歲時致祭伐石爲文以記之

義塚康熙三十二年知縣錢瓊置令各鄉掩埋露棺

田烈女墓康熙六十年知縣楊一正構亭立碑

義田在東門外計八畝一分康熙六十一年知縣楊一正置葬在死無塚地及商旅之

館陶縣志

卷之二

續建置 集場

四

不能歸葬者

先農壇在邑東里許買地四畝九分建立壇所每歲於仲春上亥日照祭

社稷之例率屬致祭行藉田儀以重農事雍正四年十月內知縣趙知希奉文創建

忠義祠在學宮傍雍正四年知縣趙知希建

節孝祠在城隍廟側雍正四年知縣趙知希建詳載碑文

社稷山川風雲雷雨二壇雍正十年知縣曹纘奉文重修

劉將軍廟在八蜡廟西雍正十二年知縣謝士柱建

普濟堂在城西北隅堂瓦房五間東平房六間西平房六間官廳三間門樓一座雍正十二年知縣謝士柱建十三年知縣張興宗立石詳見碑文

集場

王家集

縣北二十里

西河寨集

縣西南六十里

孫兒寨集

縣東北三十五里

徐村集

縣西南十五里

朱莊集

縣西南五十里

齊家堡集

縣西南二十五里

柴家堡集

縣西南二十里

菓子園集

縣西北三十里

陽召集

縣南十里

潘莊集

縣東十五里

李官莊

縣東北三十五里

尹固集

縣西南四十里

馬固集

縣南三十五里

倉廠

倉廠 舊云在儀門不知何時移至縣治東北康熙十年知縣鄒先民重修凡徵臨未麥及漕糧水次兌軍俱在此

預備倉

在縣治西北每年縣令捐俸積穀以備賑荒

尖塚倉

宋置元至元二年知縣李藻修今廢

社倉

在城南館陶集張官寨淺口集薛店集凡五又二十所各在寺廟官地俱久湮

馬廠

在城內東隅明宣德六年建

館陶縣志

卷之二

倉廠 舖舍

五

窯廠

在西衛河岸 係臨清者凡三

南館陶廠

係東昌府所屬州縣及平山等衛

馬欄廠

在尖塚鎮迤南係廣平府所屬廣平等六縣窯廠共十四座後俱廢遺地共

九頃三十一畝民間佃種

拳兒寨廠

係廣平府所屬成安肥鄉二縣窯廠共八座後俱廢遺地共十二頃七十

畝民間佃種

攷臨清設有工部分司監督窯廠陶造城甃其窯戶匠氏俱隸臨清相鄰郡縣始亦兼有後奉裁革斯殆其遺跡歟豈陶土宜陶自古已然歟今所遺地俱民間佃種籽粒輸之官埏埴之利悉爲正供云

舖舍

總舖

招村舖

路橋舖

拐曲舖

遷隄舖

秤勾灣舖

小馬頭舖

南館陶舖

安靖舖

黃花頭舖

冀家河舖

窩兒頭舖

北馬頭舖

灘上舖

馬欄廠舖

尖塚鎮舖 共十六所

攷衛河自遷堤北至尖塚鎮沿岸置舖舍十二每歲春月官植柳樹金灘監兌糧運主簿於淤塞處督淺舖夫疏鑿之此河制也附記

橋梁

觀音堂石橋 在縣南關外

王家石橋 在城西南四十五里明嘉靖閒王舉重修有碑記

楊家石橋 在城西南六十里楊世高暨男天福重修

王兒莊橋 去楊家石橋又五里

南館陶石橋 在城西南四十里

北馬頭渡 在城西四里

窩兒頭渡 在城西南四里

駙馬渡 在城西南四十里詳見古蹟

館陶縣志

卷之二

橋梁 隄防

六

遷隄渡 在駙馬渡南十里

灘上渡 在城北五里

清泉渡 在城北二十五里

尖塚鎮渡 在清泉渡南五里

隄防

金隄 在縣西南五十里上接冠縣下入臨清按漢書金隄古堰也成帝時王延世運土以塞河決自金隄而增築之隄上有金隄驛秦玄樓金隄關

御河隄 在縣西二里南至大名北距臨清長七十里明嘉靖十七年河決東昌推官

徐桂調夫修築號爲徐公隄見南館陶碑記嘉靖二十二年復決知縣朱時叙縣丞于守謙重修縣治內有碑記隆慶三年復大決知縣高自新主簿玉杜又修之

攷順治十年癸巳河決臨清常家溝水南徙縣南北相繼皆決次年甲午河又決雖隨決隨修而衝溢不時河勞亦孔棘矣

薛家圈新隄 在縣西南八里許知縣李冲奎築明隆慶三年大水百姓漂流者不可勝計萬曆二年水復大漲公慮之同主簿浦連珠親詣查勘於薛家圈相宜築月隄一道苦費無出申准用萬曆元二兩年餘剩未役大戶一千五百分每三分僱夫一名修築完備長一百八十丈底闊四丈五尺頂闊三丈高九尺水患以免詳見碑記坊表

繡衣坊 爲御史陳占建

攀桂坊 爲舉人高安建

經魁坊 爲舉人劉衡建

丹桂坊 爲舉人郭良建

恩榮坊 爲進士郭良建

世科坊 爲舉人趙資建

步蟾坊 爲舉人吳譽建

館陶縣志

卷之二

坊表

七

登雲坊 爲舉人楊源建

擢英坊 爲舉人王傑建

雲梯坊 爲舉人靳亮建

科第坊 爲舉人汪濬建

經元坊 爲舉人王江建

恩榮坊 爲進士馬懋建

經元坊 爲舉人樊江建

世科坊 爲舉人楊文建

啓秀坊 爲舉人耿明建

恩榮坊 爲進士耿明建

聲震青霄坊 爲舉人武雷建

拔秀坊 爲舉人王坦建

陶山彩鳳坊 爲舉人武德智建

月殿秋香坊 爲舉人劉之翰建

文禎坊 爲舉人楊師震建

恩榮坊 爲進士楊師震建

憲伯坊 爲僉事武建邦建

黃堂弼教 爲舉人米世功建

奕世恩先坊 爲贈文林郎知縣武雲贈按察司僉事武德智建

地恩坊 爲勅贈主事楊傑建

鴻臚坊 爲序班張忠建

貞節坊 爲節婦侯氏建

康熙九年河可董固邨王邦真母杜氏年一百一十三歲精健異常知縣鄭先民以車

迎至內堂問勞之是歲冬月無病而終欲爲建坊未果 匾其堂曰歲星八瑞

館陶縣志 卷之三 鄉圖

八

鄉圖 集附

孝良保計七圖

平安保計六圖

北陽保計十圖

太章保計四圖 共二十七里

尖塚鎮集 縣北二十五里

南館陶集 縣西南四十里

淺口集 縣西南四十里

北馬頭集 縣西五里

張官寨集 縣西北二十里

車疇集 三十里

房兒寨集 五十里

南劉兒莊集 六十里俱縣西南

薛店集 縣東北五十里

新興集 縣東北五十里

王家集 縣北二十里

西河寨集 縣西南六十里

孫兒寨集 縣東北三十五里

徐邨集 縣西南十五里

館陶縣志卷之四

職官志

縣令 縣丞 教諭 訓導

主簿 典史

朝廷命官錫爵匪重其名重其實耳今海內州邑吏星羅碁布猶古岳牧遺制皆期其宣上恩德而撫柔百姓獨吾陶哉元以前荒略不備攷有明來剖符蒞茲土者冠蓋相望其爵里姓氏悉登于冊一以景先哲儀型一以志陶人之不忘也佐幕輔政令廣文司教鐸悉有事吾邑者宜並輯之志職官

魏

諸葛原 為館陶令

隋

魏德深 鉅鹿人初為文帝挽郎以能遷貴鄉長尋轉館陶有傳

劉仁恩 開皇初為毛州刺史時廢縣置毛州有傳

章壽 杜陵人開皇九年為毛州刺史有傳

館陶縣志

卷之四

官職

一

唐

趙元愷 武德四年為毛州刺史

宋

查道 休寧人端拱初授館陶尉有傳

劉筠 大名人真宗時為館陶尉累官集賢院學士有傳

劉牧 臨安人真宗時知館陶縣先是邑多盜牧用其黨推迹有發輒得

郭諮 趙州人仁宗時知館陶縣有巧思善為兵械

宗澤 義烏人哲宗時授館陶尉後授東京留守有傳

陳過庭 山陰人徽宗時為館陶主簿有傳

劉源 館陶人授本縣尉陞為尹有傳

金

孔淵 宣聖四十八代孫皇統中知館陶縣

王庭筠 大定中調館陶主簿有傳

元

張之綱 由館陶簿陞為尹

溫仲謙 大德元年授館陶尹有傳

李藻 顯川人順帝時為館陶尹有傳

沈瑀 為館陶尹有傳

明

知縣

傅信之 洪武年任有傳

袁範 秦和人監生正統年任蒞政有聲

邢政 灤州人監生景泰五年任興學愛民多所創建

唐禎 金州人監生天順八年任有傳

館陶縣志

卷之四

官職

二

李寶 繁峙人舉人成化九年任居官寬惠

王和 遷安人進士成化十五年任陞監察御史見漏澤園記

林貴 南海人進士成化十九年任綽有清譽陞監察御史

杜榮 應州人進士成化年任以公勤稱陞太僕寺寺丞

王玉 盧龍人監生弘治七年任剛柔並用修學有功

李旻 襄城人舉人弘治八年任有聲望

瞿鑑 鹽城人舉人弘治十年任修葺學校陞廣信府通判

李進 獲嘉人舉人正德年任直方不詭

張智 延津人監生正德三年任

孟正 棗強人舉人正德九年任為政嚴明奸邪屏跡但用刑過重卒以此獲譴

薛潮 直隸崑山人舉人正德十一任

鄭琚 任丘人監生嘉靖元年任

王良輔 懷來人舉人嘉靖五年任境內大水申請獨貸全活甚衆

曹琪 儀真人舉人嘉靖十二年任廉直不徇請託

傅堯臣 永濟人舉人嘉靖十六年任遲重不纖趨見直捷

吳宏

戚濟 宣城人舉人嘉靖二十二年任長于文學

朱時敘 錦衣衛人監生嘉靖二十四年任崇學築隄有碑記

徐行 祥符人舉人嘉靖三十年任陞青州府同知

史官 洛陽人進士嘉靖三十四年任為政多釐剔陞監察御史

陰秉暘 汲縣人進士嘉靖二十七年任有傳

曹廷詔 甘泉人嘉靖年任

胡尙禮 甘泉人嘉靖年任

趙科 句容人舉人嘉靖四十一年任好讀書禮士

館陶縣志

卷之四 職官

符載 內鄉人舉人嘉靖四十四年任

馬滢 蔚州人舉人嘉靖四十五年任

高自新 獲鹿人進士隆慶三年任有傳

李冲奎 灤城人進士萬 元年任為政不佻多捍禦功修輯縣志

傅朴 洧川人舉人萬 三年任

徐子器 東陽人進士萬 四年任

姚文炳 浙江仁和人舉人萬 六年任

王國弼 祥符人舉人萬 八年任

陳景福 直隸通州人歲貢萬 十年任

許恩 山西絳州人舉人萬 十六年任矯矯有風節令行禁止訟獄立判

楊繼先 直隸定興人進士萬 十八年任

趙汝弼 直隸高邑人選貢萬 二十一年任

金德光 直隸建德人選貢萬 二十二年任多惠政

章元衡 華亭人進士萬 二十七年任

王希龍 崞縣人舉人萬 三十年任

王以仁 寧羗州人舉人萬 三十四年任設惠民藥局陞寧海州知州

吳俊 鳳翔人舉人明敏有為陞涿州知州萬曆三十八年任

牛光先 寧晉人舉人萬 四十二年任

蔡攀龍 唯州人舉人萬 四十四年任卒于官

楊于國 陽曲人舉人萬曆四十七年任廉靜不苟囊無餘資歷任山海監軍道時內瑞

翟化儒 直隸東鹿人舉人天啓二年任歷陞泰安州知州

張 腆 趙州人舉人天啓六年任陞松江府同知

張 星 宣城人選貢崇禎三年任陞河間府同知

魏國卿 華州人舉人崇禎七年任十年回籍

館陶縣志

卷之四 官職

李根深 直隸宛平人舉人崇禎十年任為人沉默 政治肅清校士得人戊寅 兵簡城

晉調元 陝西人舉人崇禎三年任有傳

程鵬雲 廣西人舉人崇禎十六年任

國朝

高 珍 南宮人歲貢順治元年任

程 瑾 滿州人順治三年任有傳

劉茂先 遼東復州人生員順治五年任時有土寇公練鄉兵親督禦之又嘗均里使徭

程啓運 山海人生員順治十一年任後後補平陰縣又補磁州未任

孫雲錦 成都舉人順治十三年任

王躬贊 河間舉人順治十七年任

鄭先民 字二陟湖廣潛江人由進士康熙六年任

知縣

陳文學 滿洲人康熙十五年任

郎國楨 字維周滿洲人康熙二十年任

吳宗程 河南寶豐人康熙二十六年任

何志崇 湖廣人舉人康熙二十八年任

汪澤遠 字東匯江夏人例監康熙三十年任

錢瓊 字球美常熟人舉人康熙三十一年任

白爲懿 字子美滿洲人康熙三十六年任

陳冕 字宜章號首人鄱陽人進士康熙四十一年任

何斐 字天章滿洲人康熙四十六年任

高銳 字銳菴號燦南直隸盧龍人歲貢康熙四十七年任

楊一正 字稷山武功人歲貢康熙五十八年任

趙知希 字大音涇縣人舉人雍正三年任

館陶縣志

卷之四

續官職

顧濂 字石門人已丑進士雍正六年十月署任

馮銳 字穎長四川梁山人教習雍正七年二月署任

李謙咩 字河南武安人保舉雍正八年三月署任

曹纘 字維憲貴州施秉人副貢雍正八年十二月署任

吳兆松 字眉公福建連城舉人雍正十年十二月署任

謝士柱 字棟也湖廣沔陽舉人雍正十一年五月署任

阮如暉 字亮彩大興人甲辰進士雍正十三年實授

張興宗 字肯堂浙江鄞縣人由國學生考授通判借補堂邑縣知縣雍正十三年署任

攷縣志元達魯花赤旭世篤暖至元十一年任劉著至元中任達魯花赤忒都大德

四年任吳榮祖亦大德四年並府志所無姑附存之

縣丞

明

歐陽源 洪武二年任開創縣治

梁梅 鄆州人監生弘治七年任佐政廉明陞四川大寧縣知縣

周維善 巢縣人監生

王維 大成人監生

徐宸 新野人監生

張鵬 隴西人監生

許泰 陝西徽州人監生

劉謹 監生

任全 監生

王沛 監生嘉靖十二年任

館陶縣志

卷之四 官職

六

弋之綱 監生嘉靖十六年任河泛浸民禦水有功

劉欽 監生嘉靖十八年任

丁守謨 吏員嘉靖二十二年任

韓大用 監生肥鄉人嘉靖二十七年任

竇二桂 監生嘉靖三十年任

劉禮 監生嘉靖三十五年任不甘仕進性樂恬退

趙鍾 鹿邑人監生嘉靖三十七年任

項由 吏員嘉靖三十九年任

張鈇 肅寧人監生嘉靖四十三年任性剛直不阿輕仕進遂引退

孫確 清河人監生嘉靖四十四年任

倪瑒 鄆縣人儒士萬 二年任

普觀光 垣曲縣人恩貢萬 五年任

李有時 浮山縣人恩貢萬 六年任

主簿

明

李儼 監生洪武七年任修舉廢墜

高翔 正統年任

夏忠 景泰年任

孟盤 朝邑人監生

羅富 綿州人監生修隄有功陞縣丞

黃玠 金溪人監生

閻恆 河間人監生

張景懷 鎮源人監生

朱英 保定人監生

館陶縣志

卷之四

官職

七

王廣 蒲縣人監生正德十年任

張魯 輝縣人監生

王沛 監生嘉靖元年任

鄧德弘 監生嘉靖五年任

辛譽 監生嘉靖十一年任

胡文祿 汝寧人監生嘉靖十八年任

李鉉 保定人監生嘉靖二十年任尚禮敬賢

曹應時 慶州人嘉靖二十五年任

袁端 洛陽人監生嘉靖二十七年任

陽柳 東明人監生嘉靖三十九年任

姜洲 高郵人監生嘉靖四十四年任

王杜 陳州人監生隆慶元年任築隄勸勞禦水有功

霍維棟 曲州人監生隆慶三年任

浦連珠 無錫人監生隆慶六年任築隄修城有功

徐壽昌 泰州人貢士萬 二年任

戴 銘 蒙城人例貢萬 三年任

趙志滿 蘭谿人知印萬 五年任

卓 祿 沛縣人例貢萬 七年任

黃 錫 萬曆二十一年任

李增祿 曲沃人崇禎十年任

李 侯 保定人崇禎十五年任 以上多失考

國朝

王廷謨 宛平人順治二年任

喻民樂 湖廣人

館陶縣志

卷之四

續官職

八

楊 振 義烏人順治十年任

王 金 宜城人康熙元年任

王 詔 山陰人康熙九年任

續主簿

潘從哲 大興人康熙十八年任

賀弘源 大興人康熙三十一年任

戴 宮 山陽人康熙四十五年任

蘇長泳 字中涵宿遷人康熙五十五年任

姚 鈺 雍正三年五月任

柳庭筠 雍正七年四月任

吳從信 雍正七年十一月任

楊 涓 雍正九年六月任

吳文全 雍正九年七月任

黃寶樹 雍正九年十二月任

劉永鐸 雍正十一年二月任

王汝勵 雍正十一年十二月任

胡簡 雍正十二年三月任

楊山立 字巍然山陽人雍正十二年七月任

館陶縣志 卷之四 官職

典史

明

焦新 陳留人

謝志英

施友安 慈溪人

李佐 代州人

張禎 順昌人

陳政 山西人

潘廣 直隸人

湯鏗 慈溪人

郭巍 開州人

劉福 廬陵人正德十年任

魏經 嘉靖元年任

趙忠彥 嘉靖五年任

李鵬 嘉靖十五年任

張 嘉靖十九年任

雷曉 嘉靖二十二年任

曹廣 嘉靖二十四年任

曾衍 嘉靖三十年任

吳若雍 嘉靖三十五年任

孫麟 嘉靖三十九年任

陳王道 鄞縣人 嘉靖四十四年任

張玳 肅寧人 隆慶三年任

周宗會 永豐人 隆慶六年任

館陶縣志

卷之四

官職

十一

李邦寓 豐城人 萬 二年任

丁士選 錢塘人 萬 五年任

王民皞 萬 二十一年任

何從康 華州人

楊文燦 鉅鹿人

郭文魁 大興人

國朝

阮士易 順治元年任

金清 順治 年任

陳景星 順治十六年任

萬國讓 江西人 康熙四年任

續典史

李國瑞 康熙十八年任

丁國斌 山陰人 康熙十九年任

鄭光彝 鄆州人 康熙二十七年任

別奇珍 富平人 康熙三十一年任

徐宗文 上虞人 康熙四十二年任

潘光緒 宛平人 康熙四十八年任

曹弘 茂山人 康熙五十年任

陳右曾 宛平人 康熙五十八年任

劉珂 雍正九年八月任

陸琦 雍正九年十月任

黃世爵 字宸耀 大興人 雍正十三年三月任

館陶縣志

卷之四

續官職

攷明初設知縣一員縣丞二員主簿二員典史一員南館陶巡檢司巡檢一員陶山
鐸驛丞一員遞運所大使一員稅課局大使一員嘉靖十一年裁縣丞一員主簿一
員後縣丞盡裁嘉靖十五年裁稅課局大使隆慶二年裁驛丞遞運所大使南館陶
巡檢司巡檢至

國朝順治十年裁又有陰陽學訓術醫學訓科各一員原缺
教諭

元

陳起宗

杜承祖 俱大德四年任

明

李 仲 有傳

張 鑛 遷安人舉人贊修學校勸敷教化

館陶縣志

卷之四 官職

十二

黃 玉 羅山人舉人景泰年任

王 昉 會稽人舉人成化年任

王 凱 應山人舉人陞平涼府教授

方 璽 餘姚人舉人弘治六年任愛士如子

馮 俊 有傳

傅 銓 桂林人舉人正德六年任陞南京翰林院孔目

田 經 澤州人舉人正德十年任陞鉅野縣知縣

張 伸 濰城人歲貢

王餘慶 鳳陽人貢生

姚 詹 貢生

金廷桂 華亭人貢生博學能文教士有禮

蔡天應 饒陽人舉人師事湛甘泉邃于禮學以禮率人言行不苟

莊紇 湖廣人 貢生 敦朴 老成

張辰 太原人 貢生

蔡銳 上元人 舉人 學淹六籍 尤深于數學 講易寒暑不輟 歷任商丘 觀光 通許 知縣 俱有廉名

葉尙德 分宜人 貢生

吳尙廉 歙縣人 貢生

秦時 鄧州人 貢生 淳朴 莊重

伍三策 平鄉人 貢生 忠實 無偽 和以育士 陞海州 衛教授

胡清 歙縣人 貢生

徐民望 晉安人 舉人 和平 教士 陞陽穀縣 知縣 以上俱嘉靖 年任

李緒 獻縣人 貢生 隆慶 四年任 陞灤州 正

趙邦治 東光人 貢生 萬 二年任

秦希哲 太原人 貢生 萬 五年任

館陶縣志 卷之四 官職

王蒙 商河人 貢生 萬 七年任

孔承季 萬 二十一年任

魏可教 汝上人 舉人

蔣富春 舉人 全州人

楊見龍 舉人 廣東人

朱豫亨 河間人 歲貢

王恒言 慈谿人 舉人

馬承佑 安東人 歲貢 以上年次多無攷亦多缺

國朝

涂高 遼東人 歲貢 順治 元年任

閻應震 魚臺人 歲貢 順治 年任

賈文燁 輝縣人 舉人 順治 十六年任 陞保安 知縣

續教諭

馬乾龍 德州人歲貢康熙十九年任

李 瓚 長山人歲貢康熙二十一年任

呂心佐 鉅野人歲貢康熙三十三年任

朱之璣 單縣人歲貢康熙五十二年任

陳承祖 德州人歲貢康熙五十四年任

于光祖 文登人舉人雍正三年任

訓導

明

王 翔 泰和人貢生永樂年任

溫 良 有傳

劉 瑤 泰和人

館陶縣志

卷之四 官職

十四

陶 鎔 英山人

陳 紀 固安人

勞 俊 湖口人

李 瓚 南陽人

杜 銘 文安人

程 寰 歙縣人

王景福 清河人

劉 譽 光州人

王 翼 易州人舉人潛心經術善于獎勵陸學正

李 良 永年人

程 直 鄆縣人

方 珍 盧陵人

朱蘭 唐縣人

龐聰 南陽人

耿昂 任縣人

楊通 臨城人嘉靖年任

何思明 河南人

呂寰 平定人

閻璋 新樂人

李秀 臨淮人

葉華 邳州人

趙廷松 雞澤人剛正慷慨不尚虛文陸魚臺教諭

王翔鳳 保定人陸解州學正

林箎 臨海人性平易工詩文陸靈山教諭

館陶縣志

卷之四 官職

十五

楊一鶚 鄆都人清勤有孝名陸寧陵教諭

蔚玠 肅寧人

高壁 金壇人貢生陸萊陽教諭

李有時 浮山人恩貢

尙賢 臨漳人貢生

胡遵德 永年人貢生誠貫金石義重 山多士景仰陸泌陽教諭

牛繼先 壺關人貢生陸瀋府教授

劉克敬 陳留人貢生隆慶四年任

江如練 卽墨人貢生隆慶六年任

徐孟言 河南 拓城人貢生萬 三年任

石生雲

甘上達 萬曆二十一年任

熊一魁 湖廣人

甯逢堯 大同人

么士貴 元氏人

王于秦 陝西人

王遇我 黃縣人

李以謙 濟寧人

尹牧民 濟寧人

余名鯤 霍丘人 歲貢 以上俱多失攷

國朝

劉允升 遼東人

孫令祚 萊陽人 歲貢

韓萬程 青城人 歲貢

館陶縣志 卷之四 官職

十六

張于鼎 商河人 歲貢 順治十六年任 隨裁

劉秉和 平原人 歲貢 康熙元年任

馬泰徵 濟寧人 歲貢 康熙七年任

王中興 濱州人 歲貢 康熙十三年任

續訓導

岳鑄 壽張人 歲貢 康熙二十二年任

孫織錦 德州人 貢生 康熙二十年任

王鶴生 靈山衛人 歲貢 康熙三十年任

何婁光 新城人 歲貢 康熙三十四年任

王運隆 德平人 歲貢 康熙四十四年任

朱士章 魚臺人 歲貢 康熙四十八年任

鄭士震 字慎修 汶上人 歲貢 康熙五十四年任

張 嶧 萊蕪人 歲貢 雍正四年任

孫 銓 寧海州人 歲貢 雍正八年任

館陶縣志

卷之四

續官職

十七

攷明初儒學設教諭一員訓導二員

國朝因之順治四年裁訓導一員康熙三年裁教諭只留訓導一員旋又設教諭一員
自明季寒官不越省選授迄今遂沿爲定例

館陶縣志卷之五

選舉志 薦舉 進士 舉人 歲貢 恩拔 附例 貢 例 監 附 武 科 賜 封 恩 蔭

制科雖始隋唐然歷代以來諸科竝進故譽髦稱最盛明初兼行辟召後則需用文藝士舍此無薦身之階蓋其難矣吾陶地接洙泗文學蔚然由三途入仕版者率多名雋才今逢

國家連茹造士科目鼎新其文明復泰之會與武途亦膺薦拔至賜封恩蔭俱受命王家者悉載於後以弘作人大典志選舉

薦辟

明

朱儼 以人才舉有傳

進士

金

館陶縣志 卷之五 選舉

郝鈞 字國器號鶴鳴老人承丞安五年經義榜進士

宋

王沿 中天聖進士有傳

王鼎 有傳

明

洪武辛未科

孫文義 官監察御史有傳

永樂乙未科

陳占 歷官大理寺少卿有傳

天順丁丑科

郭良 歷官光祿寺少卿有傳

成化戊戌科

馬懋 歷官布政有傳

弘治丙辰科

耿明 歷官江西左參政有傳

嘉靖甲辰科

楊師震 初授戶部主事督儲天津陞陝西榆林僉事禦邊有方略遷山西大同兵備副使致仕歸

丙辰科

武建邦 德智之子初任鄆城令鋤抑強暴申理冤獄擢戶部主事督餉遼左雲中俱有政績遷山西冀北道僉事兼理學校得士民心陞湖廣參議未任

隆慶辛未科

倪湯 初知蕪湖縣陞順天府推官蒞政有器度

萬曆己丑科

姚鉉 歷任副使有傳

丙辰科

館陶縣志

卷之五 選舉

一一

耿如杞 明之曾孫歷任山西巡撫有傳

崇禎丁丑科

耿章光 如杞之子初任曲沃縣令品高行潔綽有政聲歷任兵部郎中加尙賢司卿

國朝

康熙庚戌科

耿願魯 如杞之孫選翰林院庶吉士授編修見任

癸丑科

高重光 內閣中書舍人見任

鄉舉

明

洪武庚午科

孫文義 見進士

永樂甲午科

陳 占 見進士

宋 昇 河南葉縣訓導

仲 宣 陝西武功縣知縣

庚子科

趙 麟 慶陽府通判

癸卯科

高 安 山西壽陽縣縣丞

館陶縣志

卷之五 鄉舉

三

張 智

石 巖

宣德己酉科

張 浩

劉 志 鑑之子歷任長沙府同知公廉勤慎詔進階中順大夫

正統丁卯科

劉 衡 歷任河南提學僉事

景泰庚午科

郭 良 見進士

趙 資 中書舍人

吳 譽 山西秦寧縣知縣

楊 源 河南均州同知

天順壬午科

王傑 直隸房山縣知縣

靳亮 直隸文安縣知縣

成化戊子科

汪篋

甲午科

王江

丁酉科

馬懋 見進士

丙午科

樊江 經魁直隸虹縣知縣

楊文 源之子伊陽縣知縣

館陶縣志

卷之五 鄉舉

四

耿明 見進士

弘治乙卯科

武雷 肅之子靜海知縣捕流賊有功陞高郵知州食俸四品至肅府長史

正德丁卯科

王坦

已卯科

武德智 雷之猶子建邦之父初知原武縣值水患民賴以全活者甚衆調寶坻惠政浹民思之不忘陞朔州知州

嘉靖乙酉科

劉之瀚

辛卯科

王汝楫 知縣

庚子科

楊師震 見進士

癸卯科

米世功 懷慶府推官才幹敏健訟獄以明允稱

丙午科

武建邦 見進士

王無逸

壬子科

王禎 陝西延川知縣持身梗介居官清峻

辛酉科

倪湯 見進士

甲子科

米成道 世功之子

館陶縣志

卷之五 鄉舉

五

萬曆乙酉科

王祈禎 開封同知

戊子科

姚鉉 見進士

丙午科

耿如杞 見進士

柴可立

天啓丁卯科

耿章光 見進士

國朝

康熙丙午科

耿願魯 見進士

鄒魯

高重光 見進士

續鄉舉

耿賢舉

姚班 雍正元年癸卯舉人第一

武科 雍正十年壬子科

明

王訓 玠之長孫萬曆癸酉武舉

王之藩 玠之裔天啓甲子武舉

王躍鯉 甲子武舉

王來聘 丁卯武舉

王佐才 玠之裔崇禎庚午武舉辛未武進士授胥州府守備

國朝

遲冲漢 順治丁酉武舉

郭祥瑞 順治丁酉武舉

館陶縣志

卷之五 武舉

六

孫鑑

李坦 康熙壬子武舉

續武舉

馬延眉 康熙戊辰進士官守備

張明遠 康熙癸酉武舉

秦良藩 康熙辛卯武舉

歲貢 恩拔附

明

杜驥 有傳

陳亨 府同知

劉鑑 累官福州知州見孝義

楊永 通判

郎俛 有傳

李納 鄆縣主簿

左弼 貴州宣撫司經歷

許詢 韓城縣知縣

葛寅 江陰縣丞

郝端 臨瀆縣主簿

馬 擢遵化經歷

以上洪武年貢

吳 助 孟津縣知縣

許 寧 遵化衛經歷

毛 濬 河曲縣知縣

丁 復 白水縣主簿

郎 巽 廣西巡檢

石 經 太常寺贊禮

劉 侃 遼東蓋州衛經歷

劉 宣 金壇縣主簿

以上永樂年貢

王 鏞 鎮府檢校

郎 信 沙河縣知縣

任 泰 清川縣教諭

劉 遜 廣濟縣知縣

劉 賓 臨漳縣縣丞

王 踪 沈陽縣縣丞

以上宣德年貢

翟 晉 天宮北鹽場大使

任 嘉 南陽府推官

館陶縣志

卷之五 歲貢

七

王 鐸 杞縣知縣

陳 範 洪洞縣縣丞

張 侑 陵川縣縣丞

宋 濟 宣府經歷司

以上正統年貢

張 忠 馮臚序班歷長沙府通判以勤慎稱

甯 鴻 綿州知州

李 敬 有傳

白 祥 杭州府通判

李 澄 烏程縣縣丞

以上景泰年貢

王 瓚 河南南陽府知事

武 安 直隸真定縣知縣

武 肅 有傳

高 巍

秦 安 初仕真定知縣廉明有才幹陞崑山縣縣丞方有聲當路以致仕歸

以上天順年貢

王 敏

高 宏 榆社縣丞

張能 上虞縣丞

汪澤

睢浩 知行唐縣六載囊無餘資後陞定州知州及去民號泣留之

宗寧 汝寧崇府典儀

汪源 高郵同知

宗實 滑縣主簿

孫誼 忻州訓導

楊清 濶州通判

毛鵬

張清 宣府訓導

劉暘 房山訓導

以上成化年貢

王瀛 常孰縣丞

張驥 晉州訓導

劉欽 濟苑訓導

劉錫 蔚州判官

李好問 江西寧府典儀正

郭績

劉澄 邢臺縣知縣

武斌 騰驥衛經歷改隆慶衛

趙鑑

宋鉞

館陶縣志

卷之五 歲貢

八

王相

張瑄 樂亭縣訓導陞汝寧王府伴讀

許賢 尉氏縣丞

米錫 烏程縣丞

以上弘治年貢

鄭欽 慶縣知縣

王璽 有傳

潘文 昌黎訓導陞廣昌教諭

武恩 臨洮推官

郭隆 潼關衛經歷

郭綸

樊淳 武功縣丞陞宜君縣知縣

以上正德年貢

武德義 雷之猶子均州判官陞寧鄉縣知縣

王寶 永平衛經歷陞興平知縣明達時務論侃侃歷官累年無餘資見孝義

楊爌 濟南德州奉祀

常歡 獻縣訓導陞鹽山教諭

張時 有傳

嚴澄 開封府訓導廣平府教授溫雅宏博允宜士範

王寵 同州學正博學能文與兄寶齊名 袁俊

高良弼 井陘知縣幼穎異舉神童 王世禎 柘城知縣

任恩 王嶽

李東 祁門訓導保定教諭 王三聘 開封府訓導

車廷相 開封訓導陞考城教諭敦厚淳朴教士有法

劉嘉梧 滄州訓導清豐教諭學博行潔明於世務

劉源

王維嶽 丹陽臨穎主簿剛毅嚴明催科著績以致仕歸人服其急流勇退

邢邦彥 山西靜樂訓導陞定州學正淳朴正直動循矩度

李希魁 尉氏主簿 張珊 陽武縣丞平易愛民陞韓府紀善

任希顏 汝寧訓導陞周府教授 熊應文 武陟訓導陞慶府教授

館陶縣志 卷之五 歲貢

九

睢化中 壺關訓導 劉堯宰 冀州訓導

張善 靈壽知縣 劉嘉樟 壽州訓導贊皇教諭

王室 定州同知 劉汝梅 選貢扶溝知縣

王承業 沂州訓導 趙希廉 封 訓導

王無違 教授 閻宗解 主簿

張文周 判官 秦思恭 安之玄孫章 訓導陞曲阜教諭

閻大猷 教諭 王無過

徐玳 訓導 秦爾梅 訓導

張延祚 恩貢汾西知縣 溫得新 訓導

宋應宿 汪應軫 濰縣教諭

汪應捷 齊東教諭 倪宗謙 文縣知縣

汪明漸 代州州同 孫光祖 沂州訓導 以上年次無攷

柴文耀 泰昌元年恩貢

牛汝虹 恩貢初任偃師縣丞代縣篆捍禦有法再任玉田丞陞延安經歷署保安縣撫盜安民數月稱治陞秦州州判七庶控上學留兩院具題實授值改革遂寢歸家讀書不倦年八十六卒

耿如桂 天啓元年貢有傳

王世科

汪三策 德州學正

耿重光 崇禎元年貢選陝西部陽縣縣丞

王毓秀 元年恩拔通判

秦若觀 二年貢訓導

姚運熙 四年貢有傳

王克中 六年貢

文運隆 八年超貢候選通判

楊炳 八年貢

牟之桐 十年貢

宋思讓 七十二年貢歷濟南府教授壽九十歲

蕭惟馨 十四年貢

冀往雲 十六年貢商丘知縣有傳

國朝

汪古愚 順治元年恩貢鉅野教諭

汪士亮 元年貢岳州府推官

館陶縣志 卷之五 歲貢

十一

周派 二年貢

耿含光 四年貢如杞之子高密訓導

楊光鼎 五年案首貢秦州州判

倪佳士 六年貢定陶訓導

許爾捷 八年恩貢候選通判

倪吉士 八年貢掖縣教諭

張鳳翥 十年貢鄒縣訓導

汪鳳昇 十一年恩拔貢

么顯名 十二年貢海豐訓導

張大烈 十四年貢

王更新 十六年貢

王克遜 康熙元年恩貢

郭永固 元年貢以後停貢

汪鳳翔 八年貢例復

王玉 十年貢

王躍龍 十一年拔貢

孫振宗 十二年貢

于敬王 康熙十四年貢

恩拔附

牛維嶽 康熙十六年貢

樊瓚 康熙十八年貢鄆城訓導

汪一夔 康熙二十年貢東阿訓導

王士新 康熙二十二年貢

卜云嘉 康熙二十四年貢

王四維 康熙二十六年貢長清訓導

董正 康熙二十八年貢

張麟生 康熙三十年貢

耿鵬舉 康熙二十三年拔貢陵縣教諭

閔中珍 康熙三十二年貢

邢士魁 康熙三十四年貢

李景 康熙三十六年貢

姚子昂 康熙三十七年拔貢

趙師晉 康熙三十八年貢

館陶縣志

卷之五 續歲貢

十一

袁奇珍 康熙四十年貢

王炳 康熙四十二年貢

耿瑗 康熙四十四年貢

何崇謙 康熙四十六年貢嘉祥教諭

李克奇 康熙四十六年貢

王又曾 康熙四十八年貢

馬良弼 康熙五十年貢

孫如爽 康熙五十二年貢

袁昱 康熙五十四年貢曲阜訓導

王猶龍 康熙五十六年貢

張遐齡 康熙五十八年貢

姚子晟 康熙六十年恩貢

王 珏 雍正元年作康熙六十年歲貢

么 樞 雍正元年貢

李如沆 雍正元年拔貢

耿伯昆 雍正三年貢

于守潔 雍正五年貢

袁輔元 雍正七年貢

王大光 雍正九年貢

霍秉仁 雍正十一年貢

劉 泮 雍正十三年貢

耿奕敬 雍正十三年拔貢

府貢

明

館陶縣志

卷之五 府貢 例貢 十二

甯 柔 寶鶴縣丞

焦 俊 密雲縣丞又云知縣

胡 深 鄭州吏目

耿 貴 兵馬副指揮

趙 瑞 通判

李尙友 州判

李 瑀 經歷

李希賢 州判

王 佑 教授

李天經 主簿

耿 介 州判 耿全

耿 翕 新鄉教諭

姚謙夫 府判仕三十年茅屋數間田不百畝

李鳴陽 恩貢府同

姚恒夫 訓導

王敬由 訓導

國朝

姚運嘉 長山訓導

例貢 例監附

明

王道 豐縣縣丞

白浩 成河主簿

武雙 肅之子彰德府經歷

徐賢 榮府引禮舍人

石鐸 良卿縣丞

王連 慶陽府照磨

孫仁 黃巖主簿

李佐 新鄉主簿

張璽 六安吏目

張珍

王良卿 金壇主簿

王良弼 靜海主簿

張增 忻州判官

米天衢

劉暢 石州吏目

王曠

李洪

袁繡

劉漢 河南布政司理問

汪國相 澤州吏目

郭廷 繁峙縣丞

張勅

顏孔耀 東安主簿

王前 廬陵主簿

館陶縣志

卷之五 例貢

十三

殷雨 真定府檢校

汪汝器

溫邦憲

劉邦瑞

孫居仁

柴業儒 河南主簿

韓士進 德安王府典儀

王梯 耀州吏目

武建勳 德智之子鎮源主簿

殷尙義 滌陽主簿

靳思度

趙鑑 崑崙吏目

王化民 順義縣丞

柴崇儒

郎東洋 唐縣主簿

汪鶴齡

汪邦教

武照遠 建邦之子

魏秉義

宋心傳

邵龍田 長沙府照磨

汪邦寧 邳州吏目

張文慈 主簿

邵龍潭 濬府長史

樊世榮 經歷

汪承性 泗州州判任三月掛冠歸泗人義

汪若愚 光祿監事

王國賓 鴻臚序班

王洪泰

楊芳盛

譚聖道

韓新命

韓基命

張嘉猷

王栢茂

李心精

國朝

汪一鶴

張懋德 考授州判

曹邦紀 經縣縣丞

汪 濂 蒲圻縣丞致濟粟監

李 晨 考授縣丞

崔治國 桃源縣丞

平相乾 景州吏目

耿江左 考授州同

白彪

平 正 考授州同

館陶縣志 卷之五 續例貢 十四

李 珍

秦和鼎 考授州同

續例貢

明

張 瓚 嘉靖年間東明縣縣丞

張文慈 鳳翔府照磨

國朝

張克寬 守城有功授都司

耿願愚

高文璘 有傳

李 涵 考授縣丞有傳

徐 璉 考授州同

張 忍 考授州同

李 溥 候選訓導

李 洽 考授州同

陳心正

張 恕

李 湘 候選訓導有傳

耿壽平 重慶通判保舉

高 枚

高 榦 平涼知縣保舉

李志杜 候選州同

汪之佐 考授州同

李志棟

李志梓

馳封

元

劉淵 以子源官封宣武將軍妻馮氏封彭城太君

劉棄 以孫弼爵贈昭武大將軍上輕車都護清河郡開國伯妻良氏贈清河郡太君

張昇 以子弼爵贈鎮國上將軍加護軍清河郡開國侯妻徐氏贈清河郡太夫人

明

劉鑑 以子志秩贈承德郎陝西慶陽府通判妻朱氏安人

郭維貞 以子良秩贈光祿寺少卿妻侯氏封太宜人

武肅 以子雷秩贈奉政大夫

白政 以子祥秩贈文林郎

館陶縣志

卷之五

馳封

十五

耿耀 處士以子明秩封文林郎貴州道監察御史妻宋氏贈孺人王氏封孺人

武雲 以子德智秩贈文林郎寶坻知縣妻李氏贈孺人

王持 以子寶秩封徵仕郎永平府經歷妻張氏贈孺人

楊傑 以子師震秩贈戶部主事妻武氏封太安人

武德智 以子建邦秩贈奉政大夫山西按察司僉事妻劉氏贈宜人

耿僉 國子監生任建昌府經歷以孫如杞秩贈通議大夫都察院右副都御史妻張氏贈淑人

耿洛 庠生以子如杞秩贈通議大夫都察院右副都御史妻許氏贈淑人

姚惟一 以子鏊秩贈中憲大夫淮安府知府

邵琰 以子龍潭秩贈工部營繕所正

汪應詔 以子承性秩移封徵仕郎金吾前衛經歷司經歷妻徐氏贈孺人

汪應科 以嗣子承性秩贈金吾前衛經歷司經歷妻徐氏贈孺人

汪邦寧 以子若愚秩贈光祿寺監事

國朝

耿含光 訓導以子願魯秩封翰林院庶吉士妻蔣氏張氏贈孺人

續地封

馬雲臥 以子延眉贈明威將軍

徐爾昌 以子璉贈儒林郎

恩蔭

明

耿大光 以父如杞蔭歷任南京刑部湖廣司主事

耆賓

閆心潤字厚泉康熙六十一年鄉飲耆賓

老農

雍正元年 恩詔三年舉一老農頂帶榮身自元年

館陶縣志

卷之五

續地封

老農

十六

為始

軒良政

溫守金

孫效爽

閆相吉

閆獻珍

李進本

重刊館陶縣志

地130.115

33.2

122

館陶縣志卷之六

賦役志

田賦

戶口

鹽課縣政附

古取民之法因田而作供按丁而給役近日總括爲條編厥制簡易顧立制原以便民後乃徵徭紛沓實浚吾民以生也其何以堪陶民素馴良急課稅義不受逋租名年來軍興供億數倍往昔民一苦于輸納再疲于奔命殆貧且憊焉當事者念邦本而重甦其困幸矣鹽課郵傳邑偏受其弊附記之以告來者志賦役

田賦

明萬年官民田地一萬二千二百八十五頃八十一畝六分六釐一毫

夏稅實徵麥一千四百六十九石三斗三升六合三勺

農桑折絹銀四十三兩四錢八分六釐

絲綿折絹銀一百一十兩七錢七分二釐

秋糧實徵米二千七百三十一石二斗五升七合八勺

館陶縣志

卷之六 田賦

一

京庫地畝花絨錢五十一兩六錢七釐五毫

馬草銀一千三百零一兩六錢三分五釐

鹽鈔起運京庫存留府庫無閏共餘一百八十七兩二分一釐八毫有閏共銀二百二

兩六錢一分三釐二毫

土貢狐狸皮十張

馬額孳牧馬二百二十四匹明隆慶二年奉例裁革每匹徵草料銀一兩共銀二百二十

兩解京俵馬四十四匹本色二十二匹折色二十二匹

鹽一千五百四十引

課程有閏五十一兩零九分三釐九毫二絲無閏四十七兩三錢二分 以上正賦

戶部本色黃蠟銀一百一十四兩

工部都水司料價工料磚料木柴并 京師柴薪皂隸直堂工食滴珠價胖襖狐狸皮

柴夫及各脚價共銀一千五百三十一兩五錢四分四絲



祭文廟啓聖名宦鄉賢祠社稷山川厲三壇八蜡馬神廟共銀八十一兩一錢

鄉飲銀十二兩

歲貢銀十八兩

舉人車價銀二十二兩五錢

進士舉人牌坊武盤費長夫銀六十兩

平山衛料價銀三十五兩

扣解薊鎮民兵銀二百零八兩

軍門標下馬步兵五名連閭共銀八十兩四錢四分六釐六毫

分巡東昌道團操步兵馬快步隊民壯共四十六名連閭共銀五百八十兩六錢五分

三釐三毫

協濟聊城撈淺停役夫二十五名連閭共銀一百六十五兩五錢

淺舖亭役夫二十四名連閭共銀一百五十八兩八錢八分

館陶縣志

卷之六 田賦

二二

見役淺舖夫七十二名工食連閭九百六十四兩八錢

館庫開河驛二名銀九十二兩

太平驛等銀七款共一百二十二兩二分七釐

平府薪銀三十七兩二錢

傘扇夫三名 皂隸二名 禁卒一名 每名俱七兩二錢

清軍同知心紅紙張銀十兩

知縣俸薪銀六十五兩六錢六釐三毫三絲

心紅并修宅家伙迎送上司傘扇共六十兩

吏書十二名 每名十兩八錢 馬快八名 每名十八兩

倉庫書各一名 每名十二兩 修理倉監二十兩

門子二名 皂隸十六名 民壯五十名

燈夫四名 禁卒八名 橋傘扇夫七名

庫子四名 斗級四名 以上每名俱七兩二錢

主簿俸薪三十四兩二錢一分七釐八毫

書辦一名 門子一名 皂隸四名 馬夫一名 每名俱七兩二錢

典史俸薪三十二兩五錢七分七毫

書辦一名 門子一名 皂隸四名 馬夫一名 每名俱七兩二錢

儒學教諭訓導二員俸薪共六十五兩一錢四分一釐四毫

齋夫六名 每名十二兩 膳夫二名 每名十二兩

喂馬草料二十四兩 門斗五名 學書一名 每名俱七兩二錢

巡檢俸薪三十二兩五錢七分七毫

書辦一名 皂隸二名 弓兵十四名 每名俱七兩二錢

司兵九名工食連閏六十三兩二錢四分

孤貧五十四名月糧花布共一百六十八兩六錢

館陶縣志

卷之六 田賦

三

走遞馬十八匹 每匹草料三十六兩 驢六頭 每頭草料十四兩四錢

走遞青夫十八名 每名八兩

走遞白夫三十九名 馬夫九名 馬牌子一名 每名俱十二兩

供應銀四百七十一兩四錢七分五釐

以上係照舊日全書詳列以備參考

一地畝于順治五年察荒御史盡報成熟今將歲徵之數開列

徵糧地一萬二千二百五十五頃五十六畝八分一毫每畝徵銀二分九毫七絲六忽三微三纖六沙七渺六溟每畝徵麥九勺九抄五撮四圭六粟六顆每畝徵米八

合二抄九撮五圭四粟一粒內有

寄莊地三百五十八頃一十三畝八分二釐七毫除正項于原額地畝內派徵外每畝外徵銀二分以上兩項共徵銀二萬六千四百二十三兩九錢六分七釐八毫七絲七微二纖共徵麥一千二百二十石共徵米九千八百四十四石六斗五升七合五勺

六撮

額外荒地地一百五十七頃四畝一分二釐八毫每畝徵銀一分二釐八毫八絲七忽
三微五纖共徵銀二百二兩三錢八分四釐六毫六絲

馬場租地五頃二十六畝八分每畝徵銀四分三毫五絲四忽四微四纖一沙九塵一
渺三漠四埃三溟共徵銀二十一兩二錢五分八釐七毫二絲

額外窰廠地九頃二十四畝六分五釐五毫每畝徵銀一分八釐共徵銀一十六兩六
錢四分三釐八毫

又請議歸併漕截銀兩等事案內以康熙十一年爲始加閏耗銀三百五十七兩二錢
八條徵編解米三百五十七石二斗八漕項徵給

條編非古也說者謂條編法行按畝科徵膏腴斥鹵無所區別農夫病焉今二等地
畝折成一例均輸正供誠不必剖上下而異之至各項條目合爲一則無紛出之名

有彙征之實民頗稱便且行之近七八十年代更而制弗易亦足明條編之不爲民
館陶縣志 卷之六 田賦 四

害矣明之季年法壞弊叢飛詭侵漁扶荒影射經界日淆縣治東北隅猶甚焉邇年
以來屢議請丈法未盡善果 然積弊亦漸次釐剔矣恭讀

世祖章皇帝勅諭曰催科之中寓以撫字有司之責也至哉
王綸敬而承之厥勿斃哉

戶口

明洪武間戶一千六百九十九口一萬一千九十九萬 二年戶一萬五千六百六
十四口三萬七千五百一十七二十八戶二萬一千八百五十口六萬六千四百
九十七至崇禎間編氓日繁按籍漸增加至六萬九千六百一十八丁

國朝順治四年題明除逃亡人丁三萬八千三百六十五丁實剩三萬一千二百五十
三丁

十一年新增六千八百六十四丁

康熙元年以後接年編審新增人丁一百七十六丁共實丁三萬八千二百九十三

丁除鄉紳舉貢生員優免三百九十九丁照例免派實在應差人丁三萬七千八百九十四丁每丁徵銀四分共徵銀一千五百一十五兩七錢六分

陶生齒繁育較他邑爲最明萬 中丁男至六萬餘古稱臨淄七萬戶三有其一焉
泊後兵荒流亡滋多

國初編籍未及原額之半今生聚三十年計所增僅符萬 初年之數不逮其中葉大抵編審時吏胥縮爲奸有人久亡而尙掛黃冊者有戶極繁而鮮登簿籍者土廣之家或反冒虛丁以圖影射嗟乎此近日通弊矣至人思樂土往往遷徙流移不顧其閭里良司牧其忍膜外視之乎

附載地丁錢糧起存數目

順治十四年奉

旨額定錢糧俱照萬 年間則例其後增加盡行蠲免將地丁實徵起存數目刊布全書直省遵行迨康熙三年各部寺錢糧歸併戶部畫一簡便殊省考成之累茲依由

館陶縣志

卷之六 田賦

五

單開列于左

起運

戶部丁地折色銀二萬三千四百五十九兩八釐四毫二絲一忽九微九纖八沙三塵
五渺

本色黃蠟花絨狐皮牛角弓面正費銀六十八兩四錢五分五釐四毫六絲九忽三微
四纖七沙五塵

漕糧正耗閏耗併運軍行糧及閏月本色米九千五百一十六石八斗六升八合二勺
抄四 輕資蓆草腳價閏耗併運軍行糧及閏月折色銀一千一百五兩五錢六分
九釐三毫二絲六忽四微一纖六沙六塵六渺

臨清倉正耗本色米六百九十石六斗五升七合五勺六撮 本色麥一千二百二十石 蓆草腳價併折色銀六百二十六兩二錢一分一釐三毫五絲四忽八微一纖
河道下停役淺鋪夫等銀三百四十六兩五錢四分二釐四毫三忽四微起解本府上

納

本縣見役淺舖夫七十二名連閭共銀六百七十三兩一錢九分六釐

存留官俸役食并起運脚價雜支等項原共銀二千九百三十一兩一錢三分九毫八

絲七忽八纖五沙八塵五渺

于順治九年裁扣二百一十七兩九錢五分五釐六毫七絲三忽一微一纖

順治十三年裁扣六百八兩八錢四分一釐二毫七微六纖三沙三塵五渺

順治十六年裁扣一百八兩六錢七分一釐二毫

順治十七年裁扣一百六十二兩六錢八分五毫八絲二忽二微一纖五沙

康熙二年裁扣一百七兩八錢六分六釐七毫

康熙三年裁扣一百四兩九分七毫

康熙五年裁扣一百二十二兩四錢六分八釐八毫七絲六忽二微五纖

康熙七年裁扣二十五兩一錢六分八釐八毫七絲六忽二微五纖

康熙十四年裁扣六百六十三兩二錢九分一釐二毫八絲三忽四纖七沙五塵

存銀九百二十八兩八錢三分一釐八毫三絲一忽七微細款悉載全書

驛站里甲夫馬共銀一千四百九十八兩二錢六分六釐三絲四忽五微九纖

館陶縣志 卷之六 田賦 六

康熙十三年裁扣一百五十八兩九錢四分六釐六毫七絲四忽五微九纖

康熙十三年裁扣六百六十九兩六錢

康熙十四年裁扣二百三十三兩一錢一分九釐九毫六絲

存銀四百三十六兩六錢款項載在全書以上存留俱遵奉 部文銀七錢三微支

續田賦

清地均里記

知縣郎國楨

賦役者上之所以爲治下之所以奉。上宜清而不宜濬，宜均而不宜歛者也。蓋役起於賦，賦起於田。其事原相因而田不清則賦不均，賦不均則役亦不均。其弊亦相因。然則欲均賦役，莫先於清田矣。而正有未易言者。魚鱗久湮，事同枵始，經年累月，莫覩厥成。則始終之難，冠蓋旁午，鷄犬易驚，食費冊張，設處無項，則擾費之難。因循既久，肥瘠皆耳，更不任德抑先，歛怨則信從之難。耳目難周，手足有限，勢須旁寄，易假之緣，則涉歷之難。夫欲爲民去弊而廢時惜費之念，萌於中，任勞任怨之難。掣其後，何怪前賢事事修舉，獨於清丈一節，止稍去其太甚，而以搜根拔本之任，貽之後人乎。余初承乏斯土，簡查賦額，包空至若干頃，歷來俱係民戶里長包賠苦累，已非一日。熟思其故，蓋邑累經兵燹之餘，民多逃亡，去籍前令以稅課無出，募人認種承糧，以爲已業。彼時固不暇計其所認之多寡虛實矣。而山左差徭每重於賦，故豪強隱占而黠巧者寄投較他處爲最，欲不縮而求盈，得乎更甚者，自增征田房稅契。前令遂聽民相過割，以求及額。於是有田在東而過併於西，田在南而過併於北，咸趨於田多力厚之里。里甲之田至有相倍蓰者，田不土著，稽覈難施，不但差役偏枯不堪，而里長之催收最苦。遠涉余曰：是不得不議清丈矣。非清丈則占者無由出，寄者無由歸，隱者無由清，浮者無由實，而空終不可補。然不但不可使百姓先受清丈之累，而不可使吏民預知有清丈之舉。任其費任其勞，任其怨不至廢時失事而已。故初不言清丈也。先清隱占，凡糧少而地多者，詭掛以幸免，差徭者俱准自首免罪。仍蠲前逋三令五申，而後應者十一二不應者十尙八九。蓋吏與民未易相信，而難與慮始如此。復爲之令曰：清坐落令每村甲長各將一村之田比櫛而書之，某若干畝，草冊送縣。因各頒官尺令地主同鄰甲自爲丈量，或照舊冊多若干畝，亦准自首，或照舊冊少若干畝，准與減除。或爲撥補，令各實書一櫛插已地段曰：余將親丈，丈而有數溢於櫛所書者，追擬無赦。人人知將親丈也。於是自首者并認懇者，惟恐後仍一概免其前逋，而余實無庸親丈也。向非有所撥補減除

則幾及原額之數矣於是以前所坐落之村方易爲東西南北之名色因此立保不勒地歸里總計縣田若干而四分之爲四保又總一保之地而七分之爲七里又總計一里之地而十分之爲十牌此外若宦儒若荒田若逃絕若寄莊者亦總計共若干則每保各該若干每里各該若干每牌各該若干多寡適均而民無所施其避就矣里長之催呼近者本村遠者五六里而征比便矣選擇書算之吏給以飲食紙張聚之公所彙冊而親定之凡四五番始得脫藁而所費亦不貲置屋以貯以庶幾魚鱗之意永作後來之鑑然而各里猶有包空存者何也則又非特撥補與減除之故也蓋昔之包空在官而尙有色空在民者如里長之相沿包補各若干舊冊有糧而無地各若干應當同前爲減除者也至邑爲九河支道河身尙存荒沙極目遇風颺遷流吹沒所云河身荒沙走風薄地而舊應大糧者不就此時一爲折併將來勢必逃亡貽累里長余於是親行查驗先爲之約無問風雨履畝踏看或降爲荒田或改爲折二而民亦善體吏意有以籽粒而願升大糧者於是將適符之數仍有缺額須包如今冊之若干頃要之昔之包空累在偏重今之包空擊於衆舉也然則過割不可行乎曰過割無妨也所當不時就近變通使不至於懸絕偏重耳若夫所降所折之地年深月遠必有以原係大糧改折而今何反致衆人代爲包空應仍升爲大糧以補還原額之說搖動司牧者則逃亡可立致是在後君子主持之其缺額及今查出認懇升糧補額并降折細數悉附於後四載成勞一覽在目矣若夫神而明之不事鉤致而發隱摘伏以適符原數則以俟後之君子

計開

二十七里原舊包空地共一百八十五頃四畝三分五厘一毫五絲

又舊無人無地逃戶包空地七十四頃一十三畝七分五厘

二項共包空地二百五十九頃一十八畝一分一毫五絲

查出自首糧地一百九十四頃五畝五分二毫

查出荒田改大糧七頃七十九畝四分六厘七毫

查出荒田改下地三十四頃六十一畝九釐 升

大糧一十七頃三十畝五分

查出下地改大糧二頃五十七畝三分三釐 升

大糧一頃二十八畝六分

查出^{蘇蘇}改大糧地七頃八十三畝三分二釐二毫

今抵補實在民地丈少缺額包空三十頃六十五畝三分五釐四毫

又大糧折下地一百二十三頃三十一畝五分六釐

去大糧六十一頃六十五畝七分八釐

又大糧改荒田三十一頃九十五畝七分九毫

又下地改^{蘇蘇}五頃九十二畝 去大糧二頃九十六畝

現今實剩包空地一百五十九頃八十三畝三分三釐一毫

均牌記

館陶縣志

卷之六 續田賦

九

山左賦輕而役重而館邑以濱河尤甚若柳束若藤舫若繹夫募夫車輛諸大役余既一歸之地矣而至於縣中之差舊例原取諸牌然牌甲之均否全視乎人丁之多寡牌同而人之多寡不同則不均余以爲既均里自不得不均牌欲均牌自不得不先論人向以十戶爲一牌者止便於稽察逃盜耳今輪差則不論戶而止論人論人則其人之少壯老幼必有司徧歷而親驗之而勢有所不能於是令各寨地比戶而書之凡一家之父子兄弟無論老幼但年十六以上者悉實書諸冊送縣徇情賄賣遺漏者有罰遂摘其尤者懲以徇乎鄉而嘖嘖有後言矣以爲勢將盡人而編之以貽斯邑無窮之害而不知余蓋欲人人親驗以定去留不使書冊者得高下其手以滋弊也既而惟已成者編之老者除之曾不旬日衆方釋然大約以四十人爲一牌畸零不及數者則爲幾分其地瘠而人貧之區則或以五十人爲一牌更瘠貧者以六十人爲一牌遙準乎地以爲損益又不盡拘四十一程式也則又聞之言者曰富室每多單丁而貧家偏繁支庶今茲之役無乃反數倍於富戶而浚我以生乎如若所云豈天真有所豐於此而

嗇於彼哉無是說也果如所言獨不曰貧者人多則力傭者必多富者人少其牛畜必不少數不既相當乎設或富者人多而牛畜又多貧者人少而牛畜又少彼亦執一說以相衡又將何以應之譬有一事於此值需十工昔以十人任之則各得一工若以四十人任之則四十人方得一工孰多而孰少也且余來此幾六期矣曾不煩一民必不得已則給費如僱倩然今願不便耶則又有進而言者曰吾儕小人正惟樂公之便安公之簡易而愈不能不過計也盡如公者論戶可也論人亦可也法立而不泥於法神而明之高下在心豈慮壅蔽吏習而民安安得盡如公哉設異日有所苛求未必遽深明其故左右得以關其說以意輕重頭會而箕歛之似不免於多一人則多一人之累矣則又爲之解曰爾何輕量後之君子哉凡余所建明正藉後之君子調剩而潤澤之余不足道也且凡立法者必先自處於無弊而後可期諸永久未有先叢弊而貽斯民以害者也余籌之審矣不論戶而論人人衆則事易舉也瘠貧之地酌增之則畸而適得均也僉差就其地近而易辦也餘不概僉休其力也若計工今日易盡之功卽異日館陶縣志

卷之六

續田賦

十一

亦此易盡之工可以終日而畢也若計費今日有限之費卽異日亦此有限之費可以按人而稽也盡之圖登諸志註明其道里遠近田土肥磽人戶殷窳官旣一覽易知吏亦無由高下余籌之審矣爾何慮其所不當慮哉僉曰吾今而知公之按人輪差牌非復昔之牌里非復昔之里所以爲民計久遠者如是其詳且盡也吾儕小人又何慮乎夫然而牌始得均也豈易易哉

除崔糧包空由

趙知希

館邑舊有包空糧地若干畝攤入於各里各甲之內里書詭其名曰崔糧每年各著於各甲之滾頭賠納而云云也乙巳秋八月余始抵任查檢地糧冊籍見崔糧其名者甲有其人數俱相等召吏而問之吏曰是故有糧無地而並無人者也合縣之通患遞年之官民受累矣余執冊而憮然曰焉有無地有糧有糧而以滾頭一人者賠納哉彼滾頭身任催糧之勞而又予之以催糧之累亦可謂偏枯之至矣爲通邑除患當先從崔糧始先是春間前任武功楊君矜念孝平二里之沙壓逃亡地畝欲爲設法開除攜帶

赤簿丈干親詣各鄉履畝清丈分毫積之共長出地二十五頃五十畝議未成而調任蓬萊余曰是宜先除崔糧第恨數不符而未能盡除嗣經余又查出漳水新淤沙窩地二十一頃合之楊君所丈長地共四十六頃五十畝其去空糧之數所爭無幾遂將此地頂補崔糧并各項包空外尚存審廠荒田包空地十二頃八十畝姑以俟之異日越明年所謂崔糧者則永除藉矣或曰楊公爲孝平沙地清丈今公盡以頂補崔糧包空毋乃失清丈之本意乎余曰不然楊君愛孝平二里之民獨不愛館陶通邑之民哉今崔糧除藉爾等宜德楊君而余不有焉至於先崔糧而後沙壓則有說沙壓一方之患也而崔糧則通邑之累矣沙雖壓其地尚存而崔糧則無其地矣沙壓而逃亡亦終有其人而崔糧則無其人矣且沙壓地連千餘頃而以所長二十五頃開除之爲數亦無幾矣持杯水而救輿薪吾未見其有濟也况夫沙壓非盡不毛之地宜減則不宜開除彼逃者逃於大糧之累倘得減則或逃者思歸亦不可知勞來安集當另有補救之法余固未敢一日膜視孝平之民也他日晤楊君其亦當首肯余言矣衆曰善

館陶縣志

卷之六

續田賦

十一

一館邑舊遺大糧包空地三十頃七十三畝三厘一毫係二十七里均攤每里攤賠包空地一頃一十三畝八分一厘六毫册名崔糧爲遞年通邑滾頭之累

一遺荒田包空地二十二頃六十三畝四分二厘六毫二十七里均攤賠包空地八十三畝八分三厘一毫亦遞年滾頭之累

一遺審廠包空地五頃九十三畝九分一厘四毫二十七里均攤賠包空地二十一畝九分八厘二毫亦遞年滾頭之累

以上共包空地五十九頃三分七釐一毫

一雍正三年二月清丈各里長出地二十五頃五十畝二分四釐八毫六絲

一雍正三年九月續查出漳水新淤沙窩地二十一頃一釐

以上共查長出地四十六頃五十畝二分五釐八毫六絲

一抵補大糧包空地三十頃七十三畝三釐一毫

一抵補荒田包空地一十五頃一十八畝八分四釐二毫六絲除抵尚存荒田包空地

七頃四十四畝五分八釐三毫四絲

一抵補審廠包空地五十八畝三分八釐五毫除抵尚存審廠包空地五頃二十五畝一分二釐九毫

以上除將查出長地抵補外實存審廠荒田共包空地十二頃七十九畝七分一釐二毫四絲

孝平沙薄減則記

趙知希

余既開除崔糧包空之後嗣適奉檄清查民間隱漏並不毛之地館邑甫經清丈後無隱漏而有沙薄矣願沙壓則斷難遽謂之不毛余於丙午之五六月間卽履畝勘丈沙地見一望平原菁菁滿目余呼里民而責之曰若何以自輟爾耕也民曰不然是地經夏雨後沙凝而草微長若耕則必於春間起土土解則沙飛乘春風之狂烈彼萌芽甲拆者連根悠揚矣及細查其所謂菁菁滿目者皆長不踰寸堅勁異常之茅蓋誠瘠之至者問見有樹木支離叢長之處余又進里民而責之曰若何以不盡藝樹民曰是半

館陶縣志

卷之六

續田賦

十一

皆逃亡無主誰敢藝之余曰爾等第盡力招徠余聽爾民便衆曰不然沙地種樹必得掘深見土方能滋長自非有力者不能朝種而糧夕隨之有力者不願也余曰然則向時之糧何以遞年全完今何以節年拖欠至六載於茲乎衆曰向地雖薄間有可耕種至康熙五十八九年間春風狂暴河底荒沙壓入民地年深一年加之水旱不均逃亡日盛而至此極也過此以往又不知作何光景矣自南起張沙北抵薛店中間七八十里之地大略相等合之河西舊河荒沙不下千餘頃除薄地猶可耕種不論外實在不能耕種與夫逃亡年湮之地得若干頃余目擊心傷急上其事於諸臺而終嫌其不實在不毛與例相謬也再四籌躇量於沙地照荒田減則其缺額銀米攤入於合縣大糧上地之內事上而諸臺猶以民不樂輸爲慮余召集闔邑里民而告之曰若非與孝平二里同桑梓者乎曰然孝平之民流離顛沛至於斯極若知之否乎曰知之悉矣國家經費所關能使分毫懸額乎曰不能孝平之民逃亡既盡其懸額獨非館民之額乎曰然也余乃正告之曰余爲爾父母爾等各里之民猶兄弟也爾左手疲癢痛楚右

手有不爲撫摩者乎無是理也且爾民急公奉上余亦稔知之上年丁攤地畝陶邑額外增銀一千四百餘兩每畝攤銀二厘半爾等順輸無辭今孝平減則所攤不過每畝三毫餘爾等奚遽不堪乎同患相恤度亦義無可辭也且爾今日之上地保無有異日之水衝沙泛者乎孝平之沙地或年深歲久沙沉土浮復爲上地亦事理之不可知者後之君子亦必有爲爾民斟酌盡善之道爾其樂輸乎否衆曰吁公體民至此其有不體公意樂輸者此日又集合縣之紳士告之亦然紳士遂以樂輸具呈出結前來再上其事於諸臺諸臺則亦深嘉吾館民之急公好義也自是而孝平二里之民可謂入沸而少去其薪矣是役也前後玉成者

太守金公

藩憲張公

撫憲塞公監委勘官邱縣王君也余以上下駁飭遲延被參事成而心實耳之閱雍正之六年館陶賦額遂爲之小變云若夫沙地之則既減勞來生聚逃亡復歸樹藝牧

館陶縣志

卷之六 續田賦

十三

養任土擇宜何遽遂無資生之道乎然且暮之間瘡痍難起後之君子勸課撫恤之法於二里尤加之意焉則幸甚

丈查得孝平二保沙壓地三百三十五頃六十九畝一分六厘原同大糧地一例當差每畝科則二分五厘二毫五絲三微三忽五纖二沙一塵三渺三漠三埃五溟共徵銀八百四十七兩七錢三分三厘八毫一絲八忽二微七塵六渺七漠四埃八溟每畝科米七合七勺五抄七撮四圭五粟三顆五粒共徵米二百六十石四斗一升一合二勺於雍正四年在於請寬隱糧之嚴例等事案內請詳照荒田則例每畝徵銀一分四厘三毫八絲一忽七微三纖五抄六塵二沙六漠八埃該徵銀四百八十二兩七錢八分二厘七毫八絲四忽三微三纖三沙七塵四渺九漠四埃九溟外所遺缺額銀三百六十四兩九錢五分一厘三絲三忽九微六纖七沙一渺七漠九埃九溟并遺額米前數均攤於合縣大糧地一萬一千九百一十九頃八十七畝六分四厘一毫之內每畝均攤銀三毫六忽一微七纖一塵四渺九漠二埃六溟每畝均攤米二勺一抄八撮四圭

六粟八顆以補足缺額之數於雍正五年三月間由 府詳 司轉呈

巡撫部院塞 蒙 批加詳轉飭遵照在案

丁歸地案

館邑舊存完賦人丁三萬九千八十八丁每丁徵銀四分共徵銀一千五百六十三兩五錢二分於雍正二年十月初四日蒙

巡撫陳 俯念通省丁自爲丁地自爲地久不相涉家有田連阡陌而全無一丁者窮無寸土反承納數丁者苦樂甚屬不均因以敬陳管見事

題准轉飭到縣內開館陶額該地糧銀二萬九千二百九十五兩六分五厘六毫五微二纖除臨折河灘學租潤毫班匠並寄莊外加二分等項共銀三千三百二十七兩八錢二分七厘八絲九忽八微不攤丁銀外

實剩地糧二萬五千九百六十七兩二錢三分八厘五毫一絲七微二纖照例每兩應攤丁銀一錢一分五厘九毫五絲七忽五微一纖九沙五塵三渺三埃一溟共攤丁

館陶縣志

卷之六 驛政

十四

銀三千一十一兩九分六厘五毫六絲六忽七微五纖五沙三渺二漠三埃六溟較之舊額丁銀一千五百六十三兩五錢二分實加增丁銀一千四百四十七兩五錢七分六厘五毫六絲六忽七微五纖五沙三渺三漠三埃六溟自雍正四年爲始

驛政

考明萬曆間設有走遞馬十八匹青白夫共五十七名陶地僻簡供應頗給查

國朝順治十二年驛站衝僻案內館陶遞馬夫驢工料銀一千一百四十五兩後節次裁減止設馬四匹康熙五年三省總督復駐大名巡撫周有德具題館陶堂邑冠縣衝繁難支馬匹俱復原額旋裁總督仍以四匹供應邇日軍興旁午協濟衝途羽書驟至烈如星雷額設馬匹以之應鄰境且不足邑有乘傳至者茫無支應矣

鹽課

考明萬曆間陶邑食鹽不過千五百餘引其時糧兌在衛河距城二里軍民雲集富商大賈食鹽甚夥後改兌金灘商旋不至食鹽甚稀乃鹽引至今反增至七千二百

六十有四蓋由他屬遞減故陶邑歲增閭閻之家粟無擔右儲而鹽實筐篚商人列
鹽于市集久不得售商與民交病考成遂累及有司康熙七年紳衿鄒魯等公呈呼
籲比例于臨清諸處屢經詳請今內外兩商議妥外商每年運買內商鹽四千二百
六十四包每包價銀一兩二錢以足錢糧之數雖舊額未復然自是商安民便公私
無累矣

附載申文

山東東昌府臨清州館陶縣均引始於順治十七年除偏枯道之害事據本縣舉念非不魯
也其立法非不善也然辦酌之增減之中不無出入多寡之弊而本縣三萬六千人
遂因紙上之虛名致成民間之實害食鹽價值每歲一萬六千有奇等於本縣正項
錢糧考或所迫官民交困幸附郭縣實是東昌府其在城與東關居民不下數萬而
如東昌昌固屬聊城居民首名為附郭縣實是東昌府其在城與東關居民不下數萬而
一册人丁僅有一萬五千八百六十四丁相若也今册上而不及館陶二下縣人丁之
此按引丁均引零一中引誠以館陶無偏枯之弊也而酌減之館陶地方又可倍於范縣三十五縣矣
丁數反萬二千七百九十三中丁豈能無弊乎館陶下縣也成引而酌減五千大數是酌減
且夫明知前來疏銷不易至五千餘引尚不能完程少而疏銷不易引多而疏銷反不
難乎何姑酌減一引而不為之酌減也况堂邑之姑酌減一引也編私之論也夫其近
清河也陶之西地方里許即衛河也南至小灘鎮北至臨清州而天泮北直河兩行額之
船俱由陶之陶地地方何不援衛河例而酌減也且以私販臨清州而姑酌減一引也
私販難緝而即為之酌減則各縣皆以私販見告而求減乎至臨清州兩河交會且
館陶近河天津鹽船絡繹不絕獨無私販私鹽之可慮乎至臨清州兩河交會且
乃過處一城有三千四百戶在縣應派館三萬五千引而減去一千五百引高唐舊額四千
餘引一而引亦減去二千引夏津夫引多則宜減引少必不宜減乃併引至少者而亦減二千二百
又豈無弊也乎總之按丁為不一定之法乎則各邑按丁畫一不增不減可也均引為
為無定之法乎則奏館難易不一量增量減無不可也何為乎在他縣則以均引為
國課而從下修民生館陶則以均引為不易而加增立法之均固如是乎懇乞 老父母上念


館陶縣志

卷之六 鹽引

十六

命確香各處新審人丁參核各屬地畝人丁可以脫漏地畝仍歸于地多引少之處照舊
存二千七百餘引三萬六千四百三十五丁食鹽三萬七千三百三十二引此係本縣知
縣鄭二千七百餘引三萬六千四百三十五丁食鹽三萬七千三百三十二引此係本縣知
所以引多者蓋因先年河南糧廠駐軍北門已去商賈不來又迭選經兵火冊上人丁
也虛引未明者糧廠移至直隸小灘鎮軍戶已去商賈不來又迭選經兵火冊上人丁
二引本縣食鹽者既少而鹽引不減至順治十七年按冊上丁均支引增至五千七百
弊查陶邑種煙陋規無一不以虛名受實商等比例陳情其受害也深故願請訪利
其察弊也確故語之也詳伏乞 憲臺留神省覽酌他屬之多寡懸浮丁之偏累仍
照二千七百餘引三萬六千四百三十五丁食鹽三萬七千三百三十二引此係本縣知
又申文據此卑縣覆先思均引初意原因多寡不均而均之也實為難易子易完州而均之
也當均引之際宜先察州縣之大小險人丁之虛實并奏館之難易子易完州而均之
必因其額上可也乃而過減仍照至小下縣增派六千餘引而云姑酌減一千較之舊額實
增一倍悉使卑縣更取黎偏受引多之害尤者而再懇焉如臨清州舊額一萬九千
臺已洞悉矣卑縣更取黎偏受引多之害尤者而再懇焉如臨清州舊額一萬九千

餘三引乃過滕縣一萬額三千四百止存五千六百餘引將徐州舊額二萬六千引乃過下縣一萬三引乃過滕縣一萬額三千四百止存五千六百餘引將徐州舊額二萬六千引乃過下縣一難完之處代為奏銷亦極苦矣今新復八萬引又不按乎伏祈二百查憲州大縣小舊額分派獨加館陶下縣二千一百九十餘引不幾苦上加苦乎伏祈二百查憲州大縣小舊額分在多寡將館陶代銷過增之引仍撥千臨清徐州等處在彼不過還其舊額未嘗有害在此庶幾復其舊額即獲更生矣



館陶縣志卷之七

學校志

夫士登闕里之堂見車服禮器靡不流連生慨慕則教化之所興起可知也吾陶密邇

聖域薰被詩書之澤士風彬彬尊師儒重文教亦固其宜第古制日湮諸生以時習禮視爲古事塾序之法闕焉久不講此茂草所以悲也邑舊有社學書院雖并淪廢畢書爲後世法志學校

儒學 在縣治東南大成殿東西兩廡前爲戟門左右名宦鄉賢二祠前櫺星門後爲明倫堂博文約禮二齋規制具備金皇統中縣令孔淵建元至元中縣尹劉著大德中溫仲謙相繼重修翰林張士觀有碑記已圯于水明初縣丞歐陽源重修尋復圯于水繼修者則永樂間知縣邳宣天順間知縣邢政成化間知縣唐禎正德間知縣孟正也給事中傅良弼以其而城開城一門名文明門外立萬仞宮牆坊嘉靖十年

館陶縣志

卷之七 學校

一

勅建敬一亭刻御製箴如制知縣史官又建啓聖祠于殿西南有碑記知縣朱時叙創浚泮池隆慶間知縣高自新重修兩廡名宦鄉賢二祠萬曆甲午知縣趙汝弼整飾宮牆王希龍繼之邑人解邦相重修殿廡齋舍撫按表其門天啓壬戌知縣楊于國修未竟陞任去癸亥知縣翟化儒竣其事崇禎戊辰知縣張腆重修并有碑記國朝順治十二年教諭閻應震募修大殿己亥知縣孫雲錦修兩廡戟門庚子署教諭舉人賈文燁修齋房

大成殿五間 東西廡各十二間 戟門三間 櫺星門三間 明倫堂五間 康熙十三年知縣鄭先民重修 博文約禮二齋 今廢 敬一亭 康熙十四年知縣鄭先民重修 啓聖祠三間 名宦祠三間 鄉賢祠三間

舊志儒學教諭訓導官宅三所在殿西前有饌堂號房今多傾廢見存學宅一所內堂房三間 東西廡房各三間 前廳三間 西房二間 學門一座

舊志書籍 四書大全 五經大全 性理大全 通鑑 今俱散失宜更補置

通鑑 今俱散失宜更補置

明制學生二十名增廣二十名附學生無限額

國朝初盛至三百人順治十八年併科歲考減舊額之半名數少前今仍復行兩考見在庠者二百餘人 縣學例二年一歲貢康熙二年停八年旋復如舊制 武生員

明崇禎間湫設屬東昌道考取後歸督學考試今因之

射圃 在東門外廳三間明嘉靖間淪沒

社學 在後街府館東草房三間久圯

陶山書院 在城隍廟東有廳房明正統七年建嘉靖十年知縣王良輔重修久圯居民冒爲已業

鴈塔 在東南城上明萬 十年知縣王國弼署縣事李秉愚建久壞

國朝順治 年知縣劉茂先重修康熙三年知縣王躬贊又重修塔上署文昌帝君

奎樓 在鴈塔後康熙五年知縣王躬贊建

館陶縣志

卷之七 學校

二

吾陶人文在昔稱盛蔚爲國楨表著史冊顧近百年來何寥寥甚也說者曰邑無高巖廣川鬱爲菁華故鮮以科名顯或曰水旱洊臻甕牖繩樞之子謀室家不遑安能事誦讀或曰陶猶舊也發憤興起視乎其人歲丙午邑人王公置文昌于鴈塔復建奎樓文峯雄峙殊改昔觀是秋舉于鄉者鄒子魯高子重光及余三人一時嘖嘖謂斯樓文明之兆余謂氣數互乘與人事相環應自古英傑不爲地囿蜀故鮮材得文翁之教化而文風燦然吾邑人士長養涵濡者素矣繼自今相觀振起鳴鏹長驅角勝中原余三人者其爲祖生鞭乎跂予望之

學田 明嘉靖三十九年提學副使吳查出民鄭全地五十九畝六分在城北二十里鄭家廠僧人紹崇地六十畝在城西南四十里燕邨地一頃一十九畝六分隆慶六年知縣高自新查出趙義地二十七畝二分共地二頃六十六畝四分俱民間佃種納租銀一十九兩六錢三分今止存地一頃九十八畝五分七釐二毫租銀一十五兩六錢三分二釐奉學道取解

附種學田地人數姓名

鄭玉民六十三畝

張自道三十九畝

張德懋五十四畝八分七釐

劉聲洪十二畝七分一釐

張垂紳十畝七釐七毫

張孟春八畝九分三釐三毫

張仲山五畝一分五釐九毫

韓璋四畝三釐

續學校

大成殿五間

雍正九年教諭于光祖揭瓦督工生監卜釋孔郭思忠劉師寬戴冕李志杜李志朴

東西廡各十二間

雍正七年八年間傾壞無存
雍正十年知縣曹纘重建墻易坯以磚督工李志杜李志朴

戟門三間

雍正十年知縣曹纘重修督工李志杜李志朴

櫺星門三間

雍正十年知縣曹纘重修督工李志杜李志杜

啓聖祠三間

康熙四十二年知縣陳冕修

名宦祠三間

雍正十年知縣曹纘重修俱易坯以磚

鄉賢祠三間

雍正十年知縣曹纘重修督工李志杜李志朴

明倫堂五間

雍正十年知縣曹纘重修督工李志杜李志朴

忠義祠三間

門垣俱全雍正四年知縣趙知希建

奎樓

康熙四十四年知縣陳冕修題額筆花蓮夢

鴈塔

康熙四十四年知縣陳冕修

館陶縣志

卷之七 續學校

四

書籍惟性理四書數冊尙存

曩有今無尙須增修者開列於左

博文約禮二齋

倉房二座

見圖考

儒林坊

見府志

興賢坊

見府志

師生號房二連三十間

見府志並圖考

饌堂三間

見府志

宰牲堂三間

見府志

萬仞宮牆坊

見建置

陶山書院

射圃

社學

曩無今有見在建置者開列於左

御碑亭

御製訓飭士子文碑

御製孔子贊碑

御製四子贊碑

勅建忠義祠在啓聖祠後詳建置督工李志杜李志朴

學宮內廚房一間盆架一木橙二祭品桌一 雍正十年知縣曹纘建

學田地二頃五十二畝 附種戶姓名

韓光祖 九畝

鄭王民 三十六畝二分五厘八毫

張 經 二十四畝三分

館陶縣志 卷之七 續學校

五

董 正 九畝二分五厘

董士奇 九畝二分五厘

戴學田 三十九畝五分

劉源續 五畝八分五厘

劉中一 四畝

董 理 九畝二分五厘

董士秀 九畝二分五厘

劉洪聲 十七畝五分

劉 晉 五畝八分五厘二毫

入學原額十二名雍正二年奉文行查各省府州縣人文最盛之處詳明

題請廣額雍正三年知縣趙知希教諭陳承祖訓導鄭士震遵查館陶縣人文較昔頗

盛詳明

題請廣額自雍正四年科考取進十五名著為定例義學

青陽城村義學地三十六畝七分二釐初係周元之產因元逃荒後遺此地錢糧為里

甲累順治五年貢生孫振宗生員張元閻顏魯生呈請設立義學以課村中子弟每年

地租除納糧外存為義學膏火其糧坐北八里八甲後有盜當此地者而義學遂廢前

任趙公審斷贖回乾隆元年署任張公又立案仍令延師訓課地租永贍義學

又書院係康熙四十四年知縣陳冕創建四十五年詳報爲義學教諭呂心佐題曰槐
舍清風取爲陶邑八景之一康熙四十七年學院趙給額興行育才今改爲訓導官
署

館陶縣志

卷之七

續學校

六

館陶縣志卷之八

祀典志

壇壝

祠廟

稽虞書肆類望山川而徧羣神天子且然矧其下乎社稷屬生靈所係山川能出雲施雨膏澤萬類是用俎豆煌煌乎鉅典已

夫子廟堂巍峨冠羣祀馨香寓內者歷幾千百年規則詳且備至城池水火諸神有默佑之說余取其大者載於編而祝釐賽禳之文無取焉吏有善績民樂祀者附錄之昭遺愛也志祀典

壇壝

社稷壇 在城西春秋仲月上戊日祭知縣奉祀牲帛祝號俱如 令甲

風雲雷雨山川壇 在城南春秋仲月上巳日祭以城隍附知縣奉祀如社稷禮

邑厲壇 在城北每歲清明中元下元三日祭先期移文城隍主壇知縣奉社

祠廟

館陶縣志

卷之八

祀典

文廟 在城治東南規制詳見學校正殿祀先師孔子兩序列四配十哲兩廡祀七十

二子及諸先儒歲春秋仲月上丁日致祭知縣奉祀佐幕教官陪祭分獻牲帛如制

舊志祭器簋簠八百一十個 磁羹碗三個 磁爵五個 磁香爐四十五個

白磁盆四個 磁酒海四個 錫羹碗一個 白酒鐘一百個 錫爵五十五個

木燭臺三十對 鐵香爐三個

考祭器今僅存十之二三僅照舊數備錄俾後之增置者有所考云

啓聖祠 在廟西南隅凡祭先師前期行禮如制

名宦祠 在戟門左祀(隋)劉仁恩魏德深(宋)劉筠宗澤(元)溫仲謙李藻沈瑀張

之綱(明)教諭李伸

鄉賢祠 在戟門右祀(魏)王榮世(宋)張瑀王沿王鼎(明)孫文義郎俛陳占劉衡

武肅郭良耿明姚鉉

城隍廟 在縣治西北有門廊正殿寢宮又官廳在寢宮東齋房在察宮西(明)天順

間知縣唐禎建宰牲房在二門外西起敬坊在二門外階上萬 二年知縣李冲奎重修萬 二十年邑民樊希進李世周繼後又有秦士進高遷捐資修之

國朝順治七年李嘉春樊得仁等倡衆丹堊煥然改觀每月朔望日知縣執香帛謁拜神前

八蜡廟 在北門外久湮

明孝宗登極之後令所在長吏羊一豕一于春秋二仲月致祭遂爲永例亦通祀也但古者于年終百穀告成之後歲正一行今擬于冬季月上戊日一祭

考伊耆氏始爲蜡蜡者索也歲十二月合祭萬物而索饗之也禮祀郊特牲曰天子大蜡八鄭康成曰八蜡一曰先嗇二曰司嗇三曰農四曰郵表畷五曰貓虎六曰坊七曰水庸八曰昆蟲

馬神廟 在縣治東北隅每春秋仲月上戊日行祭禮

龍王廟 在北門外西有殿有門

館陶縣志

卷之八

祀典 祀廟

二

孚應通利王廟 在城西二里今爲河所湮有碑文通志

火神廟 在西門內街北

關帝廟 在縣十字街北創始無攷明正德八年重修坊一座楊師震建後基地一段東瓦房三間草房一座門面房一間半山西洪洞舉人李茂實順治三年捐以供香

火

東嶽天齊廟 在城東門外石坊一座郭良建

三官廟 在北門內街西知縣章元衡有記樊自新率衆重修

真武廟 一在城西一在北門外明萬 辛亥邑民高思孝等建

國朝康熙 年邑人高選重修

碧霞元君祠 在東嶽廟東明萬 二年建

附

晉公祠 在南館陶渡口西公諱調元入名宦

程公祠 在縣後察西公諱瑾入名宦

舊有吳公祠在縣治西公諱俊范公祠在程公祠旁公諱景文吳橋人進士司李東郡歷仕至內閣大學士張公祠在范公祠西公諱星三祠今俱廢

續祀典

聖祀

大成殿祭

至聖先師孔子東配復聖顏子述聖子思子西配宗聖曾子亞聖孟子東哲閔子損冉子雍端木賜仲子由卜子商朱子熹西哲冉子耕宰子予冉子求言子偃顓孫子師東廡先賢澹臺子滅明等三十一位先儒穀梁子赤等十七位西廡先賢宓子不齊等三十一位先儒左子邱明等十六位縣有司歲以仲春仲秋上丁日釋奠屆期先三齋戒先一日率佐貳官學官詣省牲所行省牲禮齋宿學宮厥明學官率闈學諸生各執其事陳設酒尊先師一四配一十哲一爵先師四配各位各三十哲兩廡每

館陶縣志

卷之八

祀廟

續祀典

三

位各一登先師一盛太羹鉶先師四配各二十哲各一盛和羹籩與豆先師各八籩盛形鹽藜魚棗榛芡菱鹿脯豆盛菹韭菁芹笋醯醢鹿兔魚四配每位籩豆各六盛如先師籩去榛芡菹豆去韭醯醢十哲每位兩廡每位四位籩豆各四盛如四配籩去魚菱菹豆去笋醯魚醢與盞先師各二簋盛黍稷籩盛稻粱四配十哲每位兩廡每四位各一簋盛黍籩盛稷供籩左豆右簋先師四配每位十哲每五位兩廡每廡各一每簋盛帛一段白色長一丈八尺共用帛九段牲先師羊豕各一匣二盛置四配共羊豕各一各分爲四木盤四盛置十哲每五位豕一分爲五兩廡每廡豕一昭位分爲段盛俱用木盤每祭用牲羊二豕六鹿一兔九其樂舞各止六佾陳設畢樂舞生就班嚴祭鼓獻官陪祭官分獻官各就位執事捧毛血盤瘞於坎遂啓牲匣蓋行迎神禮樂生舉麾唱樂奏咸和之曲獻官及陪祭官俱行拜禮畢樂止奠帛行初獻禮捧帛者各捧帛執爵者各執爵獻官詣盥洗所盥訖再詣酒尊所司尊者舉幕酌酒執事者各以爵受酒同捧帛者在獻官前分兩行由中門入向上立餘四爵

四帛入序於神案之前獻官從左門入詣至聖先師神位前樂生舉麾唱樂奏寧和之曲獻官神位前跪捧帛者西向跪進於獻官右獻官受帛捧獻訖授執帛者執帛者跪接奠於神前案上執爵者西向跪進爵於獻官右獻官受爵捧獻訖授執爵者執爵者跪接奠於神前案上獻官俯伏興平身詣讀祝位讀祝者跪取祝文退立於獻官之左獻官以下皆跪樂止讀祝者跪讀祝文訖仍置香案上退立復奏前未終之樂奏訖獻官以下俯伏興平身詣復聖顏子神位前獻官奠帛獻爵俯伏興平身俱如先師儀次詣宗聖曾子述聖子思亞聖孟子神位前俱如復聖儀此時分獻官於兩哲兩廡一同行禮俱如前儀獻官由右門出復原拜位分獻官同樂止行亞獻禮儀同亞獻樂生舉麾唱樂奏景和之曲獻訖復位樂止飲福受胙獻官詣飲福受胙位捧福酒者跪進獻官右獻官受酒飲訖捧福酒者接盞捧福胙者跪進獻官右獻官受胙訖捧福胙者接胙由中門捧出獻官以下俯伏興平身復原拜位行再拜禮焚祝帛訖復原拜位各一揖而退

啓聖祠雍正元年奉

旨改爲崇聖祠追封五代加木金父公爲肇聖王祈父公爲裕聖王防叔公爲詒聖王伯夏公爲昌聖王叔梁公爲啓聖王東配顏氏無繇孔氏鯉西配曾氏點孟孫氏東廡周輔成程珦蔡元定西廡張迪朱松

名宦祠添祝李公鈞侯公居廣蔡公琦宋公廣業朱公廷楨韓公高任公塾徐公燭

楊公朝楨趙公申季王公用霖程公瑾錢公鎮

鄉賢祠添祀耿公如杞耿公章光姚公運熙耿公顯魯

漳神廟在城西南四十里雍正四年奉

旨勅封爲惠濟漳河之神知縣趙知希設立牌位懸掛匾額每年春秋致祭行禮如制
關帝加封三代添啓聖歲祭三次

先農每歲仲春上亥日如社祭壇儀行籍田禮

忠義祠每歲春秋兩祀祭忠孝節義之人雍正四年始

節孝祠每歲春秋兩祀祭烈女貞婦雍正四年始

館陶縣志卷之九

名宦志

昔召伯有令政周人久而懷之爲之詠甘棠今吾邑享昇平百姓安樂壽考垂數百年而不知經營締造覆露以至今日伊誰之賜嗚呼諸賢君子安可忘耶茲據舊史自魏以來其善蹟在耳目者錄若而人上之不敢掩沒前哲次不敢阿其所好清論在人懸如日星矣志名宦

隋

魏 德深鉅鹿人初爲文帝挽郎以能遷貴鄉長爲政清靜不嚴而肅尋轉館陶長貴鄉吏人送之號泣之聲不絕于道既至館陶老幼皆如見父母有猾人員外郎趙君實與郡丞元寶藏相交結前後令長未有不受其指麾者自德深至縣君實屏處於室未嘗輒敢出門貴鄉父老詣闕請留德深有詔許之仍蒞貴鄉館陶闔境悲啼因從而居住者數百家

館陶縣志

卷之九 名宦

一

劉仁恩開皇初爲毛州刺史倜儻有文武才治績號天下第一召爲刑部尙書

韋 壽字世齡杜陵人孝寬子開皇九年任毛州刺史頗有治名

宋

劉 筠字子儀大名入舉進士真宗時爲館陶尉臨事明達治尙簡嚴會詔知制誥楊億試選人校太清樓書擢筠第一嘗預修圖經及冊府元龜推爲精敏初爲楊識拔後與齊名時號楊劉累官集賢院學士凡三八禁林三典貢部以策論升降天下士自筠始

查 道字湛然休寧人端拱初舉進士高第解褐館陶尉曹賓鎮徐州辟爲從事深被

禮遇寇準薦其才授著作佐郎淳化中徙知果州時寇黨尙伏巖谷詔書招諭未下咸請發兵殄之道微服單馬直趨賊所初悉驚畏持滿外響道神色自若踞胡床而坐諭以詔意或識之曰郡守也嘗聞其仁是寧害我者卽相率投兵羅拜號呼請罪悉給券歸農

宗 澤字汝霖義烏人舉元祐六年進士哲宗時授館陶尉適朝廷大開御河方隆冬
役夫僵仆於道中使督之急澤乃上書於帥以時方凝寒徒苦民而功未易集少須
之至初春可不擾而辦帥用其言以聞上從之後高宗授東京留守屢欲建功爲汪
黃所阻憂憤成疾疽發於背諸將入問疾澤瞿然曰吾以二帝蒙塵至此汝等能殲
敵則我死無恨衆皆流涕翌日風雨晝晦澤無一語及家事但連呼過河者三而薨
陳過庭字賓王山陰人徽宗時爲館陶主簿有能名

金

王庭筠字子端河東人登大定十六年進士第調恩州軍事判官臨政有聲郡民聊
四者謀爲不軌事覺逮捕千餘人四竄匿不能得朝廷遣大理司直王仲軻治其獄
庭以計獲四分別註誤坐預謀者十二人而已再調館陶主簿明昌元年召庭筠試
館職中選遂罷

元

館陶縣志

卷之九 名宦

二

張之綱館陶人元帥弼之子美風儀足材行歷仕有聲由館陶簿陞爲尹以最擢東平
路鎮撫傅州防禦使

溫仲謙大德元年授館陶尹以德化民嘗行畝禾有一莖六穗民以爲異立嘉禾碑記
李 藻字子潔潁川人順帝時爲館陶尹民相訟召兩造諭以禮讓往往悔謝去先是
縣民輸稅爲攬納者所困藻爲嚴禁河溢隄決督丁夫塞之又上章乞蠲租罷稅市
綾二千餘疋上官行縣咸嘉嘆移疑獄鞠之前後以十數後病歸民泣留滿道

沈 瑀爲館陶尹民一丁課種桑五十株及棗栗等樹久之成林民享其利思之不忘
著有政說一篇

明

博信之洪武初知館陶縣草昧經營人思其功

溫 良陽曲人永樂三年任館陶訓導作人有聲尋陞教諭

李 仲東安人舉人宣德間任館陶教諭經明行高每升坐諸生以次論難善爲剖析

疑滯士論推服陞國子監助教

唐 禎字廷瑞金州人監生天順間知館陶縣蒞政明作吏民束手奉法代者李寶以寬厚稱

馮 俊嘉興人舉人弘治間任館陶縣教諭訓戒有方陞獲嘉縣知縣

陰秉暘汲縣人進士嘉靖間由御史謫知館陶縣善談名理召諸生論經義娓娓不倦居官清簡省罰簿征歷陝西參議歸居衡水之濱絕迹公府所著有史綱心見四書疏義

高自新字本澄獲鹿人進士隆慶初知館陶縣天性莊嚴嘖笑不苟愛百姓如子三年歲稔民和訟庭閑寂日讀書彈琴課奏第一累官知府以直方忤時屢起屢蹶所至民見德

晉調元字淑君陝西長安人崇禎時由孝廉授館陶令會歲大祲捐俸煮粥民賴以活者衆旋癘疫流行民相繼死亡去故藉大半公清審編戶凡田地荒蕪者悉除其租

館陶縣志

卷之九 續名宦

三

民大悅王午大兵克清淵遂抵館陶城下公號令嚴明隆禮將士虛懷諮訪深得人心一時丁男悉登陴堅守婦女遞運磚石經久不渝城賴以全既平親持酒脯犒士事上聞議優叙公尋卒士民建祠祀之

國朝

程珪遼東杏山人生員順治初令館陶敷政一新時寇盜竊發公身先督禦民賴保障擢陞金華知府赴任遇寇冒刃不屈死贈山東按察司副使廕弟憲見任山西潞安知府

續名宦

鄭先民蒞任嚴明弊絕風清遇人以誠不以術民有敦本力農者欣然嘉勞課士手定甲乙以示激勸值歲旱步禱郊原請蠲請賑全活甚多平徭役減鹽引申飭保甲修理學宮邑志久殘集紳士修輯甚詳及陞任去邑人爲建去思碑

陳文學滿州人廉潔正直催科中寓撫字鞭朴不施民咸感之輸納恐後優禮士子在

任五年政簡刑清士民樂業以卓異陞西城御史

錢 瓊字球美廉潔明敏遇事洞中款要有不便於民者必指陳利害力請當道以去之公務旁午往往割俸調度額外無苛徵以行取陞戶部貴州司主事

陳 冕字宜章蒞任初功隆學校每月飭庖廚督課生童手自丹銘編民不擾水災勸賑必實值旱禱雨雨輒應在任四載士民頌之

高 錕字銳菴甫下車適逢荒歉奉 上官委賑竭力以蘇民困不給更捐俸以助存活無算值漳河汎濫氾離逃竄者甚多遂請於上官動那 國帑清河築堤出倉穀以食饑民民賴稍安尤加意課士士之翹然傑出者皆其所造就云

潘從哲大興縣人任主簿効力河工克稱厥職修築堅固上利漕艘下無民害後遷嘉定遷太原署守備任勤勞王事數十年盡心報國始終如一雍正二年陞長陽縣知縣年老不就任卜居館陶馬頭村優游林下不驕不諂與同鄉劉子廷瓚爲忘年交鄉中大小事悉爲經理雖農夫園丁婦人孺子皆頌其德爲輿情所推重

館陶縣志

卷之九 續名宦

四

呂心佐鉅野人任邑教諭才高學博課士捐俸供饌每月不怠修葺 聖廟不入浮屠老子之宮有古大儒風續纂縣志其功尤多

何婁光字木齋任邑訓導才高學博新城宿儒也四書經文揣摩數百篇數奇未遇齊河王太守族孫何世基皆出其門宦囊空乏與教諭呂心佐捐俸課士不輟遇事敢言絕不阿比人稱爲古直君子云

陳承祖德州人任邑教諭賦性醇朴教士先器識而後文藝入其門者如坐春風 聖廟圯竭力監脩年饑代縣令放賑民沾實惠工詩精法帖爲士子所式

鄭士震字慎脩汶上人任邑訓導存心嚴肅舉止端凝人稱爲端莊君子處事一守先民規矧言行不苟教人慨切藹然可親堪爲學者楷模云

館陶縣志卷之十

人物志

孝義

節烈附

陶固人傑之區也兩河之間英氣鬱勃所產皆豪俊古稱多君子蓋其地焉唐宋迄明名流踵接綰符綬登廟廊者多建不世之伐鄉閭中潛居砥行代不乏人士以技勇見干城實式賴之余各爲表著其大者倘惟顯晦升沉是計得無執成敗論英雄陋矣孝義節烈綱常攸關別爲二則謹按籍採錄以竣後之董狐志人物

北魏

王榮世仕北魏以方城縣子爲三城戍主梁師攻圍急榮世力窮知不可全乃先焚府庫後殺妻妾旣而城破不屈被害詔進爵爲伯贈齊州刺史祀學宮

唐

李丞有學識善屬文皇甫冉有題丞舊居詩

段道超干木裔孫世業儒門不務干進養志林阜遠近傾慕州縣多咨訪焉

館陶縣志

卷之十 人物

宋

張瓊勇力善射太祖在周時攻壽春乘船入城濠城上弓弩遽發瓊亟以身蔽太祖矢中股死而復蘇鏃著髀骨堅不可拔瓊索酒滿飲破骨出鏃血流數升神色自若太祖壯之卽位擢典禁軍累官殿前都虞候遷嘉州防禦使時軍校史珪石漢卿以數言外事得幸瓊輕侮之二人因譏瓊養部曲擅威福太祖詔面訊不伏怒令擊之漢卿卽奮鐵搥亂下氣垂絕曳出遂下御史案鞫賜死太祖旋聞家無餘貲甚悔優其家祀學宮

王沿字聖源少治春秋中天聖進士張知白薦其才遷監察御史天聖五年安撫關

陝減諸縣秋稅十二三還爲開封府推官體量河朔饑民所至不踈詔發官廩濟之就除轉運副使被詔鞠曹汭獄於真定府遷殿中侍御史爲河北轉運使奏罷二牧監以地賦民導相衛邢趙水下天平景祐諸渠溉田數萬頃因詣闕奏事上所著春秋集傳十五卷改涇州觀察使元昊入寇葛懷敏進兵鎮戍沿遺書戒勿入背城爲

寨伏擊之可有功懷敏不聽卒爲所敗賊乘勝犯渭州沿率州人乘城張旗幟爲疑兵賊遂引去徙知成德軍卒祀學宮

王鼎字鼎臣沿之子以進士第累遷太常博士數上書論時政得失知深州王則以貝州反深卒龐且與其徒謀以元日殺軍相劫庫兵應之前一日有告者鼎夜出檄遣軍校攝事外邑而陰爲之備翌日會僚吏置酒自若徐捕首謀十八人送獄一郡帖然累遷司封員外郎淮南兩浙荆湖制置發運副使前使者多魚市南物持遺權貴鼎一無所市獨悉意精吏事遷河北都轉運使鼎性廉不欺嘗任其子族人欲增年圖速仕鼎不可父財悉推與其弟所薦士多知名有終身不識者與父并祀學宮劉鈞果州團練使昆仲五十載不異居人高其義子潤夔州府尹以母渡江憂恐竟棄官歸孫深孝行著聞曾孫淵深之子仕安吉知州聲望皆著

元

郭良元統間爲嘉議大夫中書吏部尚書

館陶縣志

卷之十 人物

二

秦禎元統間爲奉政大夫宜興州知州

霍爾赤字彥舉性行淳篤雅尚文墨嘗於松滋監開別墅以居里人傳之

劉源鈞之後倜儻有智勇方弱冠時值貞祐丙子之亂以鄉兵起義爲千夫長所向無敵署軍中總領佩銀符尋以破彭義斌功陞臨清丞未半載德化流布政令肅清陞宣武將軍臨清縣令騎都尉安撫境內累封彭義縣開國男食邑三百戶光遠源之孫九歲屬文讀書過目不忘任廣信同知陞知州崑光遠之子蘭陽知縣政令清簡管民不忍正視因致仕歸弟鎬任中書習諸家隸篆猶善大草縉紳多慕之又周給貧窮無虛日

張弼字公輔資性樂愷洞達時變貞祐初河朔潰亂土盜羣起弼召豪傑團兵自衛盜不敢犯遠近得依推弼爲館陶冠氏兩縣都提控以功進開國侯食邑一千戶諸子克世其業詳載墓志

明

郎 俛字抑之洪武間補縣諸生儀表魁岸行誼高潔雅爲里人推慕許兒莊等三社
頑梗不馴有司莫能治俛至反覆曉譬相率悛伏委攝縣事條平徭役凡三閱月四
境稱理由歲貢登太學授工部虞衡司主事遷雲南府知府所至著有聲績人多推
服祀學宮

朱 儼洪武中由人才舉任鎮江府同知陞岳州府知府

孫文義原名文進登洪武辛未進士拜監察御史監造榆林版籍著有勞績御筆改名
文義尋爲權奸傾擠卒於官祀學宮

杜 驥由貢任交趾三江府同知安撫招討有功陞河南布政司參議

陳 占永樂間登進士任監察御史激揚無私擢陝西按察司僉事蒞政嚴明百司惴
惴奉法累官大理寺少卿士林重之祀學宮

李 敬字克恭山貢入太學初授考城令居官廉明吏民畏服善招撫流亡嘗修學掘
地得錢數萬緡因爲土木資不勞民而工成尋卒合境哀號提學陳公選表之建企

館陶縣志 卷之十 人物

德堂設主於內歲時致祭

劉 衡字公銓正統間經魁初任衡水知縣歷安邑崑山陞國子監助教雅愛勤懇士
多慕之擢河南提學僉事祀學宮

郭 良字克忠景泰間進士授朝邑知縣鋤梗噓弱吏民悅服累官光祿寺少卿居家
內行淳備鄉黨無間言

武 肅字子敬歲貢成化初授肥鄉縣丞廉幹有爲太守秦公雅器之署威縣篆政聲
益著督郡府柴夫獲羨金悉輸之官以貸貧民陞鹽城令以子雷秩贈奉政大夫祀

學宮

馬 懋字德昭成化戊戌進士由行人遷刑部郎中累官福建左布政使所在茂著風
猷尋疏致仕祀學宮

耿 明字晦之登弘治丙辰進士授貴州道監察御史輦下論列無所避忌巡按雲南
周行箚棘間以遐徼有司多不檢露章劾奏數十人嘗讞囚有民家子爲妖巫斃死

復甦事發巫論死有司以謀殺未果矜之明日此輩妖術所殺不知幾何人幸發之
不當宥亟命戮于市遠近稱快正德間逆瑾用事出知湖州府賑貧救災摧暴扶良
以治行最超擢江西左參政督餉佐兵剪除羣盜功成不受賞以疾乞休甫抵里三
月寧濠以反聞人服其明哲祀學宮

王 璽由明經司文安縣鐸持身高潔取予不苟其門人王沛工部員外奉差清淵高
其行檢贈遺甚厚璽堅卻不受士論益重之

張 時廩貢性端方博問學隱居不仕樂志田園泊如也壽百歲而終閩邑稱爲人瑞
王 玠明嘉靖間起自行伍初授臨清鎮撫陞守備守大同密雲等處有功授楊州備
倭參將玠雅知大義以襄愍公撫其里有惠政而死非其罪至則拜公之堂伏地涕
泣薦紳義之時倭自瓜步來突逼揚州城下玠恐其西逸乃設伏灣頭鐵盤廠自引
壯士誘賊且戰且走至伏處騎兵起衝之遂大勝多所斬獲以病卒時稱爲名將

姚 鉉字振華登萬 已丑進士仕至遼東寧前兵備副使爲人篤厚平易宦遊所入

館陶縣志

卷之十 人物

四

分給宗族親戚胞弟任其所取不問買田舍皆多其值人甚德之祀學宮

耿如桂字友蜃明之曾孫少有雋才未成童舉秀才弱冠受廩餼持品端潔有父遺產
盡讓諸弟十八鄉闈不中式遂罷不復試天啓初以歲薦廷對歸隱不仕終弟如杞
銘其墓子爾棕用光俱網文學孫道見尤能讀書世其家

耿如杞字楚材明之曾孫鄉會科名千支與廷對次第相貌皆眎曾大父曾大父劾逆
瑾著節如杞氣概亦如之由進士授戶部主事釐剔倉弊有聲時疆場多事有請纓
志調職方卽絕賄賂謝竿牘觸妄人之忌遷神木參議條議邊方利弊務責實效遷
遵化道副使叙功加參政時魏璫擅權中外建生祠中丞劉詔屬如杞呈詳力執不
附中使陶文分鎮喜峯懸魏璫像于中堂撫鎮皆羅拜不敢指如杞持不可中軍劉
鳳翔爲痛陳不拜取禍狀如杞厲聲曰彼力能死我耳吾頭可斷吾膝必不可屈且
吾祖以劾逆瑾得罪此膝一屈吾何面目復入先人墳墓乎長揖不拜使者馳報魏
璫臚傳提塘官趣中丞立劾疏入遂遣緹騎逮治下鎮撫司嚴旨考訊命司寇擬大

辟思宗卽位嘉如杞爲強項吏出園扉擢太僕寺卿晉都察院右副都御史巡撫山西擊奸鋤貪修邊簡卒人不敢以私牘請總兵張鴻功兵諱乃鎮兵非撫兵也中貴因而齟齬蜚語相亂遂爲鴻功所累天下惜之後奉旨復原職加左都御史如杞文似蘇長公奏議似陸宜公詩宗李杜所著有與爭錄墨楯延枝議晉疏諸書

姚運熙字孟襄鉉之長子崇禎中歲貢甘肅巡撫湯道衡以人材薦於朝授南陽知縣時流寇千餘人乘雨侵城運熙挺力捍禦手刃賊兵數人身被重創猶奮臂疾呼士卒血戰城賴以全有手書血衣十三字記其事海內聞而壯之上聞嘉其忠烈贈河南按察司僉事廕一子入監讀書

冀往聖字印尼品行端潔有巖巖氣象精舉業未獲大售由歲薦除甯丘令蒞政嚴明百務俱新慈惠治人去任一年士民戴德建碑以志不忘既歸閉門課子諾早年入庠闔邑推爲仁厚長者有司每式廬焉年七十餘卒

續人物

館陶縣志

卷之十 續人物

五

耿章光字闇生仕曲沃令調香河陞安州牧所至有聲譽陞兵部武庫司員外郎累遷尙寶寺卿以父如杞勤王被讒死爲刺血明心一疏代父鳴冤得追復原官甲申流寓江南聞京城失守殉難於金陵妻姚氏妾朱氏皆投井死祀學宮

耿願魯字又樸如杞嫡孫生而穎異襁褓中能識字六歲喪母痛哭感動路人丙午舉於鄉庚戌成進士歷官編修分校禮闈識拔韓公英等十一人皆詞林冠冕詩文重於時家居創文社遊其門者率多巍科著有韋齋集七卷祀學宮

高重光字煥宸性聰穎淹貫羣書治舉子業刻意揣摩康熙丙午舉於鄉癸丑成進士考授內閣中書生平恬靜絕俗尙陶靖節風不樂仕進家居奉親承歡順志陶陶然自適兩丁內外艱以哀毀卒

王克遜字爾碩幼失怙事孀母以孝聞閉門潛修非聖賢書不讀從遊多名彥談經課藝門以外不問也爲邑諸生時巡按山東御史劉允謙曾詣其廬額之曰行孚月日知縣程起運亦以人倫斧藻四字旌其門迨以明經貢於廷時值需才孔亟爾碩隱

遜不仕號無爲子舉鄉飲大賓邑人至今頌其德

鄒 魯字尊魯少家貧躬自負薪手不釋卷舉康熙丙午鄉試遂性命之理接引後學講論弗輟爲人踔厲風發談詞如雲遇邑有利弊指事直陳邑人賴之

卜云嘉字錫祉性孝友早年食餼生母死以降服限於制飲血三年不見齒丙午鄉試文爲主司亟賞偶以塗字見遺領歲薦終閉戶潛修從遊日衆教胞弟子京入庠人稱一時瑜亮子續孔繩孔俱邑廩生孫曰端亦廩生

秦奇英字踰千廩生少孤依母氏以有成晨夕饗殯必奉侍左右不敢暫離讀書日有功程工文辭一本先正耻奔競之行當事矜式生平寡言笑少交遊與耿公望卜錫社友善戊午鄉試數奇不售年未強仕竟卒

李 景字青來舉人李茂實子家世淵源積德好義景年甫舞勺蚤失怙恃每歲時伏臘爲孺子泣者終其身如一日更誼篤同氣愛諸猶子情倍摯讀書樂道不逐時趨以明經領歲薦舉鄉飲不赴品行實堪矜式

館陶縣志

卷之十 續人物

六

王又曾字沂生幼而食餼名著諸生教授生徒多所成立至於大節尤爲人所不及不愧明經

袁奇珍字連城謀事有膽略居心無阿比其辭侃侃其色雍雍都人士咸愛而敬之劉中正字敬公邑廩生爲人忠厚言動不苟事繼母以孝聞少從學於秦奇英英死子幼教之成立時人義之鄉鄰死而貧者爲具棺殯葬有鬻其子者慨然代爲贖之生平讀書守道恥事干謁年四十九卒

孫如奭字弼士敬謹飭躬寬和接物急遽之時亦必莊恭家庭之內儼若朝庭接其丰範如在春風和氣中也

高文璘字元質號北邨生有異稟數齡善問難舞象臨右軍書法酷肖能文章邑太史耿公縣尹鄭公器重之十七補博士弟子員十九食餼肆力經史性理講說一遵程朱天性至孝以歲科試有違色養遂入成均舉動方嚴朋友有過輒正色相規謀事如印泥畫沙好引進後學多所成就尤留心經濟實學可以坐言起行數入棘圍賈

志以歿士大夫至今惜之

寇養蒙字聖功孝友無間勗志不輟文藝本先正行誼則古昔邑侯陳公恆以科第期之屢入棘園數奇不遇賁志以歿邑侯聞之悼痛輓之曰文行兼優

李 涵字碧涵號西山天性純篤賦質剛毅義所不可堅如金石雖賁育不能奪幼孤援例成均非志也攻苦無間時壽不永人咸悲之子姪多所成立皆公所教號稱望族

王 正字幹臣廩生事親就養無方出告反面父病曾拜表於天以身代弟王桐王樞親課入泮樞早亡妻武氏年二十歲守節不嫁皆正家教所感教弟子以嚴爲道成就多人嘗置田數畝以爲濟貧施藥之資所著有敬日月慎言文數十則

李 湘字秋蒲爲人謙慎坦夷教子忠厚和平先儒有云人有不及當以情恕非意相干當以理遣公庶幾焉

陳心正字肇修豪爽異常處事多中鄉鄙爭競公一二語兩情悉平閭邑咸服其公正

館陶縣志

卷之十 續人物

七

郭鳳山字來儀廩生賦性孝慈秉質純朴學行兼修著美鄉里

高錫祿字君寵庠生端方自矢和平接物設教學宮學規以嚴爲主考業以勤爲先遊其門者多知名之士

冀諾字干子性孝友居家嚴整有法品行端方事事不苟襟懷磊落更有卓識戚里有所疑難一經指畫殊目了然有所緩急巨細必應貧乏孤幼賴以婚娶成立者甚多卜子京字祜祉號亟西邑庠增生天性孝友生有氣骨撫養姑子頻歷飢饉無憾焉代償叔欠出資變產怡如也學宗西河家傳淵源子若孫胥噪名譽宮是其明驗

孝義

元

劉深鈞之子篤孝行除官不仕母有沉疾深默禱于天割左股而羹之以饋其母病果愈

明

劉鑑歲貢生出郭散行偶憩楊樹下得遺物一帕待之良久其人泣至鑑卽還付之人服其義官至福州知府

王

寶父沒廬墓三年詳見歲貢

文起文興同胞兄弟也以孝友著里閭明初起爲里長以收稅獲罪坐大辟弟興向兄泣告曰兄子多人無父何怙弟無子罪可代也詣長吏白兄寃長吏遂以起罪罪之後遇赦回鄉里呼之爲癡其妻之父曰吾倩癡後必昌復以次女爲一至今子姓蕃衍書香不絕皆興裔人以爲孝義之報云

館陶縣志

卷之十

孝義

八

王貞字文舉篤孝友好施予歲凶出粟百石賑濟勅旌其門

劉深本縣人好義施財鄉評推重值歲凶出粟四百石賑濟勅旌其門

孫良文義之孫爲人剛直有祖風鄉里畏慕士夫推重嘗薦修學宮督率有方工成縣令延致鄉飲

汪沂質直好義族子孫有貧乏者咸周恤之以壽官與鄉飲

王宗仁字本元省祭家素封而好義置義塾義田義渡義塚時稱王氏四義山東按察司副使趙公移文旌獎題其扁曰陶山世義吏科給事中閻閱爲之記以傳之

汪應詔邑庠生朴素孝友治家嚴而有法三尺之童不入中門與弟應科同居終身無間言弟乏嗣命中子繼之教諸子以勤儉和睦三世仝居享年八十有八

鄒大賢性仁厚至孝父母享年俱八十有餘及卜葬盡典負郭田三百畝以襄大事或請少留爲子孫計大賢曰父母所遺用之父母不爲子孫留也昔人嘗有典身葬親者况地乎值歲薦饑大賢爲視賑濟粥廠事捐助薪水日夕調給邑民賴以全活本

縣歷旌以扁其孫鄒魯後登丙午賢科人咸謂仁孝所感云

文國泰字熙宇居陶之大羅堡孝孝友七歲失怙哀毀如成人長事祖父母如其父母養生送死情文備至叔祖宗高無子而鰥秦養之三十年無倦容既卒秦竭力葬之邑令魏侯旌其門延與鄉飲子運隆敦厚有父風明季以超貢除別駕高尚不仕教子蔚讀書遊類非公事不見邑宰一時後進咸矜式焉

高思孝生而魁梧性樸直好善爲監兌戶曹椽嘗奉使督役自大名至秦省途中痛念夫役寒寒堅却常例不受更出囊金沽酒脯犒之人頌其德當官嘉其賢贈之百金還家孝季子選登上壽孫重光成進士遂爲顯族

國朝

成光顯成家莊人值時多事冠氏人楊兩密以金一囊寄顯室去中途遇害經年顯方聞之亟求兩兄還其金康熙十一年兩子成立詣顯謝人始知之邑令鄭君聞而嘆曰善人也是有隱德區以旌之

館陶縣志

卷之十

孝義 續孝義

九

閻子行張官寨人教家以和子姓蕃衍四世同居無游惰者次子景隆妻嚴氏尤嫺睦以孝聞康熙十二年三月繼母戴氏病危嚴氏年十九割左肱以食姑病旋愈邑令鄭君給匾旌之

毀體奉親

國典不獎謂其不可爲訓也富人出粟賑濟任俠者多爲之均非其正第近世之人率敦倫紀矜鄙薄所謂三代而下士惟恐不好名得若而人足以風矣姑錄以示勸

續孝義

李茂實字生洲由洪洞徙居館陶明崇正庚午科舉人事親能包養親歿哀毀骨立同懷兄鰥爲營室繼嗣逆闖授以僞官堅拒之匿迹澗南獲免流寇殘破郡邑呈請當事多方安輯鄉里有負債者焚券不責其直同年某守東郡訟者賈千金丐其關說力却不許所著有澗南詩集祀學宮

李晨字太占候選縣丞輕財重義篤愛同氣緩急相需無不供給邑令郎國楨匾其

廬曰熙朝譽髦

徐爾昌字北溪質直朴實勤儉自矢家計日豐不移所守以子貴贈儒林郎

劉秉印字端吾老年乏嗣好佛性執他事無所短長惟聞馮令臨清里誤慨出千金亦可謂輕財好義者

閔士楨字興宇生而穎異勇而善謀 國初流寇犯城人舉爲入將官之首設法守禦城賴以全

劉計聰字振裔父命讀書尖塚寺晝夜不輟年十九入庠 國初草寇擾掠居民從官軍討賊潰生殿後射賊簪纓賊逃去軍得免後賊犯其宅兄弟妻女皆被殺當時有偉士之稱知縣劉贈以文事武備匾額

館陶縣志

卷之十 續孝義 節烈 十一

節烈

明

溫 氏縣人高資妻年二十七歲夫亡守節三十九年而終有司上其事勅旌其門

侯 氏故贈光祿寺少卿郭維貞之妻貞亡時候氏年二十七歲誓不再醮紡績爲業奉養翁姑教子良登進士壽至八十有五有司上其事勅旌其門

王 氏縣人薛忠妻家貧勤紡績事翁姑正德辛未流賊作亂入其家執氏將污之氏厲聲罵賊見殺時年方一十八歲未旌表

何 氏縣民趙繼明妻年二十六夫亡氏矢志從夫斷飲食三日姑力勸解之孀居六十載壽八十有六有司上其事勅旌其門

王 氏庠生汪承明妻年二十六歲明以疾卒撫一子克盡婦道子二十歲亡撫一孫女苦孀四十餘載壽六十六歲

劉 氏邑民汪文舉妻年二十歲舉被兵掠去一子尙在襁褓舅亡姑失明氏耕紡奉

養子已弱冠氏苦貞如一日撫院給扁旌表

丁氏庠生耿爾棕妻聊城人死節御史志方七世孫女爾棕力學感疾蚤卒家僅中人之產氏事家翁盡禮以孝稱教兩孤兒道成道見游鄉校撫諸姪子女及兩孫孫女具有室家苦節四十年未旌表

汪躍鰲女年十六歲居棗科里避兵東楊家莊兵至驅女上馬女給曰前高阜可乘知阜傍有古井投之而死未旌表

文氏郎從葉妻生子建鼎甫周歲葉卒氏年方十八矢志靡他家甚貧躬紡績以奉舅姑治饗殮日省勺米積至斗升貨書以課其子長補邑庠冰操遐齡終始如一未經旌表

岳氏邑庠干英嗣妻冠氏進士岳粹孫女英嗣博文舉每試冠軍督文衡者有山左才子之譽戊午秋闈大爲本房稱賞以犯忌諱置副車抑鬱不得志卒岳氏一痛幾絕曰寧不能地下相從耶奈垂老之孀姑襁褓之幼子何予將爲其難者飲冰茹苦

館陶縣志

卷之十 節烈

十一

者六十年如一日手書教子玉以歲薦成名九十餘無疾而終節操不渝比諸松筠以身殉名丈夫所難矧巾幗乎二者載在

國典其已經旌表者具錄或寒門弱族無力上聞或雅志不求名未蒙顯褒敬採數人以風勵頽俗其得之傳聞無可詳徵者不敢濫列蓋兢兢也至閨閻幽德恐有徵輯不備後之君子尙嗣表而著之

續節孝

軒氏武烈妻烈亡氏年二十三歲家貧甚願上有老姑在堂氏以婦兼子拮据紡績以供饋粥遺子效先方二週氏以母代父和丸教讀補邑博士弟子員食餼知縣錢瓊以松筠一致題其門

曹氏侯一位妻位亡氏年三十歲苦節自矢撫子良屏補邑廩生無何良屏歿遺妻年二十八歲撫遺子三人長尊王次崇王三欽王俱入庠欽王旋亡妻文氏年十九歲撫崇王子爲巳子三世寡孀俱以節聞

王氏倪兆麟妻于歸甫二年夫亡氏十九歲苦節自甘歷四十餘年撫孤子倪山克及成立上事孀姑備極孝道皓首完貞康熙四十九年建坊旌表

李氏宋士傑妻二十五歲而寡矢志終身康熙三十二年縣令給匾旌獎

卜氏生員汪茂梅妻梅死氏年二十三歲以弟子承嗣撫猶已出奉老姑時勤問視姑病日侍湯藥雍正六年建坊旌表

鮑氏孫景爽妻于歸六載夫亡矢志守節時僅二十三歲上事舅姑下撫遺孤歷數十年如一日

裴氏卜緯孔妻自幼定盟後氏父見緯孔貧甚托原媒退婚氏聞之日夜痛哭幾死父懼寢其事及適緯孔其貧苦孝事公姑守節卒

安氏王琬妻事舅姑克盡婦道年未三十而夫亡矢志守節晝則教子夜則紡績時以繼書香勉其子三十年如一日子皆成立噪名庠序閩邑紳士咸稱節孝所感

梁氏州同汪珥琪妻撫孤守節堅如金石屢遭外侮一身擔當謀猷調度男子中所罕

館陶縣志

卷之十 續節孝

十二

見不愧女中丈夫

田氏縣民田虎女父早亡母子相依紡績爲生幼時父許字同邑范現遇年凶母從舅氏謀欲女改字強志不從夜自經死知縣楊一正建祠表之

李氏縣人國士魁妻因顏有志調姦不從羞忿投河身死雍正十二年題明建坊旌表
孫氏州同李洽妻少年守節無子繼猶子爲之娶妻援例凡百所爲無不悉心圖維持之不啼已出

常氏鄭其身妻也世居鄭家廠年二十二夫亡氏誓柏舟之死靡他家寒甚翁姑年近八旬一饘一粥咸取足十指朝夕罔缺子一名中華遺腹也甫弁氏能丸以教倍嘗辛苦後行成名立爲國學冠孫亦名著芹藻知縣楊公區以旌其節曰貞孝德昭

潘氏邑北鄭氏婦也夫名其德幼歸以孝聞德亡子甫八歲氏教以義方姑亡翁八旬有奇氏織紡以供無間寒暑翁嘗語人曰吾中年喪子老年喪妻不幸矣賴有孝媳婦道以代子道猶不幸中幸也氏享年七十有八

趙氏汪汝沆妻沆偕妻隨外父沆州任汝沆亡氏年二十子未一歲矢志柏舟扶夫櫬歸里事繼姑王氏極得歡心教孤子鼎鼐早遊泮宮

滿氏蘇富妻因翁守金病篤思食肉氏因無費割己左股烹而獻之翁病痊方知聞於官知縣謝士柱詳明督撫給有匾額

牛氏龐祿妻夫卒氏年甫十八柏舟自誓持家嚴肅飲冰茹檠五十餘年里黨稱爲巾幗大夫

孫氏龐爵妻年二十爵以疾卒撫週歲孤女與孀似牛氏勁節同矢夥炊事姑始終如一冰操至老知縣趙給匾旌之曰松柏競翠

館陶縣志卷之十一

藝文志

序書 說 誌 銘 贊 記

古人論三不朽而立言居其一 文蓋可少哉陶邑地雖簡僻然選名儒鉅公或遇境留連因人贈答其篇章流傳鄉人多樂輯之茲蒐羅舊譜併大家遺乘共得若干篇俾後之博物君子覽軼文者不以固陋謂吾陶幸矣至文辭不涉風化雖工無當概削之志藝文

書上皇帝書

宋龍圖閣直學士王沿

漢唐之初沿革纔定未暇治邊圉則屈意以講和承平之後我力有餘而外侮不已則以兵治之孝武之於 太宗之於突厥頡利是也宋興三十年而 數侵深趙貝魏之間先朝患征調之不已也故屈已而與之盟然彼以戈矛爲耒耜以剽掠爲商賈而我壘不堅兵不練而規規於盟歃之間豈久安之策哉夫善禦敵者必思所以務農實邊之計河北爲天下根本其民儉嗇勤苦地方數千里古號豐實今其地十三爲

館陶縣志

卷之十一 藝文

一

所有餘出征賦者七分而已魏史起鑿十二渠引漳水溉斥鹵之田而河內饒足唐至德後渠廢而相魏磁洛之地並漳水者累遭決溢今皆瘠鹵不可耕故沿邊郡縣數蠲租稅而又牧豎芻地占民地數百千頃是河北之地雖十有其七而得賦之實者四分而已以四分之力給十萬防狄之師生民不得不困也且牧豎養馬數萬徒耗芻豢未嘗獲其用請擇壯者配軍衰者徙之河南孳息者養之民間罷諸閑牧以其地爲屯田發役卒刑徒田之遂可用獲穀數十萬斛夫漳水一石其泥數斗古人以爲利今人以爲害繫乎用與不用爾願募民復十二渠復則水分水分則無奔決之患以之灌溉可使數郡瘠鹵之田變爲膏腴如是則民利十倍而帑廩有餘矣以此馭敵何求而不可本朝制兵未幾於古自 通好三十年二邊嘗屯重兵坐耗國用而未知所以處之惟教河北強壯以代就糧禁卒之闕罷招廂軍以其冗者肆作屯田行之數年禁卒當漸銷滅而強壯悉爲精兵矣刑平國用中典而比者以敕處罪多重於律以絹估罪敕以紙直代之律坐髡鉗而役者敕黔竄以爲卒諸州比者謫卒太多衣食不足

願勿復謫者七十餘州以律言之皆不至是以繁文罔之而置于理也誠願削深文而用正律以錢定罪者悉從絹估竄竄爲卒者止從髡鉗此所謂勝殘去殺無待百年者也

說

政說

元縣尹沈瑀

夫爲治之道其要莫如省心心省則事省事省則民安一或紛然則上下胥罹其擾矣然事有不能省者又在乎區畫隄防之術何如耳一役之興一宴之設一訟之起一事之爲凡所施爲必思慮周詳斟酌繁略則民受賜不淺古云寬民一分則民受一分之賜嘗爲縣被胥吏春則追農以報農桑夏則檄尉以練卒伍秋則會社以檢義糧冬則賦芻以接畜馬其他若括逃戶若捕盜賊若起夫餉遞若歲用科斂事有百端不賄不釋資緣尅落以養兒孫此愚之甚者也某見其然審其可行者卽行不可行者揮牘不署暇則將一二謹厚吏胥親詣其地按視之可行者行可止者止惟以信義集事吏人不敢妄爲百姓獲安旁邑取以爲法

館陶縣志

卷之十一

藝文

二

贊

嘉禾碑贊

天德四年歲在己亥館陶縣尹溫仲謙行農畝得一莖六穗迺牘上之州僉謂國家致和之應都邑不可私有遂以上聞溫侯於是圖禾刻石縣治之壁其堂曰嘉禾堂

記

去思碑記

元修撰王思誠

近民之司莫如縣親民之職莫如令故令賢則宣化布令不崇朝而徧乎百里治教之成若反手耳吾於館陶尹李藻子潔見之矣子潔世潁川人父正朗知泗州又知歸德府弟黼字子威以國子生爲大定丁卯進士擢翰林修撰河南行省檢校拜監察御史子潔亦以國子生爲壬戌進士擢大常大祝至元二年來尹館陶杜門絕請察民隱詢土俗興利祛弊斥無藉之胥吏旬日間邑人逋而復者類百戶民相訟召兩造諭以禮

讓陳以德義不假刑威往往悔謝而去民有誣爭同宗財產者七年不決子潔爲之剖析懇至欣然退服若決此訟者又十餘輩上官若臬司行縣咸嘉之不忍以屬吏待且移疑獄鞠之前後以十數咸稱明允尖塚倉若縣倉歲起時發民完之乃告諭曰汝輩衣食所需故役之他役不輕汝及也衆懽然趨役而民不擾先是邑民輸稅悉爲攬納者所困子潔禁之曰爾勿魚肉我民課農植桑棗雜果視舊加數倍仍嚴盜斫私賣之禁夏大雨決旬河溢隄決平地水深丈餘瀾漫入城廓廳事前亦深數尺廬舍汎沒民叢沓避市中高地僚屬皆遁子潔獨不去曰我爲邑長旣不能弭災又不能拯民之溺縱獨生如吾民何誓與吾民同死而已揮淚巡視民莫不感泣旣而水息乘小舟督丁夫塞河決補隄防未嘗知倦田野民或升高陵或棲大樹採木葉掘草根以食子潔勞來存撫先發官米賑其苦甚者不足勸富室出粟以濟之又請于朝賑以鈔二千錠又上章乞蠲是年民租罷和市絹二千七百疋若聖廟若二皇祠若縣廨俱圯于水以次葺而新之倡僚屬割俸儲俱億置什器飭館傳命巡尉練弓兵勤警邏盜賊屏息犴獄爲空在職二十月移病而歸父老遮留不能得至有號泣者其東北境曰大章保實松滋監霍爾赤彥舉之別墅子潔旣去之二年彥舉來自松滋因邑人追思不已乃伐石勒其遺愛走京師謁余爲之文嗚呼今銓曹于守令極難其選而得人爲鮮子潔在任未久居而民安去而民思一邑之民無愚智大小靡不皇皇然若孺子之失其父母是豈可以聲音笑貌爲哉使滿考治效之臻不知又何如也吾聞子潔之父爲州爲府所至著稱子威又嘗與予同爲太史氏相知有素爲御史多所建白故併及庸見其父子兄弟文章政事源委有所自也至正元年三月記

重修廟學記

元翰林張士觀

陶丘故有學金皇統中先聖四十八代孫縣令淵實始爲之兵餘廢而僅存至於有國歲甲寅縣佐輔弼赤事修治歷年滋久又復圯靡至元二十一年達魯花赤旭世篤暖縣尹劉著更相勉勗綱紀學事故門觀堂廡廊筵齋構完舊重新大德元年縣尹溫仲謙始至瞻謁禮殿大懼弗稱其制欲葺有所未暇越四年政修時和願謂同僚曰學制

不舉吾屬之責也。蓋勉力共成之。達魯花赤欣都主簿張仁義縣尉吳榮祖謀議克合。典史韓珪同相斯役。共捐俸幣以先諸人人。亦聞義胥歡願。佐財費仍率有官守者。各命其徒而不及於民。於是楹桶藻稅之腐壞者。新之瓦缶坏石之破缺者。易之像設采色刊落者。補之塗以丹堊。峻以崇階。規制如舊而壯偉有加。初神門之前狹隘不足以回旋。至是益地一畝五分。闢通巷以達於外。衢鑿井而汲。繚垣以周。建櫺星門于外。凡學校之所有者。皆備無缺。始於四月己卯。成于五月丙寅。邑人具道本未以記。爲請竊惟學校者。風化之源。人倫之所恃以正者也。本之以六德六行。文之以詩書禮樂。至于天地陰陽事物之理。修身齊家治國平天下之道。與夫視聽言動周旋食息之際。舍講學而能之哉。古者凡立學。必釋奠先聖先師者。必有意也。夫子既沒。後之學者。尊以爲先聖。配以顏氏爲先師。自京師達于郡邑。得通祀于其學。及平時。殊世異因。事制禮則皆廟而祭之。其所以尊敬之道。則一也。況度數之在乎俎豆鐘鼓祝幣之間者。非廟無由觀焉。後世必欲敦敦本。作人材。廟學之制。豈可缺乎。國家功成治定。留意教養。廣勵學宮。使邑之士相與升降乎其中。怡怡愉愉其教也。不倦務盡人之材。其學者勉焉。以成令器。則是宮之設。非特使夫來者以爲美觀而已。士觀不敏。何足以啓告于人。辭不受命。勉爲之書。

修城記

明翰林侍讀泰和尹直

館陶縣志

卷之十一 藝文

四

成化三年丁亥春三月丙寅朔。館陶縣城訖工。知縣唐候具書幣遣使抵京師。請予文記之。其書曰：走承乏館陶于茲四載。凡政教弛張利弊興革。惟視緩急。顧邑無城池。罔以衛內攘外。然役重費鉅。業未易集。幸歲比有年。國無重徭。民有餘力。乃區畫興築。請於巡撫都御史原公。具聞詔可之。遂以今年二月丁未起工。版築并興。夫役樂趨。至成僅二旬。其間陰雨輟工。實旬有八也。城周迴幾五里。壕塹如之。四面闢門。而屋其上。壁甃堅。纈闔闔崇嚴。其門之名。東取東作之義。曰豐樂。西近衛河。曰臨津。南向離明。曰昭遠。北達京師。曰通都。皆舊所無也。惟是顛末非托之文字。勒之堅珉。則人更世異。不免湮沒無傳矣。幸嘗獲察於下。執事故。敢以請。余惟春秋常事。不書興作。創制則備錄之。

若是役也決宜書按志館陶古魏地漢始置縣以境有陶丘丘旁有館故名其治在今之冠縣故爲隋氏而置館陶于他所今治是也唐大 間改復永濟縣尋復舊名屬魏州宋因之今屬大名府元初屬東平路尋改屬濮國朝改隸東昌府初括版圖民以戶計千五百不足賦以頃計僅七百有奇百餘年來生齒日繁流寓錯居野闢稅增蔚爲大邑而城垣不備庸非缺典歟自我明受命海宇一家列聖相承張文弛武所在城邑城也不足乎高池也不足乎深民日趨於禮樂之域而不知爲之者矧茲館陶密邇甸服俗習敦樸弗戒不虞無足怪也然宴安滋久卒然訛駭民匪城池曷以固志第世之守吏智力鮮有及此者故以館陶之爲縣凡歷幾世吏幾更而崇墉深塹乃今見之蓋惟侯剛廉勤敏威惠并行經理適度民志順借故城於斯築池於斯浚役不知勞成不兼旬不惟足以備邦侯之制而且足以待不常之虞矣侯之功能豈淺鮮哉昔周南仲城朔方仲山甫城南邦詩人誦之見錄于夫子若侯之名位固不敢望二公下風而是役也以擬二公又何多讓焉然侯固不以此自矜也書曰女惟不伐天下莫與女爭功

館陶縣志

卷之十一

藝文

五

其侯之謂與惜予文不足傳又未親歷其境達觀其高深廣厚以委曲悉記之姑藉來書庸志歲月庶後人考焉因城而知侯也侯曰禎字廷瑞陝西漢中鄉貢進士

重修寶應寺後殿記

明監察御史邑人耿明

寶應陶山古刹也其創建沿革之詳舊碑具載坐落於縣治西南隅門廊殿宇規模宏整像塑莊潔邑之庶士或告祈禳而謁於斯或祝聖壽而習禮於斯繞以周垣聳以羣幹高堞峙前通衢抱後誠一方勝概萬姓福地也景泰辛未已嘗修葺迄今弘治辛酉歷年五十有餘歲月滋久風雨摧剝後殿傾欹像飾蒙翳衆目惻然肯構誰何於是主僧乘時稔和諭於衆曰茲佛修飾吾徒之責遂請于邑長謀于鄉耆僉曰宜舉迺遣僧人斂之邑井諸檀那施穀輸財百物儲備爰涓日命匠集役斤木陶甃撤其舊而易之新隆其棟宇豎棟而梁者五架增厥像貌欬像而肖者于軀輪奐輝煌起人瞻敬過者心慈聞者思善以故財不廢帑民或藉力工程之完大而且速世謂佛氏之教動人易入人深信不爲誣也蓋自我太祖高皇帝創業垂統稽古定制自京畿而達之天下府

州縣因舊制以立司設官遣高徒以闡教弘化擇主僧以領袖之度額衆以羽翼之聖德神功而于佛氏亦加之意焉者非以其人清淨其心慈悲抑其教移人心性導誘愚迷陰翊治道有補於世耶列聖相承崇重其教百四十年來有隆無替竊謂佛氏流入中華自漢而魏而晉而齊而梁而唐而宋而元以迨我明今日上下千四百年有奇貴而王公賤而奴隸老幼賢愚聆其教知其說者鮮不奉事而樂從之矧堂堂萬乘之尊首加意而崇重之哉是宜諸檀那趨事樂施而罔覺其費且勞也佛氏槃涅久矣靈如攸存尙念祖宗加意崇重之德與吾民樂趣之共成之意陰祐默庇綿國祚於隆長躋生靈於壽域庶幾少補於萬一爲之徒者曷共圖與厥工昉於辛酉之春三月訖於壬戌之秋九月逾周期而告成倡義董治者主僧翠峯祖漢也矢志協成者募緣僧人道迷也樂與共成者邑宰鹽城瞿公克明等也翠峯因余爲友人知事順末托余記之余素昧釋氏姑櫟括大略而紀歲月於珉云

館陶四義記

明給事中閻 閔

館陶縣志

卷之十一 藝文

六

昔者仲尼氏之虛世也利則罕語易贊乾德顧曰利者義之和也夫利也者遂也順利利益之謂也公而正達已達人何施非義偏而私便已而不使人則世以病矣故大人致精義之用利垂來世君子樹明義之力亦足以利國天下善人端士惇義而宗戚鄉邑宜之劉仲清氏曰頃仲子聘館陶王本元氏之子本元蓋善人也家縣北尖塚衛陰之原東去五里曰孫寨別有田千畝十畝舍之凡七十間重門而入中攝以堂宗戚無田與廬者授耕而居之多寡視口視力後先視服于是鄉之人目曰義田同里有子弟往不知學則於宅東半里許以十畝築塾經延師教成童者於中堂句讀師開蒙於兩翼義田以贍歲用開圃以共蔬茹地凡二百二十有二畝於是鄉之人目曰義塾衛自元城而東也南北道過者多則門西一里間造船一艘以能水而慎者一人給之田五十畝俾操橈焉濟行旅而不索錢再給田三十畝爲不時繕船費於是鄉之人目曰義渡承平踰百載雖僻縣人凡貧無葬歿無歸者不忍見則河之西原二里而近開阡納櫓而封識之垣有樹祠有屋擇道釋守律者令之典香火春秋時且自具紙錢醪酒燎

耐其間占地無慮三十畝於是鄉之人目曰義阡蓋規立於厥考豐城丞及本元而利遂克於其鄉弟本位實相事焉於是閭子聽之喜曰人之爲道也生有養長有教行有託終有藏而後順益遂天下利矣是以六籍備井牧之制焉昭禮樂之數焉厚賓旅之歸焉慎埋瘞之誠焉此有國家者事也而本元氏以殷富不自利而與其鄉利之得非聞希文氏之風而慕其有義名也乎夫參知殿學宋有實封然義田止矣而本元有四焉晏子雖以善交顯世而陳氏方以厚施謀國二者施同時也而所利殊矣且利名入朝利利入市卜式輸財助邊實利得官也本元遠不見都門居縣外二十里將何利哉利爲善人悼義而已矣後之爲子弟者恒如本元承豐城之志本正協本元之心不以自多則王氏之居人當呼爲世義之莊真可久傳矣劉子喜曰是宜歸之館陶俾王氏後記之世慎修義焉

新建北極廟記

明鄭城知縣邑人武建邦

玄武之宿其位在北是以建設廟祀定位於北方焉陶城襟帶衛河環枕長隄實萃秀

館陶縣志

卷之十一 藝文

七

鍾靈地也惟城北漫衍曠地形微下論者謂當建神祠以鎮之而卒不果成邑民張姓名誥者興起善念慨然任修舉之役家君施粟以供役事憲使楊公鄉進士米君輩率施費以贊之而遠近之人鮮不嚮應富者輸財貧者効力携鉢荷鉢惟恐後遂拓基起臺建廟堂三楹門樓一所環以垣牆規制粗備矣是雖人心慕義而向善然時浹旬工不待督疑有神以默相者居無何張姓歿工多缺略又值水患日就圯廢有道人孫玉臣者矢心欲續厥工其一已之家務弗恤也復修簷廊賁飾重加廟宇視前功倍壯麗矣事竣乃懇於家君以紀其事時予在鄭家君以書來命予予以鬼神之理玄冥難測祭享之禮文典攸關矧玄真帝神猶正而尊者耶昔者成祖文皇帝之靖內難也維神降靈有披髮而立雲霄者中有兵戈聲遂致大捷及登大寶建廟于武當山歲時舉祭大邦小邑皆立廟祀之蓋其功大其應昭也吾陶舊有廟在臨津門外方位未得弘擴乃復創建於斯其地當邑門交衢之會背坎面離樓堞對峙實一代之偉觀也不其盛歟由是焚修告報可以祈休風氣聚集可以毓秀神明昭示可以貞志邑城拱向可

以延祥正位安神奠正陶土殆將傳之永久矣然則鄉長老誠義舉而道人功有不可泯者遂據事以紀之時嘉靖壬戌年夏五月也

重修儒學記

明尙書開州王崇慶

館陶東望泰岱西距衛河北接清源南邇畿輔諸郡邑蓋形勝要會之地四方莫先焉陶之建先師孔子廟也爰始國初歷有修葺然廟貌不能無改於昔則以歲久爲之也嘉靖甲寅邑侯洛陽史子懋德甫下車目見傾頽慨然太息欲增崇而鼎新之會時沅寒越明年乙卯春二月遂計工命匠鳩材儲費復爲捐俸以示其行之果而弗擾於民也因命邑丞寶子二桂督理其事未幾士胥慕義爭効力輸財翕然響應皆前此未有也又謂啓聖往常權祭他處非所以遵上命安先靈也乃於學之西南隅擇地建祠週以垣牆蓋自是祀有定所君子曰斯舉也忠孝之攸關也今若是庶其無舛乎又謂鄉賢名宦二祠不可沿廢而泯也乃乘時犒匠因材併工悉爲重建君子曰史侯所以表鄉達而勵宦遊也其殆兼盡而無遺乎若乃櫺星諸門與今上之敬一亭以及齋舍倉

館陶縣志

卷之十一 藝文

八

廚罔不整飭潤色不惟史侯繼美前令抑以貽範後人於修廢見其敦本於創祠見其達用於捐俸見其恤民由是而自修罔間德修罔覺以新百姓答聖明崇儒重道之至意以成移風易俗之善政俾陶多士儀型侯德將來從政四方亦如侯之不徒催科而遂已焉則侯之遺澤與陶人之思侯於他日其何有窮耶侯名官懋德其字別號一泉癸丑進士河南洛陽人蓋聲稱卓然者縣丞則武鄉寶子二桂斯役也有贊襄之勞焉其主簿葭州曹應時典史蒲田吳若雍暨儒學司訓肅寧蔚玠鄆都楊一鶚皆樂觀厥成者也敢併及之

重修城隍廟記

明知縣李冲奎

壬申歲冬余被命來官茲土齋沆視學恪恭羣廟祀止城隍瞻拜既肅見廟廡傾圮儀像露居詢諸祝事恒藉藁以行妥靈布處於禮雅弗稱余俯思嘆曰凡有功德於天地間者不問細大秩而祀之以致其報禮也矧城隍爲一方保障其廟制頽儉如斯顧可使闕而不葺陋而弗飾耶於是鄉之民偕士大夫造余廬僉曰廟所以棲神也無廟則

無祀無祀則無禮無禮無誠俾我士民何所依歸何所勸懲哉拓而新之可乎余曰可
遂鳩工措材篤謀務成罔費於官罔取於民咸藉助於邑人之尙義者不踰月而功竣
圮者以完隘者以闢閭宮薦廚戟闕修廊靡一弗備且丹堊炫焜佩冕端凝炳燦燿燿
變變堂堂不獨廟貌之改觀已也而陶之士民奔走瞻嘆翕然益起爲善之心是舉也
其有益於勸懲也誠大矣廟成邑士大夫請記於余余辭不獲已輒應之曰廟之新有
三懿焉邑故有廟國典也廢而不舉神將奚棲修廢舉墜工遂底績神靈妥焉非所謂
尊國制乎祀以廟起禮緣祀行祀禮不行神將奚享增飾旣煥禮樂由興廟祀正焉非
所謂崇古禮乎且明則有人幽則有神彰善瘴惡聖王之政福善禍淫鬼神之能俾我
棄盛旣芬俎豆旣潔對越精誠駿奔周折非所謂示勸戒以勵人心者乎一作而三懿
具焉茲廟之力也雖然爲表勵崇飾者有司之職也尤孚惕省則齊民之心也若使吾
民知其懿未能誠諸身姑以修廟貌彰厥事迹是慕其名者非爲善之實也飾之廟貌
而壞之於身矯之文具而敗之於行奸以掩其外襲以阱其中是假其迹者非爲善之
實也必如精誠內蘊忠義外著不徒新諸神而新吾心之神不徒葺諸闕陋而葺吾心
之缺陋善可好而誠好焉惡可惡而誠惡焉然後士雍民穆風淳俗美無愧於斯葺可
也無愧于斯心可也是則新廟者之意也是余之所望于吾民也噫後之人登於廟瞻
於神寧無感發振勵而興起其爲善之心者乎此又吾有司者之所望于後民也

李公隄記

明訓導陳留劉克敬

隄以公名志喜也示不忘也昔者范文正令朝陽因海溢而築長隄以禦之民不忘其
德也故名曰范公隄蘇文忠守杭州因湖涸而積葑草以爲隄民不忘其德也亦名曰
蘇公隄二公之隄立意雖殊命名無異然志喜而示不忘一也茲衛河近陶城三里許
每歲夏秋泛漲渰沒禾稼漂廬舍溺生靈者計數歲中或一二焉誠可憫也奕城葵巖
李公以進士宰陶邑聞而惻然曰民之溺由已溺之也盍隄乎于是命三尹曲泉浦公
董治斯事不期月而告成旣而龍淵徐公繼至其規度區畫因勢增修亦與有力焉自
窩頭至于連環鋪長十餘里高二丈有奇寬一丈有奇植以林木以固隄也加以鋪舍

以防隄也則河流故道隄聳岸邊環拱屹立望若層巒民私喜曰自是禾稼其無淪沒矣自是廬舍其無漂流矣自是生靈其無沉溺矣且烟柳依依高低掩映鳥語和鳴漁歌互答亦可謂臨流之一盛觀也噫非吾李公之慈仁又誰能爲隄若是乎因喜而不忘有侔於二公之所爲故紀之以石亦名之曰李公隄

徐州鑿奎治水記

明中丞邑人耿如杞

甚哉水之爲利害也司馬子長從負薪寒宣房悲瓠子之詩而作河渠書河決民受其害渠成民享其利蓋世有非常之人然後有非常之功非常之功固非常人之所擬也方神廟庚寅河溢於徐潰隄防漂廬舍城不浸者三版爾懸釜爲炊乘榻以行民咸不適有居率籲衆感出矢言天子用是震悼於上曰嗟乎民其魚矣一時守臣總河潘公觀察陳公相爲恐懼奔走百司集衆思廣忠益有議遷城者有議穿渠者盈廷聚訟莫適成說上命曰嚴督之守臣愈益震恐州三守蔣公實始建鑿奎山之議當是時河流橫溢泥沙重濁河日高城日下益以淫霖水愈深勢不可泄道途之勤營

館陶縣志

卷之十一

藝文

十一

繕之勞起怨咨傷和氣計費三十萬遷城議事大難任黃河湍悍不可測夕疎乃旦淤遷河議迂不可從是惟利導之鑿渠爲支河百餘里引城水匯蘇伯湖達馬蘭河注宿遷小河口且郊圻新經河流一石水六斗泥厥土填壚爰作穡事實維陸海上腴是民利也公于是步行山原相地勢觀水勢反覆此策最善有奎山橫良當道公私惟曰衣帶耳于藝是也何有則有傲從康者陰齟齬之曰葬我隴漉我督亢公實生我母乃浚我以生乎公曰人情難與慮始可與樂成吾議行功且夕就耳何恤乎人言遂草爲議上觀察公其略曰是河成寧獨洩亭居之水哉爲利有六城郭不移廬舍如故利一中原保障幾沉而復浮利二渠東西有隄隄之內田疇數千頃足可布種利三新創建倉廩垣隄之內免乎汨沒利四民扁舟支河輪轉入城市脫波濤省負擔利五束漕渠不旁洩糧艘利涉利六觀察公方迫于簡書得公議大奇之卽以原壯上總河公總河公亦躋公議力主行之而崑以命公量工計日分財用議遠邇稱畚築具糗糧自奎山南北分九工一爲亟洞洞淤淖且厚且杓下八尺始土上下五尺始水二卽奎山上下

七尺石磷磷錯出錯之錯之去石一丈二尺始水二工就餘工遂籜解矣是役也河之深丈有七河之廣丈有五河之里自本州奎山蘇伯湖西界史家莊達馬蘭蕭宿遷界東至宿遷小河口百六十有二河之工始于二月九日竣于閏四月十日凡九十有一日渠成公既告成于觀察公觀察公告成于總河公啓洞挹水焉掣之若抽欄左水立盡城市亢爽如故民以奠安總河公奏公功於天子有詔少司馬周公柱史賈公高公視工于徐一如疏言無異上嘉公勤勞喜潘公知人欽賚以白金文綺進秩各守臣有差欽賚公白金二十兩立石奎山之巔紀公功于太常焉予讀職方輿地豐沛之間濁河汎濫幾淪魚鼈餉既艱民亦凋瘵蓋水患莫甚于斯者也自公排衆說建議鑿奎山開支渠黃河安瀾徐之民歲不苦遷決艱食鮮食懋遷有無成淮海一都會于今五十年間其利皆符公初所指次公功在一州公之功實在天下蓋明德遠矣是後國家開黃河新運當事以公前功命公攝守事復監其工勤渠拮据底績勞最上四院合詞疏舉有詔紀錄徐之民至今頌公功不衰予大父都憲公與公父寺丞公同爲清平探

館陶縣志

卷之十一 藝文志序 十一

花雲坪張公館寮兩家世通親好嘗悉其事竊不自揆撰次崖略副在京師其何足以方子長乎公名繼祖字紹宗號少竹東昌縣人成化丙戌進士侍御公昷之後

東昌府志序

明參政邑人耿明

書名府志有職守者重之匪重文藝重治典也重治典以重治教也夏之禹貢周之職方皆聖人經也而治天下之法具焉後世有志用世者固不重之孔子大聖猶徵文獻蕭何人傑獨先圖籍他可知已漢唐而下郡有圖志重治典也肆我明以文教化成天下萬國悉入版圖東昌舊志修於天順初年檄官采輯而成惜其紀載弗備考據弗詳且歲遠字盡篇蝕不便檢閱振舉而更新之實有待於此時幸際重熙累浹之世文物蔚然亨嘉人材彬彬日盛續而修之亦時措之宜也洛陽侯公雅重舊典銳意作新政暇乃閱前守李公墨劄而悅之謂得我心同然省方設教無逾此書遂酌今準古次第編述圖列於前志叙於後爲卷者九爲目者三十有八大書以紀其事分註以詳其義

文而不艷質而有華蓋得史官氏之家法一覽間一郡三州十五縣古今已往事蹟盡在胸中如啓玉府而視圭璧琮璜之壯聯累交映寧不使人一快目哉鑒古所以知今彰往所以察來可以觀風土而驗政治可以昭法守而垂勸戒者畢於是乎悉具有關於政教之大切於職守而用助僚屬也多矣循之以修德而樹勳華端不出此公蓋審於治體而重所當重者回視不此之重而日事於簿書之間者殆猶庭選矣昔李吉甫撰元和郡國志謂爲政者執此可以治天下公其念之豈徒作而已哉是編舊名郡志而此更云府者遵當代之制亦孔子從周之遺意云正德十一年夏六月朔旦

汪氏家譜序

國朝知縣鄭先民

族譜之設原以維散渙之人心使之顧本溯源老泉蘇氏論之概矣又陶潛曰同源分派時異勢殊慨然寤歎念茲厥初夫一人之身分而至于千萬人之身只以十六字慨嘆之便已無意不盡孰謂淵明特詩人酒人而已今讀清源振獄王子一叙先獲我心雖欲措一辭不可得也儀甫以門內人述門內事自能委曲該詳言無不文事無不實

館陶縣志

卷之十一

志序 誌銘 十一

叙次世系及大傳內傳與夫譜例族約諸條目又皆備前人之所未備一展讀而瞭然指掌有功於家乘不小然自福山遷陶二百餘年之久十二世之族衆又千有百奇之多儀甫慨然以一身任之其才其識有足以過人者今而後本同親盡之人不致相視爲吳越皆斯譜維之也余嘉其意敬附數言於左云

銘

段君墓誌銘

唐無名氏

有唐碩德段君諱道超以遠祖干木爲魏文侯師故子孫相沿不去其國今爲貝州永濟縣人也祖仁宗父趙生世習儒業不干仕進安貞道德養志林臯府君秉心塞淵居業簡素克紹祖德不趨世祿披六經得先王之志覽九流通述作之意故遠近傾慕州縣咨訪非識遠通方學堪師範焉能不縻顯祿而名播當時哉年六十八終于舊里故親友痛悼州閭嘆惜夫人賈氏族推華茂資稟幽雅克傳詩禮之規雅得柔順之道以建中四年歲次癸亥三月戊申朔十一日終于私第嗣子堅卜其年三月二十一日丁

西今耐於永濟縣之西南禮也地協靈祇崗延起伏可兆公之種德足興忠孝之門見托筆峯式旌泉戶銘曰

峙孤壘兮邈長江風蕭蕭兮草茫茫吁嗟哲人兮閱此居

郭公姬薛氏墓誌銘

唐陳子昂

姬人姬薛氏本東明國王金氏之胤也昔金主有愛子別食薛因姓焉世與金氏爲姻其高曾皆金玉貴臣大人也父依冲有唐高宗時與金仁問歸國帝疇厥庸拜左武將軍姬人幼有玉色發於穠華若彩雲朝升微月霄映也故家人美之號曰僊子問瀛臺有孔雀鳳凰之事瑤情悅之年十五大將軍薨遂剪髮出家學金僊之道而見寶手菩薩靜心六年清運不至乃謠曰化雲心兮思淑真洞寂滅兮不見人瑤草芳兮思益高將奈何兮分青春遂返初服而歸我公郭公豪蕩而好奇者也維佩以迎之寶瑟以友之其相得如青鳥翡翠之婉變矣繁華艷歌樂極悲來以長壽二年太歲癸巳三月遇暴疾而卒於通泉縣之官舍嗚呼哀哉郭公恍然猶若未亡也寶珠以合之錦衾以舉之故國途遙言歸未迨留殯於縣之惠普寺之南園不忘真也銘曰

館陶縣志

卷之十一

誌銘

十二

南丘之白雲兮願一見之何期哀淑人之永逝感紺園之春時願作青鳥長比翼魂魄歸來遊故國

張元帥墓誌銘

元陳郡徐世隆

東平大行臺嚴公歸國之明年提兵略地西抵太行列郡嚮風獨磁林二州未下公方急趨上黨二州實梗其道將置城而慮有股背之患猶豫未決時有張弼者說公曰是可以舌擊不可以力勝况城小衆志易附力攻之未必能取縱得此城其屬縣尙多依山負固猝不得下如頓兵何請單騎入城以天意人事開諭之倘見納則沿山諸柵可傳檄而定公曰彼旣與我相抗疑見給則必害汝且損軍威汝毋往君曰死亦命也夫兵交使在其間必無殺使之理固請行公壯而遣之卽降君詢諸部無一拒命者益兵而行遂平澤潞竊嘗論之兵猶醫也良醫視人之疾必先之以和劑使元氣通暢而疾自退疾不時瘥則如有攻奪之論蓋不得已然後用毒藥伐疾者疾雖去而元氣已索

然矣觀張公止戈按轡而降兩城可謂善用和劑而平疾者也侯自公輔世爲館陶人祖諱弁勤播殖困粟常支十年時號善富儉於自奉施人則無斲斧異性寬厚犯而不較鄉人有訟必爲之具酒肴以和解之訟者自釋鄉人化之以訐爲諱侯資樂愷疎財敦義有祖父風智慮周遠洞達時變大安中聞北邊有警逆知將亂預結豪傑定爲患難交椎牛醢酒日與衆樂家貲蕩然不恤也貞祐初河朔潰亂土盜羣起兢相吞噬侯召豪傑立保障團兵自衛盜不敢犯遠近皆依焉推侯爲館陶冠氏等縣都提控縣當南北之衝頻年被兵剽掠殆盡大失耕稼不得立食侯撫存百姓雖居窟穴茹草木而無攜去者庚辰以地附東平行臺公喜甚犒賜踰深每遇征伐俾從一軍自効屢以捷聞旣而招降兩州復以破家將彭義斌於贊皇乙酉第功超授廣武將軍大名治中副都總管右副元帥丙戌移鎮磁州行元帥府事入境老稚歡迎觀者塞路有張節度者率僚吏羅拜馬前且謝罪言冀者不察天道昧於去就以葭爾孤城敢違命罪在不赦辱我侯明諭爲開生路闔境數萬口不膏斧鉞齒之版籍之中使爲大民皆侯賜也侯

館陶縣志

卷之十一

誌銘

十四

卜馬遜謝曰此行臺之惠余何有焉侯素謙不事矜莊凡見部民之老者延之坐究問疾苦辭貌坦易使之不畏而敢言事可因可革一聽而施行之再赫士墾農勸士集貨通滏陽一郡熙然爲樂郊矣庚寅土斷制割磁州隸河北西路行臺侯矯制仍領磁州元帥府事食邑一千戶僉封一百戶配封趙氏清河郡夫人暨朱氏考贈如侯妣徐氏贈清河郡太夫人祖贈昭武大將軍上輕車都尉清河郡開國伯祖妣良氏贈清河郡太君侯旣蒙卹典追贈其先以畢顯親之志求退甚力公允之仍命長子之綱主館陶縣簿爲侯侍焉自侯求居葺田園教子弟優游里社者餘二十年以甲寅春二月二十有四日考終享年七十六安厝於其鄉之范氏原從先人也子男五人之綱最長且爲人美風儀足材行歷試州縣所在有治聲由館陶簿升爲令擢東平路鎮撫軍民彈壓遷博州防禦使今爲東平路管民決官權府事皆鎮國上將軍勳封食邑悉與父同婦樊氏亦封清河郡夫人暨趙氏同次子曰琪宣武將軍克館陶縣軍民彈壓早卒又曰琬曰琮充館陶縣都巡檢曰瑀復以宣武將軍克館陶軍民彈壓女九各適望族孫九人

曰詠克濮州等處總管人匠官訪訥詮誠洗諫謙訓女孫十一人曾孫一人曰錫嗚呼能活千人子孫復有興者觀張侯以一言而救兩州之民所全活者難以數舉其後之必大且賢宜矣銘曰

武安不仁盡坑趙卒杜郵之劍何償冤骨淮陰背信襲破齊城長樂之縛難追天刑積罪如山流血成池慘刻之事義人弗爲二將貪功功不掩罪身戮家亡其利安在猗歎張侯耻用詐力惟推至誠深入不測勇犯強敵智非幹儻不費一鏃遂收兩州身康且壽嗣賢而息較之昔人孰得孰失春秋筆削法尙謹嚴大事則書衆美難兼叔世狗人至諛諸墓巨細必陳行以百數侯善孔多我紀其著惟庇斯人昌大汝戶駟馬高車騎侯之餘墨綬銅符匪侯則無吁嗟後人克念先德視履考祥毋玷茲石國朝

段墓碑享叙

知縣鄭先民

陶丘城北舊有段先生干木之墓湮於榛莽有年滿洲程君來令茲土始立石以表

館陶縣志

卷之十一

誌銘

十五

之嗚呼先生去今二千餘載誰知有墓尙存也余每逢寒食奠酒其下徘徊仰止者久之小構一亭以著其清風高節而程君實先獲我心於是凡祭先生之日遂并祭程君之墓俾前賢後彥同此不朽亦陶 之盛事也

續文藝

段干木先生贊

知縣郎國楨

夫人有不世出之遭而我獨視爲若將浼已者此其中實有不可動者在焉而非出於一時矯激之爲也段干子行事不多概見止傳有避魏文侯一事其風節與許由何異固不必摭拾其他而已知其爲高出尋常萬萬矣彼蘇秦范雎之徒或揣摩以洩忿或隱忍以要君曾無一毫自愧其進之非而位高多金之言報德報怨之舉有恆人不肯蹈而彼顧揚揚得意視先生何啻天壤哉祇因孟夫子有已甚一言當時儒者遂不急爲表見不知不爲已甚者聖賢之正經而不妨已甚者高人之奇致孟夫子以不見諸侯爲義觀其迫斯可以見之言豈止爲一已明所守之正而深之先生之意不已在言

外說

段干木先生祠記

知縣陳冕

先生晉之高士也自三晉分乃隸魏守道不仕師卜子夏魏文侯造其門踰垣避之文侯每出過廬必式秦欲攻魏聞先生名遂輟兵蓋其清風勁節有凜然不可犯者余來陶出郭北見有古塚焉樹豐碑其前卽而視之知爲山海程公勒石以表先生墓者夫先生墓在邴城而此何以有墓也且先生距今遠矣何表之自程公昉也意者邑乘載有先生裔孫段道超誌爲貝州永濟人考恩縣古稱貝州唐名館陶爲永濟倘亦後人追水源木本之意而遡及之者耶抑陶邑西南有西河寨村意或其受業子夏處而卜葬於此耶未可知也客有語余者謂潛江鄭公亦曾建祠於此今僅存荒址是不可無以興之余曰先生遠侯王却富貴氣節徹天地而貫古今何須於一祠然爲學者樹儀型挽頽靡使修行立品者有所依據以自立即有與世浮沉走勢利若鶩者思先生而愧愧而返則世風名教有賴若茲役者豈小哉爰與是邑諸同事及紳士輩謀建一祠於故址寧朴無華寧湫隘無弘敞以彰先生踽踽獨行之志或亦先生所許也昔范文正公爲嚴子陵祠記詞有云雲山蒼蒼江水泱泱先生之風山高水長余爲先生歌無以易也後之人其有過廬拜壠動仰止溯洄之思者乎則先生之風長留於陶山衛水之間是余之所重望也夫

田烈女墓誌銘

知縣楊一正

烈女姓田行二生康熙乙酉歲邑之蘇村人也父名虎以女字范得貴長子現未幾虎外出十餘年音信杳絕阿母嫌壻貧從舅氏謀欲女改字得貴控於余余因時荒旱緩其庭訊令地役調處之女嘆曰背父不義也違母不孝也有一於此毋寧死遂自縊焉余哀其死憐其志斷柩歸范以安泉下幽魂太史公曰死或重於泰山或輕於鴻毛嗚呼烈女之死猶泰山也若從阿母言不過一田間村婦與草木同朽已耳裙布紅顏素未讀書不聞君子之教能知忠臣烈女不二事之義領引自裁從容就義一死何其重也風化因以勵綱常於以振作家之珍爲國之光余甚佳之躬親致奠爰題其石銘曰

窮簷弱質行年十七能明大義終身從一花殘玉碎無非阿母冰心烈性永昭千古

郎公續志序

邑人高重光

士生斯世行一二事焉足以有功於當時足以流傳於後世是亦可以無愧矣然士之生斯世也行一二事而即可澤及蒼生即可利及來茲則莫良司牧若矣司牧之於民也最親其日撫摩之若父兄之於子弟其施政於民也最便其思興革之若家人之漑其釜甑而理其耒耜其任之也最久久則習之極其熟而爲之得其專民之感之也最易其鼓舞興起也若饑者之於食而渴者之於飲而猶有不盡然者則始也明不足以察其隱勇不足以致其決其繼也忠愛無已之意未至而周詳懇到之言不傳則亦無可如何矣而吾陶得三君子焉皆吾所目覩而身接之也其初得鄭父母之精明足以釐弊而剔奸其繼得陳父母之操守足以鎮靜而安民其後得郎父母焉公之初下車也訪二公之善政而推行之行之久而覺弊之猶有未盡草民之猶有未盡安者賦役之不均使然也賦役之所以不均者則里有大小之不齊戶有遠近之不一田有肥瘠

館陶縣志

卷之十一

續文藝

十七

之不等人有貧富之不同也是不得不議均矣然猶慮民之可與觀成而難於謀始也於是爲之委曲以啓其端爲之利害以怵其心爲之纖悉詳明以清其弊爲之履畝入鄉以稽其實然猶慮更張之不易而申詳之掣吾肘而擾吾民也於名雖仍舊而實以更新非果斷勇決而何能底於成哉夫然後里無大小而得其齊戶無遠近而歸於一出因肥瘠而上下其等人因貧富而多寡其數則里均矣則牌亦無不均矣無不革之弊無不安之民矣然猶慮可以行於當時而或不能傳之異日也乃又爲之記以詳其源委爲之圖以定其方向無非以忠愛無已之至意發爲周詳懇到之良謨使奸巧者無以進其說而考稽者有以得其鑑後之蒞斯土者鎮靜以守其法可以無失神明以通其意可以有據則行於斯時者即可以傳於後世矣若夫陶山記之往復百折烟波無際段干木贊之抑揚盡致言簡意遠則有目者所共見也又何俟余言之贅哉

買蝗記

知縣錢 瓚

蝗之生也自古患之誵誵子孫腹孕衆多化一爲百疾若風雨口含鋒刃食苗無遺

官府督民驅捕或曰天災也捕之必不能盡然則捕蝗之法奈何嘗讀歐文公詩曰
官錢二十買一斗示以明信民爭馳斂微成衆在人力頃刻露積如京坻往時姚崇
用此議誠哉賢相得所宜是則捕蝗之法莫善於買蝗也第長民者視生民之休戚
不甚相關而又吝囊橐之積蓄莫肯費其半粟落其一毛其法遂無有行之者不行
其法而欲蝗之盡其類絕其種不可得也甲戌初夏館陶鄉村蝻種滋生漸成羽翼
將爲種禾患余遍爲鄉民約凡捕得一斗者以粟四升易之一日之內老幼男婦爭
相捕獲得蝻數十斗無不各如其數以與粟民歡呼於道曰我侯不惜損橐我儕小
人捕之必力蝻種豈有遺乎又越三日蝻種無遺命屬尉四鄉視之報命曰蝻果無
遺矣屈指所給之粟僅五十石而蝻患遂絕不數日間直隸山左紛紛以蝗告事聞
京師厘

睿慮諭差部員巡查一時撫司當事星飛嚴檄責令郡邑有司親督百姓捕除之獨館
陶一邑無蝗詳陳買蝗之法上憲通行閩屬悉照捕蝗一斗給粟四升之例由是東

館陶縣志

卷之十一

續文藝

十八

省之蝗亦絕本年秋收皆成豐歲由此觀之些微升斗可以鼓勵人心可以挽回造
化奈何今之人欲責人之効命望事之有成而恤其錙銖吝其微末及至事不成而
人不用命則謂是彼無心胸者也嗚呼天下人其果無心胸者哉由於已之鄙吝慳
嗇致天下事無能爲天下人無一知己事與事之相違人與人之相怨迨其後終亦
至於財散貲匱而不能保其固有豈不大可嘆哉

圖說

知縣郎國楨

余惟均里之後勢必均牌而後賦役兩得其平均賦一視乎地必先使各里之地坐落
歸一既得以就近催輸而尤使地之多寡相等則里方無不均也故今之里非復昔之
里均役一視乎牌必先使各牌之人隱漏悉出既得以附近連屬而尤使人之多寡相
等則牌方無不均也故今之牌非復昔之牌里之地有沙磧之不同故賦有折免之不
同其他不得概援可知也因而牌之人有貧薄之不同故數有增加之不同其他亦不
得概援可知也地有地册牌有牌册而統梓之於誌既一覽而可稽又復繪之於圖者

亦以見日後卽有變通止須神明乎法之中而里之方區地之沃瘠戶之豐嗇終不可變而圖亦不可變也庶幾永作官民之監與

自叙附

館邑歷來官民相安有年矣因循既久則痼弊自叢以目前一時之安而貽日後無窮之害余不忍爲也余惟館邑之最不均而累民者固不以一事而賦役爲甚欲均賦役先清里甲而尤先使民不擾不費爲第一義首尾四載方有成勞不自知其可告無罪於百姓否言者多謂余此番清釐之數已符 功令兩階但如此則館民負累將無已時矣余亦安忍以彼易此哉至於除里書之僉差免里長之借墊與夫柳蔴車輛繹募等役所不能爲吾民免者則僅取竣事而止既不中漁亦不使旁落凡心乎民者優爲之不足記也若夫考訂山川之佳勝闡發潛德之幽光亦有司事也故并誌之

忠義節孝二祠碑陰

館陶縣志

卷之十一

續文藝

十九

皇帝御極之元年癸卯詔天下有司舉報忠孝節義之人其已往者宜建祠標名以時祭享用以闡幽而垂久而余於又明年乙巳秋被

命來官茲邑肅承欽

詔下諭於衆曰此特典也其詳其慎勿濫勿私已而館士大夫連名列呈舉忠臣某孝子某義士某節婦某烈女某某酌其可者得數人焉上之

諸臺 達之

九重果如所議已又卜地於學宮之西偏建忠義祠於城隍廟之左建節孝祠凡門若干楹堂若干楹既竣宜立碑以記其盛余謂館爲山左古邑又當齊魯宋衛四國之交貞孝節義何乏人而無一席之地以處幽魂前者胡以憫而後者胡以勸也今二祠既成以妥以侑不獨貞士烈女咸得其棲靈吾見館之人爲臣盡忠爲子盡孝爲婦盡節風俗日益醇人材日益盛矣然則

聖天子之深仁厚德其被於來茲者何如哉是舉也始於雍正四年三月訖於本年七

月文學李志杜李志朴董其事工料木石之費共百五十餘兩除支頒發銀一百零八兩不足者志杜志朴捐助節孝祠地基文學秦謙捐出五尺許是不可以無記銘曰我皇御宇首重孝貞樹之坊表建之棟楹生微厥寵死亦沐澤何用不旌維忠維烈館屬名區風俗尤古潛德未發幽光蝕土於鑠斯祠既丹既護春秋享祀貞魂如昨陶邱蒼蒼漳水茫茫鐫之碑陰用志不忘

普濟堂碑文

館陶東郡中邑也輻輳之內枕陶山襟衛水處齊魯西偏爲燕京通衢按風俗志載隋書云人好儒學性質直懷義有古之風烈又載開給諫四義記邑有王本元者嘗捐多金設立義田義塾義渡義阡傳爲四義之莊館雖最爾邑哉善人端士惇義而澤及宗族鄉邑者其天性然其風俗然將古與今之好施樂善當無不然也歲在癸丑余恭膺

簡命總督河東仰體

館陶縣志

卷之十一

文藝

二十一

聖天子愛養元元至意欲使窮鄉僻壤咸流

皇仁以臻一道同風之盛爰於甲寅夏檄行兩省仿

京師普濟堂之制令州縣興建安養無告窮民自秋徂冬各屬詳報工竣者紛紛而至迄今幾偏兩省矣余竊喜僚屬之勤於督率又喜兩省風俗之醇人心之厚捐資助產慕義急公者所在多有而館之普濟堂亦循例興建焉堂屋凡二十間官紳商民共捐銀四百七十九兩有奇置備建堂工料器皿棉衣各類用銀一百六十五兩四錢買田六十三畝計價銀一百二十一兩六錢餘銀二百餘兩附質庫生息歲取田租子金爲堂中薪米醫藥授衣施棺之費又雍正八年南漕餘穀一百餘石亦撥入以補贍其規模匾畫稍稍具備而館之人心風俗猶敦古處亦於此足徵矣余竊有感焉茲茲堂之建報竣於甲寅九月維時董其事者謝令士柱旋以仄代去嗣而經理者阮令汝暉視事僅數月又以巡荒原闕汙萊中傷炎暑嬰疾卒於官今茲請記於余者則攝篆事堂邑令張興宗未及期年長吏三嬗人事靡常變遷莫定倘不爲斯堂圖久遠計虛循故事

痛癢無關則倏忽之間嗟鳩鵲而悲向隅者旋令人不忍覩聞矣誰謂斯堂無藉而可長保乎夫宣上德意導民興善守土者之事也自今以往撫茲民社體

上天之仁愛廣

帝德之宏深因時補救惠愛窮黎而鄉之紳士善良又皆時行捐給常使盈餘樹萬年不墜之基遂斯人生全之願將見館雖小被潤澤而大豐美直頡頏乎通都鉅邑而無忝鄒魯人士勉乎哉

其田畝邱段字號及諸樂捐姓氏備載碑陰

雍正十三年歲次乙卯八月中浣穀旦

欽命總督河東兵部右侍郎兼都察院右副都御史紀錄四次黔南王士俊撰

覃恩誥授承德郎通判加一級管堂邑縣兼攝館陶縣事甬上張興宗勒石

館陶縣志

卷之十一 文藝

二十一

詩

昭君怨

唐郭元振

聞有南河信傳言殺盡師始知君念重復遣盡娥眉

子夜秋歎

邀歡空佇立望美頻回顧何時復採菱江中密相遇

子夜冬歎

北極嚴氣昇南至溫風謝調絃競短歌拂枕憐長夜

發館陶

促轡數殘更似聞鷄一鳴春風馬上夢沙路月中行笳鼓遠多思衣裘寒始輕稍知田

父稔燈火聞柴荆

次館陶

元許有玉

浦雲林霧鬱蒼蒼水面無風晚自涼今夜蓬窗應不寐計程三百是吾鄉

館陶縣志

卷之十一 詩

二十二

詠郭震助喪

明太宗文皇帝

不詢名姓竭行囊慷慨傾貲助有喪五世一門俱感德褒封千古翰青香

題陶山人屋壁

御史熊卓

山泉入戶流閑花自開謝此意堪誰語月明來庭下

其二

杳杳竹林下青蘿向人長俗客不到門清風自來往

過館陶

侍講劉球

霄漢度鴻毛行舟及館陶路通西蜀遠浪接北風高郡邑稀郵舍田疇半野蒿民淳皆
變魯跋涉敢辭勞

寄王太尹

邑人耿明

陶山風俗近何如民物熙熙樂太和百里桑麻秋賦稅萬家燈火夜絃歌草生囹圄冤
民少花滿郊原異政多信是賢侯膺寵遇徵書遙見下鑾坡

送別孟太尹

聊城西北望吾陶潤澤翻成嘯海濤五斗不糜腰懶屈七絃絕響調孤高宦情于我真
嘗蠟交誼如君信飲醪此別誰憐風露冷春光荏苒到枯條

過館陶呈鄜北塘

編修沔陽童承叙

獨擁雲霄節來經齊魯行維舟當野市卷幔對山城竹杪潭烟溼沙頭蒲月明况逢勾
漏令能豁茂陵情

館陶旅興

編修應時

孤城日日散朝鴉衰柳寒汀近酒家悵望三秋不成醉况堪留滯尙天涯

荷簑亭

邑人耿章光

披草尋荒徑幽閒得此亭暮烟萬井白微雨四山青風落蕭蕭木簷飛點點螢倚闌吟
不寐次第數昏星

補遺一首

館陶縣志

卷之十一 詩

二十三

題李丞舊居

唐皇甫冉

盛名天下挹餘芳棄置終身不拜郎詞藻世傳平子賦園林人比鄭公鄉門前墜葉浮
秋水籬外寒臯帶夕陽日日青松成古木祗因來者爲心傷

新題八景

陶山夕照

國朝知縣鄭先民

茲聞且曠日落見山情趙館湮無跡禹書僅有名千林歸鳥下半壁彩霞生牧笛知
何處悠然時一聲

東嶽晴雲

勝地東連嶽晴雲自往來無心過雉堞隱約見樓臺覆鉢疑龍起棲松惹鶴猜何須觀
海市卽此是蓬萊

黃花故臺

弔古荒臺側遺跡猶在不惟餘新草色無復舊風流斜日偏來照西風剩得秋徘徊增

感慨歸騎每遲留

駙馬古渡

想見韓郎渡當年或在斯大都諸往蹟未必盡傳疑月冷汀沙夜春青岸草時豪華千古夢經過使人思

衛水秋漲

衛水河源遠秋來漲似春帆檣高過樹波浪不驚人處處無危岸時時有巨鱗誰言斯土僻出郭卽通津

蕭城曉烟

荒堡何年築相傳駐馬城已無宵柝警惟見曉烟生草長空壕合雲深古堞平悲風吟野樹猶似舊笳聲

古井甘泉

古藝旣無縫甘泉何自盈映天同鏡朗消渴較冰清潤澤分河瀆功施半市城鷄鳴還

館陶縣志

卷之十一 詩

二十四

到夜不斷轆轤聲

長隄春色

自昔河爲患勞勞築此隄曾聞桑種海今見谷成蹊碧樹宜鶯語青蕪稱馬蹄春來花滿地百里盡香泥

前韻

陶山夕照

國朝主簿王金

陶山何處是不盡古今情四野漫無際一山空有名斜陽林外下涼吹晚來生坐聽郊原裏樵歌又幾聲

東嶽晴雲

汪一虬

雲痕晴乃幻嶽色遠偏來欲望巽間氣還宜雨後臺塔鈴猶隔語松鶴漫多猜獨坐蘆廬適霞光射草萊

黃花故臺

王金

故臺臨水築遺址尚存不碧草高低合滄波晝夜流曾無花映日惟有雁橫秋莫惜豪華盡吟詩幾度留

駙馬古渡

駙馬知何代傳聞渡在斯滄桑眼底變風景望中疑鷗鳥隨波處蘆花照岸時行人經此地弔古不勝思

衛河秋漲

董上新

衛河秋水劇天上坐如春帆影迷城堞漁歌雜榜人雲低生蜃氣波動見龍鱗應有乘槎客來茲一問津

蕭城曉烟

董上新

北塞多雄志遺跡見舊城都隨流水去但有野花生曉日千林出輕烟一望平當年嘶馬地風雨若聞聲

長隄春色

汪一虬

館陶縣志

卷之十一 詩

二十五

依水春多麗探奇在古隄綠侵知柳岸紅綻入桃蹊閃亂征帆影參差怒馬蹄攜尊花底醉不惜臥香泥

古井甘泉

汪一虬

物理渾難測井虛常自盈有泉香以冽無縫湛而清龍護十年甃天漿百里城樂饑頻用汲石乳遜芳聲

續詩

題田烈女墓

廣濟金啓洛

館陶田家女許作范家婦少小諳禮經何曾事章句遭遇獨阨窮阿父先朝露今年歲
徂饑枵腹難支柱阿母前致詞溝壑良可懼比舍厚藏兒改字可充舖本爲生死謀汝
母金石固女也聞斯言長跪仰天訴從一義云何母言迺謬誤夜半歎自經有母不違
顧鄉鄰昨舌驚輪蹄走相訃關西賢金尹瞿然致厥賻伐材爲女棺附身靡不具礪石
馬鬣封大書烈女墓再拜饋奠陳觀者塞衢路嘖嘖表章心所關非細故頽風爲之摧
網維賴以樹於哉弱貞魂千秋馳令譽

陶山

會稽王 昉

隱隱陶山去郭斜山留殘照景堪誇光分草樹晴鋪錦影逗岩阿暖簇霞牧笛數聲爭
去徑樵歌一曲競還家我嘗眺覽回來晚帶得餘輝分外嘉

衛河

館陶縣志

卷之十一 詩

二十六

百折清流繞邑西粘天拍岸蕩晴輝千雷爭震聲如怒萬馬橫奔勢欲飛噴激蛟龍偏
適意迴翔鷗鷺解知機何當趁得仙槎去遠訪銀河牛女歸

駙馬渡

王 昉

駙馬當年此地經山河莫不被光榮沙頭立馬旌旗動浪裏浮舟鼓吹明細草一汀春
雨歇垂楊兩岸曉風晴至今南北經行客無不相傳道舊名

無縫井

王 昉

一泓石罅碧苔封百尺淵淵探不窮休道泉源無縫透要知海眼有潛通千年澄澈人
難並六月寒甘味莫同且夕轆轤聲不斷由來無限濟人功

登光岳樓

重來此地一登樓彷彿神遊天際頭萬里雲山頻入望三江舳艫盡歸浮已知塞上烽
煙靖猶羨寰中景物休愧我有生逢聖世丹心耿耿未能酬

楊太尊祠堂

耿賢舉

故老懷遺愛棠陰話正頻一錢臨折柳雙鹿道行春祠刻椒圖狀門懸棹楔新橋烏棲古渡宛轉若相馴

捕蝗祠

趙知希

麥秀黃雲夏風旱蚋子蠕蠕初出卵莊農護麥不敢聲里正促報鄉情斷縣官當日下鄉來懲爾報遲怒似雷傳集村夫三五百禁說不蝗不為災縣官執冊編成伍編得長蛇如兩股嘈嘈打成團短木縛聲不計數東西濠塹百丈餘一撲一擊心歎歎炎炎烈日燒如火家有青苗尚未鋤可憐日夕不得息旦暮有蝗生 翼公文催督星火馳見說有蝗噴不力百錢一斗買飛蝗小男老女野田忙螳螂蚱蜢同時盡市上爭得蝗價昂吁嗟乎捕蝗真可悲高築蝗塚星纍纍留待委官來看驗遙天怕有蜻蜓飛

光岳樓

趙知希

凌空帆帆雄通都俯看下界雲模糊指使齊魯分疆界目斷海山時有無應為仲連懸一的頓來王粲傾一壺更上一層飛未得隻身疑傍青天呼

館陶縣志

卷之十一 詩

二十七

又

鐵公據勝憑凌日三百餘年空此樓欄下盡教風物改眼中微喜鏡湖秋岳光隱躍浮天際海氣分明到上頭我亦未聞身在客周遭迴望重遲留

蕭城懷古

趙知希

花門天驕子更奇驕女生黃河一線地寧以宋為兄雄師擁秋風臨涯築方城當日非寇老一局定全贏誰當倉卒間突然孤注傾重陰乍斂跡天日一晴明中原苦戰伐賴此城下明遙想十六州襟喉端所爭戍卒星羅布邊防轉未輕滄桑屢更後久矣入編氓荷戈拜長史猶稱蕭渠營每當田狩日按戶出精兵排場開肆伐隊伍勢崢嶸進止

陰陽台風雲鼓角清雖如優孟舞想見流傳情

蕭城下居民自稱曰蕭渠營兵邑城凡防禦巡邏之役悉充焉春秋演武之日

辛親閱操擊鼓擊旗大異鳥台者夫有所受也

我來蕭城下仰懷髮星精歲久無雉堞崇岡滿榛荆堊人墾殿

庶饑鳥餐落英邇來逢泰運桑麻繡縱橫誰知南北交往昔紛戎徵寒日慘欲白飛沙四壁驚荒臺明月下疑聞環珮聲

題段干木先生墓

邑廩生劉廷瓚

負郭毛州外相傳干木邱清風興懦立高節抗賢侯殘碣一亭古荒園幾樹秋西河源不斷千載共長流

題田烈女墓

貞魂含笑赴泉壤不把新郎易舊郎漫道鴻毛輕擲命青絲一縷係綱常

蕭城懷古 季試題

劉廷瓚

雉堞何時建相傳蕭后名挹來朝露濕望去暮雲平碧草征屛色松風鐵馬聲千年歸聖化桃李燦邊城

館陶縣志

卷之十一 詩

二十八

館陶縣志卷之十二

雜志 寺宇 災祥 兵警 採異

二氏之說不登宮牆久矣今境內寺宇相望雖舟聖煥然不敢齒於正編陶彈丸區自古禎祥不數見而災眚疊告寧可諉曰天行顧弗葺乃人事哉治亂相乘兵戈代有異聞亦當芴採茲採其有據者前編綱目悉具未附雜類如 家置閭然 畢厥集

寺宇

寶應寺 在縣治西南隅金時建僧信智重修遭元兵燹毀明洪武十七年僧子成復建永樂間僧覺威性保擴葺巍然巨觀大僕寺寺丞海昌朱湮記景泰辛未繼葺之弘治辛酉僧翠峯祖漢重修邑人耿明記崇禎九年邑人孫繼安軒三傑募建後殿兩廊抱廈又令僧福祥性悲慶恩福榮請南京水陸大會佛像百二十幅繪畫工嚴他寺罕有

館陶縣志

卷之十二

雜志 寺宇

一

國朝順治十年知縣劉茂先捐貲倡邑人張邦治軒三傑僧慶寅增建後殿天棚頗稱弘麗相傳建寺石出一石匣內有古銅磬一口佛像十幅隨飛去二幅知縣宣城張星禮請二幅去餘與磬俱見存

奉泉寺 在縣東十五里路兒寨

圓覺寺 在縣東四十里路兒莊

石佛寺 在縣東南十里譚兒寨

牛兒寨寺 在縣東南二十五里

柏園寺 在縣南四十里沿邨

興福寺 在縣西南十八里北劉兒莊

佛堂寺 在縣西南三十里車疇集

寶應寺 在縣西南三十里柴家堡

洪濟寺 在縣西南四十里淺口鎮元大定元年建

彌陀寺 在縣西南四十里南館陶鎮

崇興寺 在縣西南南燕邨

圓通寺 在縣西南五十里甯陽堡

龍泉寺 在縣西南六十里拐曲邨太和四年建

龍行寺 在縣西南六十里南劉兒莊

吉固庵寺 在縣西南六十里吉固邨

觀音寺 在縣西南五十里遷隄邨

興華寺 在縣西十二里許兒莊

福勝寺 在縣西二十里龔家堡

天寧寺 在縣西二十五里降兒莊

洪恩寺 在縣西二十五里曹兒莊

白佛寺 在縣西三十五里蘇家堡

館陶縣志

卷之十一 寺宇

興龍寺 在縣北十里丁家園

石佛寺 在縣北十五里烟店

廣安寺 在縣北二十五里尖塚鎮

廣福寺 在縣東北三十里孫兒寨順治五年邑民燕邦恆重修貢生汪鳳翔有記

洪福寺 在縣東北三十里大章堡

準提庵 在縣治西北順治 年主簿楊振倡募建卽范公祠址

觀音祠 在縣十字街西明萬 十五年知縣陳景重修又一在南關外

災祥

漢武帝河決瓠子帝既塞宣防後河復決館陶分爲屯氏河

成帝建始四年河決館陶害東郡金隄凡灌四郡二十二縣水居地十萬餘頃壞官民室廬四萬所先是清河郡都尉馮遂言郡承河上流土壤輕脆易傷向所以無大害者以屯河通兩川分流也今屯河塞靈犢之口又益不利獨一川並受衆河之任雖高增

隄防終不能洩可復浚屯氏河以洩暴水事下丞相御史以爲方用度不足可且勿浚
至後遂不果決

章帝元和元年明珠出館陶大如李

宋仁宗至和二年河決大名館陶殿中丞李仲昌請自澶州商胡河穿六塔渠以回河
道遂以仲昌提舉河渠歐陽修三上疏力諫其不可後塔河成復決

元成宗大德四年館陶產嘉禾一莖六穗 見嘉禾碑

武宗至大元年澶曹濮高唐等州蝗館陶與焉

文宗至順元年三月濮州臨清館陶饑

明弘治五年東昌等處旱大饑館陶斗米百錢 十五年漳水決魏北注館陶

嘉靖八年御河決漂沒館陶居民田廬 十五年六月旱蝗蔽天 三十年衛河決臨

清館陶壞民廬稼三十一年河復決水大鳴如牛聲數日河遂東徙 三十二年大饑

斗米百錢 三十九年大旱 四十一年春大饑巡撫都御史朱衡移文給民粥

館陶縣志

卷之十二

災祥

三

隆慶二年旱 三年閏六月衛河決館陶溺死人畜無算

萬曆三十五年衛河決 四十一年莘縣堂邑流至館陶東北楊兒莊入大隄西歸衛

河人傳黑羊山水四十二年旱蝗令民捕蝗照蝗給穀

天啓二年二月地震 五年二月異風晝晦如夜

崇禎 年六月有虫五色一二日間食苗盡 十一年七月飛蝗蔽天食樹葉蝗蝻入

人室 十二年蝗蝻食麥 十三年歲大饑人相食 十四年地稽生黍稷人賴以生

國朝順治五年五月大雨雹麥盡傷 十年五月初八日夜大風雨雷電拔樹文廟柏

樹拔二株閏六月衛河決全邑受災 十一年八月初五日卯時地震 十二年九月

十六日霜殺禾 十三年三月初八日暴風晝晦閏五月蝗 十四年三月初五日隕

霜

康熙四年大祲巡撫周有德題請闔省蠲免租稅 七年六月十七日地大震 九年

秋旱 蠲正賦七千三百七十餘兩 十年春不雨

發積

穀二百七十五石一斗又請發臨清倉米八百石 六月好蝗食禾

蠲

正賦七千五百八十餘兩 十一年四月十三日河西雨雹十里 蠲正賦四十八兩

七月飛蝗蔽日

一面請蠲一面懸賞令鄉民掩捕數日之內四關兩

集蝗如阜秋禾賴焉 十三年夏旱

蠲正賦五千一百三十九兩 十

四年四月十一日黑風自午至暮 十二日隕霜殺麥

發賑穀七百二

十石 三十日大風晝晦如夜 閏五月二十一日大黃風從東南起晝晦

兵警

漢成帝更始二年檀鄉賊始起在平入清河光武遣吳漢追及館陶敗之又銅馬賊數
十萬入青陽博平遣偏將軍姚期迎擊之

晉武帝元年輔國將軍劉大安將遠將軍魯利建成將軍慕容農自將攻館陶收其軍
資器械

唐高祖時劉黑闥爲太子建成齊王元吉所追圍食盡衆多散亡或欲縛其渠帥以降

館陶縣志

卷之十一 兵警

四

闔恐城中軍與大兵表裏擊之遂夜遁至館陶永濟橋未成不得渡

攷黑闥貝州人嗜酒亡賴少與竇建德相友建德敗還匿漳南會高祖召建德故將
范願等將用之願等疑畏共推黑闥襲漳南縣破之自稱大將軍已又陷相州號漢
東王建元天造仍都洛州皇太子齊王悉兵戰館陶黑闥大敗遁去總管崔元遜誘
執斬之

德宗興元元年正月朱滔遣兵攻宗城寇氏拔之又縱回紇掠館陶

昭宗二年二月朱全忠遣其將李思張 敬將兵救魏博時葛從周自邢州將兵八萬
已入魏州戊申劉仁恭攻上水關闢館陶門從周與宣義牙將賀德倫殊死戰仁恭大
敗

後梁貞明元年晉王進屯永濟張彥選銀鎗効節五百人執兵自衛詣永濟謁見王登
驛樓語之曰汝凌脅主帥殘虐百姓數日中迎馬訴冤者百餘輩汝雖有功于我不得
不誅以謝魏人遂斬彥及其黨七人餘衆股栗

後唐同光三年皇甫暉殺楊仁晟擁趙在禮爲亂焚掠貝州南趨永濟館陶所過剽掠明正德六年流賊劉六等寇館陶莘縣遊擊將軍許泰帥師破之

崇禎十一年十一月我

大清兵渡衛河抵館陶 十五年閏十一月十二日我

大清兵破臨清二十六日圍館陶攻竟日城守甚固旋解去

十七年三月闖賊李自成僞設館陶令程文煥河津生員兵科給事中監軍凌駟工部主事代東昌道于連躍舉義擒文煥梟示之

採異

館陶周主簿顯慶中奉使臨渝將佐二人從往齎財物二人囊土殺之財物盡盜去至歲暮其妻夢夫具陳被殺之狀及所盜物藏匿處訴之官案驗具得狀併獲所盜物二人坐死 田爲書

續災祥

館陶縣志

卷之十二 兵警 續災祥 五

康熙三十九年五月十一日大雨 已至申禾盡沒

康熙四十一年四月二十八日大雹城東樹木折傷麥禾盡壞一望如冬

康熙四十二年五月後霖雨連綿田禾淹沒河水泛溢與波水相接平地水深數尺知

縣陳冕遍歷查勘奉 詔蠲賑截漕發帑遣官救養多方調護民賴全活

康熙四十四年三月初四日大風晝晦如夜

康熙四十七年六月大旱秋禾不收知縣高錕查勘詳請按災免賦散穀賑濟全活甚衆

康熙五十一年二月初十日未時黑風晝晦飛沙盈尺夜半方息

康熙六十一年至雍正元年俱旱知縣楊一正詳請賑濟施粥給糧親造閭閻粥必親

嘗粟必面給

雍正三年大雨連綿衛河泛溢傷民田禾廬舍知縣楊一正申文告災

雍正四年二月十六日縣民徐來振妻劉氏一產二男知縣趙知希申請 題准賞給

布米至今成立

雍正八年衛河冲决南自宋家莊北至孫寨堤口四十餘里非舟不可城屯四門勢甚
急是歲漕米帶徵錢糧減則九十一年俱被水災特河未决耳

館陶縣志

卷之十一

續災祥

六一

庚午救城紀念碑記

去年舊中秋節前三日爲館陶警團戰勝匪軍縣城解圍之日迄今恰屆年週物豐人和七噏無驚城內商民咸謂五儕得以安然度此今月今日之中秋舊節者皆前年警團同心協力拚命作戰之所賜也是不可不有所紀念以彰有功而殷崇報以當日余曾與於斯役也商會長張君向斗等乃屬余爲文擬勒諸石作爲永久觸目驚心之紀念焉余想夫商周而上有好惡之民無嘯聚之盜蓋其時計夫受田民有恆產而盜源已清民盡知兵守望相助而盜亦無隙而起也秦漢既降田歸私有兵民各分民無所恃以自救盜亦遂乘機而竊發於是荒山大澤亡命輻輳行旅村農日難寧處宋王荆公痛心時亂斟酌古制擬立保甲良法時賢反相率詬病後世且指爲謬會周禮然至今吾民有時敢與盜抗而幸保其身家者猶賴保甲遺制保團團是矣館陶位置僻在魯西與河北之曲周威縣接壤盜匪出沒民生爲困因之保衛團之組織及武器實較他縣爲整備而盜亦未敢率然嘗試故二十年以來盜風雖熾而館獨無恙庚午夏南

館陶縣志

卷之十一 碑文

七

北失和乃有干冠軍者在東昌僞稱師長收編匪軍事平無所歸欲得館陶爲根據地於廢歷八月九日率隊千餘突至城下以城守不得入乃圍城之東南兩面另駐一營於城西之馬頭鎮以取呼應外假求款遷防之名內修雲梯爬城之具邇時縣長劉公光卿尙爲晉方所派急於求去卸責和戰久議不決日惟閉門固守城鄉交通斷隔各區團務領袖旣義憤填胸城內軍警亦共願一戰全縣人民更忍無可忍於是德區區長兼保衛團總鄭顯和於八月十一日派遣游擊隊長李智明潛行入城會同各機關詳商戰備仁區游擊隊長沈秀亭亦飛函請速戰業已議妥各區進攻目的地定於十三日早四時進攻矣詎縣長又復中變下令阻止邇時各區團已達預定地點鄭區長並已於十二夜率隊進至城東五里之李家園村與匪之哨兵相遇猝未及防已傷亡團丁王連江一名士氣大憤俱不中止前隊抵郭莊與商會長張拱辰自練之鄉丁會遂向駐圍東門之匪師部發槍攻擊戰事乃開始時中華民國二十年十月四日下午四時卽歲次庚午廢歷八月十三日也城內軍警雖奉縣長令變更戰期但不能不夾

擊以取一致僞師長王冠軍初猶借口誤會希圖幸免繼聞四面環攻遂揮匪頑強抵抗戰事十分劇烈我方最危險處爲夜十二時匪以煤油燒我南城門業已洞穿適在縣長率警察隊長公安局長縋城求援之際設非或人建議拋柴門洞以火濟火之法則不可救矣亦幸守城官兵殊死抵禦復賴鄭團奮勇繼至內外猛擊匪軍死亡枕籍至十四日天拂曉而勢始不支敗隊南竄同時馬頭一役亦告解決於是館陶全城危而復安此留居商民所感念不忘而欲立碑以紀永久者也及今追思凡與於是役之官長兵丁無不敵愾同仇爭先恐後城內負責官長爲警察隊大隊長李中和公安局長趙峻巖保衛團副總團長李如升等各部中以警察隊分隊長魏全祿及隊目寶學詩張思之爲最異常出力其餘警團官長康如金寶學銘等次之商人李子臻宗玉琢不避艱險協同動作亦有足紀城外各區德區區長鄭顯和實關全局因德區較富庶其所成之保衛團游擊隊人數既多槍彈亦充足自担任城之東北兩面戰務團部設李家園村除派壯丁三十名歸游擊大隊長李智明統率入城協助外至夜半南門被

館陶縣志

卷之十二 碑文

八

燒時又徇縣長之請挑奮勇八十名由游擊分隊長張丕坤鄭福林等帶領入城夾攻鄒區長於必要時親至郭莊指揮一切張拱辰並率鄉丁親列行間向匪之師部連次衝鋒同在郭莊督戰者有潘莊團長李逢藻孫昭林在孟莊督戰者有黨務特別工作員張丕著而張光閔負後方完全責任皆德區也附同作戰者張拱辰部而外尚有北關里教員劉耀亭部人雖無多立功不少城之西南方面爲道區陣地區長郭曉峯指揮保衛團游擊隊長楊得生邢邦魁李維新攻南關駐匪之西禮區保衛團游擊隊長崔德隆智區保衛團游擊隊長張清源信區保衛團游擊隊長張星海各率本隊包攻南關駐匪之南其各本區區長陳星三馬曉峯郝福元等均在後方指揮援應故能力驅悍匪迅奏膚功攻馬頭者係仁區保衛團游擊隊長沈秀亭全權主持率其分隊長宋子貞王相益等與各區依預定計劃同時進擊以義區保衛團游擊隊長霍泉兩輔助之各本區區長于陶卿霍瑞兩防守後路大劉莊保衛分團劉東琛杜截河口雖有借於臨清開到省軍之力而能以少敵衆致使該匪竟夜不得出一人一槍以擾我城

之西北兩方蓋亦此役之成績最著者也若夫未戰之先冒險接洽支應者有建設局長楊景時財政局長張鸞芹副商會長張鼎臣馬隊隊長王青雲工會常務孫廣玉及商民代表周丕亨溫全祿王墨信等而李恩波於情勢危急之時出首赴臨清呼援其熱心毅力爲益士氣同非淺尠也既戰之後匪甫敗遁省軍適至張團長清秀派隊分頭追擊民心大慰然縣長劉公忽去省軍奉令移邱全城無主士婦奔逃各機關暨四街首事乃組織臨時治安維持委員會推余爲委員長余義不能辭權負責任與各委籌一勞永逸之計更有擬設匪災善後委員會之議決不數日而現任縣長 盧公少泉銜命蒞止城鄉有託四民歡騰所謂匪災善後委員會卽提前成立 盧公復懲前毖後頓整保衛團架設各區電話線挑濬城濠添置槍彈凡所以備匪患而保商民者無不悉心籌辦乃始有今日今日之安全故以今日而論紀念紀念去歲城難兼及當時出力團警商民之初心也若語以今日果何由而得坦然以行此紀念之盛舉乎則不禁欣然歸功於現任之 盧公矣懿歎休哉余乃不自顧詞陋而爲叙次救城之經

館陶縣志

卷之十二 碑文

九

過如上更願各區辦團當局永久保守此救城精神以漸次改善鞏固其組織俾愾然成爲極健全之自衛團體庶幾人盡知兵館陶境內雖不能驟期如商周無匪之盛而目前恐怖狀態總可幸免則今日之紀念殆又將來紀念之發端云是爲記

中華民國二十一年九月

日

館陶縣法院檢察官瑯琊覺民氏黃敦漢敬撰

館陶縣全城商民公立